

# LUKE KIPANA THUPHA Mijouse dinga huhhingpu

*Thusim'a thilsoh gilpen Pathen amangsa  
holdoh le huhhing dinga ahunglut*

*Gospel Luke lekhabu sung thu umdan*

Gospel khatcheh hin ama ama al-na khatcheh aneiyuve, ajehchu alekhabu sunhon Jesu hinkho le anatoh atahlang dan'u lamdang cheh ahi. Luke hi Paul nungjui ho lah'a khat, Juda mi hilou, louthem, Rome gamhop Macedonia apat ahi. Gospel sunga thilsoh hohi amatah in anato ahipon, ahin phatah'a akholchil dimdem'a amittah'a anamuho'a kon alahson ahi (Luke 1:1-3). Athu kholgil natoh hin Gospel danga umlou manlutah thusim phabep eipeuve. Luke hin ahithei chan'a athusim lhingkeiya seiding agot ahi, tichu-Jesu pen thusim abulhingset a, ahin damlai thusim, athi chule athodoh thusimho panna ahi.

*Lekhabu jihpa chule ajih kum*

Luke, Gentile mi, louthem chule solchah Paul kiloipi pan, hiche gospel hi AD 59 le 63 sunga ajih ahi.

*Koi henga chule ipi dinga ajih ham?*

Luke in Theophilus kiti Gentile mi, tahsan thah mi ahilouleh Jesu chungchang henom mi hitei ding'a ginchat um, dinga asut ahi. Theophilus kiti chu “Pathen ngailu,” tina ahin, hijeh chun

kimkhat in hiche lekhabu hi Pathen ngailu ho dinga kijih hiding-in jong aseiyuve. Luke in akineppi chu ahileh Theophilus le lekhabu simjousen Pathen mingailutna hi nam jouse-Juda le Chidang namdang chungah akibange, ti ahetdiu hi ahi.

### *Thumakai*

<sup>1</sup> Mi tampin eiho lah'a ana guilhung thilsoh ho chungchang sutdoh agouvin ahi. <sup>2</sup> Amahon amitah'a mu seijui masaho thulhut amangchauvin ahi. <sup>3</sup> Thil jouse abul'a pat phatah'a kholchil ahitoh lhon'in, keiman jong chingthei tah'a nangma dinga jihdoh ding kakigel lhah ahitai, jana sangpen chang Theophilus, <sup>4</sup> chutia chu thutah nana kihil jouse chu ahimong nai ti nanop nading ahi.

### *Gabriel Vantil Zechariah henga akilah*

<sup>5</sup> Judea gam'a Herod leng ahi laiyn, Zechariah kiti Judah thempu khat ana um'in ahi. Ama chu Abijah thempu loi lah'a khat ahin chule a'inneipi Elizabeth jong chu Aaron thempu khailhah'a kon ahi. ☆ <sup>6</sup> Zechariah le Elizabeth chu Pathen mitmun achonpha lhon'in, Pakai dan thupéh le chon na dan jouse chingthei tah'a jui ahilhon'e. <sup>7</sup> Elizabeth in nao avop theilou jeh chun cha aneilhon pon, chule ani lhon'in hateh'in ateh gel lhon tai. <sup>8</sup> Nikhat Zechariah chun Hou'in sungah Pathen kin abolin, ajeh chu chuche hapta sunga chu mopohna chang ahi. <sup>9</sup> Thempuho chonna ngai banga, ama chu Hou'in muntheng sunga lut'a chule thil namtui

---

☆ 1:5 1 Thusimbu 24:10

hal dinga lhendoh hi ahi. <sup>10</sup> Thil namtui akihal jing laiyyin, mipi tamtah pamlangah ading'un taona amang uve. <sup>11</sup> Zechariah muntheng sunga aumpet in Pakai vantil khat ahengah ahung kilah in, maicham phung jetlam a chun adingin ahi. <sup>12</sup> Zechariah in hichu amuphat in akithing'in hatah in akicha tan ahi. <sup>13</sup> Ahivangin vantil chun aseiyin, "Kicha hih'in Zechariah! Pathen in nataona asangtai. Na inneipi Elizabeth in chapa khat nahinpeh ding, chule amin John nasah ding ahi. <sup>14</sup> Nangman kipana lentah nanei ding, chule mi tampi ama pen a kipah ding ahi, <sup>15</sup> ijeh inem itile ama chu Pakai mitmua hung len ding. Aman ju kiti le khamna thei thil kiti atokkhah thei lou ding. Ama chu apen masang jenga jong Lhagao Theng dimset ding ahi. ✧ <sup>16</sup> Chule aman Israel mi tamtah Pakai a-Pathen'u henga alehei ding ahi. <sup>17</sup> Ama chun Elijah lhagao le thahat aken ding ahi. Aman mipiho chu Pakai hung na dinga agontup ding ahi. Mipa te lung achate chung aheiya chule doudal lungput neiho michonphaho chihna akisan sah ding ahi," ati. ✧ <sup>18</sup> Zechariah chun vantil jah'a aseiyin, "Hitobang hi aso ding ken iti kahet thei ding ham? Tun keima kateh tan, chule ka inneipi jong kum tamtah alhing tai," tin adong tai. <sup>19</sup> Chuin vantil chun aseiyin, "Keima Gabriel kahi! Pathen angsung tah a ding kahi. Ama ahi keima nahenga hiche kipana thupha podinga eihin sol ah; ✧ <sup>20</sup> Ahinlah tun, nangman kasei natahsan pon, chujeh'a nangma

✧ **1:15** Minbu 6:3 ✧ **1:17** Malachi 4:5,6 ✧ **1:19** Daniel 8:16; 9:21

nathipbeh ding chule nao apen tokah'a paothei louva naum ding ahitai. Ajuh chu kathusei chengse hi aphot cha guilhung tei ding ahi,” ati. <sup>21</sup> Achutilai chun mipi hon Zechariah chu ahung potdoh ding angah jingun, ipi bol'a hibanga hi sot den hitam tin alungdong gam tauvin ahi. <sup>22</sup> Achainakeiya ahung potdoh phat chun ama apaodoh thei tapon ahi. Chuin amahon amaiso le apaotheilouva kon chun Hou'in muntheng sunga chu mu anei hinte ti ahedoh un ahi. <sup>23</sup> Zechariah in Hou'in a athempu natoh hapta alhin phat in inlam'a akile tan ahi. <sup>24</sup> Phat chomkhat jouvin ajinu Elizabeth chu ahung gai paiyin chule lhangajen potdoh louvin aum thipbeh tan ahi. <sup>25</sup> “Pakai iti phat hitam!” tin aphongdoh in “Aman kacha neilou jeh'a jumna eilah mang peh tai,” ati.

*Gabriel Vantil Mary henga akilah*

<sup>26</sup> Elizabeth naovop kal lhagup lhin'in, Pathen in Gabriel vantil chu Galilee gam Nazareth kho ah, <sup>27</sup> nungah theng Mary hengah asol'in ahi. Amanu chu Joseph kiti Leng David insung khailhah pasal khat toh kicheng dinga got'a um ahitai. ✧ <sup>28</sup> Gabriel chu amanu hengah akilah in aseitai, “Chibai, sahluttah nu! Pakaiyin naumpi,” ati. <sup>29</sup> Lungdong le lung kika lahlah pum in Mary'in vantil thusei chu ipi tina ahi agel tai. <sup>30</sup> “Kicha hih'in Mary,” tin vantil chun aseitan ahi, “Ajuh chu nangman Pathen lunglhaina nakimutai!” <sup>31</sup> “Nangma gaiyin natin chapa khat nahin ding chule amin Jesu nasah ding ahi. ✧ <sup>32</sup> Ama

hung len ding chule Chungnung pen Chapa kiti ding ahi. Pakai Pathen in apu David laltouna apehding ahi. ✧ <sup>33</sup> Chule Israel chung a tonsot'a vai apoh ding, alenggam in beiti aneilou ding ahi!" ati. <sup>34</sup> Mary'n vantil chu adongin, "Hinlah, hichu iti hithei ding ham? Keima nungah theng kahi," ati. <sup>35</sup> Vantil chun adonbut in, "Lhagao Theng nachunga hung chu ding, chule chungnung pen thanei na in nalekhu ding ahi. Hijeh a chu naosen apeng ding chu atheng hiding chule ama chu Pathen Chapa kiti ding ahi. <sup>36</sup> Ipi aval um ding ham, nasopinu Elizabeth in jong ateh nungin nao avop tai! Mi hon aching'ah ahi atiuvin, hinlah tun chapa khat avop'in lhagup alhingtai. <sup>37</sup> Ajeh chu Pathen ding in ima ahimo aumpoi" ati. ✧ <sup>38</sup> Mary'n adonbut in, "Keima Pakai sohnu kahi, kachunga lhungding nasei jouse hung guilhung hen," ati. Chuti chun vantil chun amanu chu adalhatai.

### *Mary in Elizabeth agavil*

<sup>39</sup> Ni phabep jouvin Mary jong Judea gam thinglang lang, <sup>40</sup> Zechariah chen na khoa chun acheloi chal'in ahi. Amanu insung alut in Elizabeth chu chibai aboh'e. <sup>41</sup> Mary'n chibai aboh gin ajah chun Elizabeth naosen chu a-oisung a chun ahung kichom in, chule Elizabeth chu Lhagao Theng adimset tan ahi. <sup>42</sup> Elizabeth in kipanan ka cheng ahinlon Mary jah'a chun aseitai, "Pathen in numei jouse chung a phatthei naboh ahitai, chule na cha jong anunnom'e. <sup>43</sup> Ipi

---

✧ **1:32** 2 Samuel 7:12,13,16; Isa 9:7 ✧ **1:37** Semtilbu 18:14

jeh'a hibanga jana kachan a ka pakai nu in eihung vil ham? <sup>44</sup> Nei lemna awcheng kajah chun kasunga naocha kipah in ahung kichom'e. <sup>45</sup> Anun nom nahi, ajeh chu Pakaiyin aseichu abol ding ahi ti natahsan e," ati.

### *Mary'n Pathen avahchoi*

<sup>46</sup> Mary'n adonbut in "Kalhagao vin Pakai achoi-an e. <sup>47</sup> Kalhagao eihuhhing pu Pathen chung a iti kipah thanom hitam! <sup>48</sup> Ajeh chu aman asoh numei nu dinmun ave jingin, chule tua pat'a khang jousen nunnom eiti diu ahitai. ✧ <sup>49</sup> Ajeh chu Hatchungnungpa chu atheng ahi, chule aman keima din thil loup'i abol'e <sup>50</sup> Aman ahépina akhang akhang'in ama gingte amusah jinge. <sup>51</sup> Abanthahat chun kichat um tahtah thil abol'e! Aman mikiletsah le hoitho ho athechek ji'e. <sup>52</sup> Leng chapate alaltounau-vakon in aloilhan mi kineosah te adomsang ji'e. ✧ <sup>53</sup> Aman agilkel te thil pha phan avah in chule ahao te khutgoh keovin asoldoh ji'e <sup>54</sup> Aman asoh Israel akithopin khoto ding'in ageldoh'e. <sup>55</sup> ✧ Ajeh chu aman hiche kitepna hi iputeu, Abraham, chule achate dinga asem ahi." ✧ <sup>56</sup> Mary chu Elizabeth koma lhathum tobang aum jouvin a'inlam ah akile tai.

### *John Pen*

<sup>57</sup> Elizabeth chu anaoso phat alhin phat in amanun chapa khat ahingin ahi. <sup>58</sup> Chuleh aheng akom le asopi chengin Pakaiyin akhoto naho

---

✧ **1:48** 1 Samuel 1:11 ✧ **1:52** Job 5:11; 12:19 ✧ **1:55** 1 Samuel 2:1-10 ✧ **1:55** Semtilbu 17:7

ajahdoh phat un, mijouse amanu toh akipah khom cheh tauve. <sup>59</sup> Naosen chu niget alhin in, amaho abon'un cheptansah dingin ahung'un ahi. Amahon apa banga amin Zechariah sahding agouvin, ☆ <sup>60</sup> ahivangin Elizabeth in, “Ahipoi, amin John ahi,” atitai. <sup>61</sup> “Ipi natim?” tin amaho ahung eojah jengun “Na insung uvah hitobang min chu aum khapoi,” atiuve. <sup>62</sup> Hijeh chun naosen min chu apan ipi akisah nom am ti mit-heiyin adongun ahi. <sup>63</sup> Aman lekhasutna pheng athum'in, mijouse lungdong in alhan “Amin John ahi” tin ahinjih e. <sup>64</sup> Chutah chun Zechariah jong ahung paothei tan chule Pathen avahchoi pan tai. <sup>65</sup> Akimvel'a cheng chengse din kichatna alhung tan chule Judea thinglhang gam sungse ah thilsoh umchan chu akithejal soh tai. <sup>66</sup> Chucho thilsoh jajouse chun athilsoh hochu alungin aching geh'un, “Hiche chapang hi ipibep ahungsoh tadem?” atiuvin ahi.

### *Zechariah in gaothu ase*

<sup>67</sup> Chuin apa Zechariah chu Lhagao Theng adimset tan chule hiche gaothu hi aphongdoh in ahi: <sup>68</sup> Vahchoiyun Pakai, Israel Pathen chu; ajehchu aman amite avil'in alhatdoh tai <sup>69</sup> Aman huhhing hattah khat asoh David khailhah a kon in eipeuve. <sup>70</sup> Athemgao thengte henga malaiya akitepna banga <sup>71</sup> Tua eiho igalmitu vakon le eihotbolteu va kona huhdoh a umding ihitauve. <sup>72</sup> Aman ipu ipateu khotonan akitepna thengho ageldoh jingin— <sup>73</sup> Akitepna ipuluyu Abraham koma anakitepna bangtah in <sup>74</sup> i-galmituva

---

☆ **1:59** Thempu Dan 12:3

kon in eihuhdoh uve, Pathen kichatna beihel'a ijen thei nadiuvin <sup>75</sup> Then na le chondihna a ihin laiseuva dingin <sup>76</sup> “Chule kachapa, nangma chungnung pen themgao kiti ding nahi; ajeh chu nangman Pakai lampi semtoh sa nakoi ding ahi. ✧ <sup>77</sup> Nangman amite, achonset nau ngaidam na'a kona huhhingna akimudoh nadiu naseipeh ding ahi. <sup>78</sup> Pathen mikhotona nemheo vanga jingkhovah chu van'a kona eiho chungahung kisukeh go ahitai. <sup>79</sup> Muthim'a touho le thina lim'a touho vah pedinga, chule chamna lampi komu peh dinga ahi,” ati. ✧ <sup>80</sup> John chu ahung khanglen in chule lhagaovin ahung hatdoh in ahi. Chule Israel koma lhangphonga natoh apat kahsen ama gamthip lah dungah aumin ahi.

## 2

### *Jesu pen*

<sup>1</sup> Chuphat lai chun Rome gamvaipo, Augustus chun Rome gamsung pumpia minsut ding thupéh ahin neitan ahi. <sup>2</sup> (Hiche hi minsut amasapen Quirinius Syria gamvaipo ahilai anahi). <sup>3</sup> Mijouse ama ama hung kondoh na khopi ah minsut na a kijihlut dingin akile un ahi. <sup>4</sup> Chule Joseph chu leng David chilhah ahijeh chun, Judea gam Bethlehem, David gollui laiya achenna in'a ache angaitai. Chua chun ama akholjin in Galilee gam Nazareth kho a pat in akipatdoh'e. <sup>5</sup> Aman agolngai Mary chu akipuiyin, amanu chu agaiyah ahi akichen in ahi. <sup>6</sup> Chule chumun a aum laiyn, naoso phat chu ahung lhing tan ahi.



<sup>7</sup> Amanun acha masa, chapa khat ahingin, pon'in phatah in ajal in gan ankong ah alupsah'e, ajeh chu gemun amaho dia onglou anahi.

*Vantilte Jesu pen aphondoh-u*

<sup>8</sup> Chuche jan chun kelngoi chingho loujao anai dungah aum'un, kelngoiho aventup u ahi. <sup>9</sup> Phulou helouvin Pakai vantil khat ahenguvah ahung kilah in, chule Pakai loupina in akimvel'u asalvah soh'e. Amaho akichauvin, <sup>10</sup> ahivangin vantil chun alhamon in, "Kicha hih'un" tin aseiyin "Keiman nangho kipana thupha, mijouse dinga kipana hinso ding kahin pohpeh uve. <sup>11</sup> Huhhingpu, ahi, Messiah chu, Pakai chu tunin David khopi Bethlehem ah apengtai! <sup>12</sup> Chule nanghon hiche melchihna a hi nahetdoh thei diu ahi: Nanghon naosen pon ajol jol'a kitup sel'a kijel, gan ankonga kilupsah nagamu diu ahi," ati. <sup>13</sup> Phulou helouvin vantil chu vanmi janel honpi hon ahinjop'un-van sepai hotoh-Pathen avahchoiyun chule hitin aseiyuve, <sup>14</sup> "Van chungnung pen'a Pathen loupin hen, chule leiset chung Pathen lunglhaina mi ho lah'a cham leng hen," atiuve. <sup>15</sup> Vantilte van lam'a akilephat un kelngoi chingho khat le khat akihouvun, "Bethlehem a cheu hite! Hiche thilsoh ho Pakaiyin eiseipeh uhi gaveuhite," akitiuve. <sup>16</sup> Amaho khosung a chun kinloi tah'in acheuvin Mary le Joseph agamu uvin, chule naosen chu gan ankong a chun analum'e. <sup>17</sup> Ama amuphat uvin kelngoi chinghon thilsoh ho le vantil in naosen chungchanga amaho jah'a aseiho mijouse aseipeh tauvin ahi. <sup>18</sup> Kelngoi chingho

thusei jajouse chu alungdong lseh jeng tauvin,  
<sup>19</sup> ahivangin Mary'n hitiho jouse hi alungsongah  
 akoiyin khatvei vei kom le ahin geldoh ji'e.  
<sup>20</sup> Kelngoi chingho akelngoi hon teu hengah akile  
 kit un, athilmu hou le ajah hou jal'in Pathen  
 aloupisah un chule avahchoi tauve. Vantil in  
 aseipeh'u bang chet in thil asoh'e.

*Jesu sopiten Mose dan ajui-u*

<sup>21</sup> Niget jouvin naosen chu chep atanpeh un  
 amin Jesu asah tauve, hichu vantil in akijil  
 masanga pat'a anaminsah sa ahitai. ✧

*Jesu hou'in a apuiyu*

<sup>22</sup> Chuin kisuhthengna thilto phat alhing tan,  
 Mose dan'in chapang khat apen jouva boldinga  
 angeh dungjuiyin; chuti chun anu le apan  
 Pakai henga pehdoh dingin Jerusalem'a ahin pui  
 lhon'e. <sup>23</sup> Pakai danthu chun hitia hi aseih  
 ahi, "Numei cha masa chu pasal ahia leh, amapa  
 chu Pakai henga kikatdoh ding ahi." ✧ <sup>24</sup> Chuin  
 Pakai danthua kingeh bangtah in kilhaina chu  
 atoh lhon in ahi-vakhu kop khat ahiloule vapal  
 ni hiji ahi. ✧ <sup>25</sup> Chuphat lai chun Jerusalem ah  
 Simeon kiti mikhat anaum'e. Amachu michon-  
 pha le Pathen hou guttah chule Messiah ahunga  
 Israel ahung lhatdoh ding kinem'a ngahjing  
 khat anahi. Lhagao Theng achungah achun,  
<sup>26</sup> chule Pakai Messiah amutokah'a thilou dinga  
 anaseipeh anahi. <sup>27</sup> Hiche ni chun Lhagao  
 chun Houin sungah apuilut in ahi. Chuin  
 Mary le Joseph chun naosen chu Pakai koma

✧ **2:21** Thempu Dan 12:3; Lk 1:31 ✧ **2:23** Potdohbu 13:2,12

✧ **2:24** Thempu Dan 12:6-8

danthua kingeh dungjuiya ahung pehdoh lhon chun, <sup>28</sup> Simeon chu anaum in ahi. Aman naosen chu alan Pathen athangvah in, hitin ati, <sup>29</sup> “Chungnungpen Pakai, tun nasohpa lungmongin thisah tan nakitepna bangin, <sup>30</sup> Keiman nami-huhhingna kamutai, <sup>31</sup> Mijouse dinga nagon chu, <sup>32</sup> Ama hi namtin vaipi henga Pathen phongdoh ding vah chu ahi, chule ama hi nami Israelte loupina chu ahi.” ✧ <sup>33</sup> Jesu nu le pachu ama chungchang thu kisei ho jeh chun alungdong lseh jeng lhon'e. <sup>34</sup> Chuin Simeon in amaho chu phatthei aboh in chule Mary, naosen nu koma chun aseitai, “Hiche chapang hi Israel sunga mi tamtah lhuhna dinga got'a um ahi, ahivanga midang tampi a dinga kipana hiding ahi. Ama hi Pathen'a kona melchih na a hung kisol ahin, hinlah mi tamtah'in adoudal ding ahi. <sup>35</sup> Chuho jeh'a mi tamtah lunggel thuhpen ho kiphongdoh ding ahi. Chule chemjam in nalhagao asutkhah ding ahi.” <sup>36</sup> Themgao khat amin Anna kiti khat jong Houin a chu umah ahi. Amanu chu Phaniel chanu Asher phung'a mi ahin, chule hateh'a teh ahitai. A-inneipu chu akichen lhon kum sagi bep sunga thi ahitai. <sup>37</sup> Chutia chu amanu hin kum somget le li jen meithai hinkho ahin man ahi. Amanun Houin adalha ngai pon, asun ajan in aum jingin, an-ngol le taona pumin Pathen ahoujinge. <sup>38</sup> Simeon chun Mary le Joseph koma thu aseilai chun amanu jong ahungin Pathen avahchoi pantai. Chapang chungchang thudol Pathen in Jerusalem ahuhdoh nadinga gingcha

---

✧ **2:32** Isa 42:6; 49:6; 52:10

tah'a ngah jing ho jouse komah aseiyin ahi.

*Nazareth khoa Jesu ahung kile kit*

<sup>39</sup> Jesu nu le pan Pakai danthu dungjuiya boldinga lom cheng abulhit soh lhon phat in, a-in'u Galilee gam Nazereth kho ah akile tauve. ☆ <sup>40</sup> Chumun a chun chapangpa chu tahsa damthei tah le hattah in ahung khanglen in ahi. Amachu chihna adimset in chule Pathen khotona achungah aume. Jerusalem Hou'in a Jesu <sup>41</sup> Kumseh le Jesu nu le pa Kalchuh Kut mang'in acheji lhonin ahi. ☆ <sup>42</sup> Jesu kum somleni alhin chun angaima bangin hiche kut mang ding chun acheuve. <sup>43</sup> Kut kichaiyin inlang Nazereth a kile din akipan tauvin, ahin Jesu chu Jerusalem ah aumden tan ahi. Anu le apan atil'in hichu ahedoh lhon pon, <sup>44</sup> ajeh chu kholjin dang hotoh kilhon khom dan a angaito lhon ahi. Ahivangin ama chuche nilhah'a ahung kilulah loubeh phat in asopi aheng akom le aloi agol ho komah aga vele lhontai. <sup>45</sup> Amulhon loubeh phat in Jerusalem lamah ama holdin akile kit lhon tai. <sup>46</sup> Nithum jouvin achainakeiyin Houin sungah agamudoh lhonin, houhil ho lah a atouva, athuseiyu angaiya, chule thudoh anei chu amudoh lhon tai. <sup>47</sup> Ama thusei jajouse chun athuhet le athudoh donbut ho chu adatmah lkeh jeng tauve. <sup>48</sup> Anu le apan ima lunggel je jong ahelhon tapoi. Chuin anun ahinseiyin, "Chapa," ipijeh'a hiche hi keini koma nabol ham? Napa le keiman munjouse kahol lhon'a lunggim a kahilhon tai, ati. <sup>49</sup> "Ahivanga ipijeh'a neihol

☆ **2:39** Matt 2:23 ☆ **2:41** Potdohbu 12:1-27; Danbu Ni Na 16:1-8

khoh u ngai ham?” tin adongin, “Nahet lou u ham kapa in'a kaum ding mong ahi hi?” tin adonge. <sup>50</sup> Ahivangin ipi aseina ahi ahedoh lhon pon ahi. <sup>51</sup> Chuin amaho chutoh Nazareth lam'a a-kile un chuva chun anu apa thunoiya aumtai. Chule anun hitiho jouse hi alunghimah aguh'in avop jing in ahi. <sup>52</sup> Jesu chu chihna le atahsa in akhangin chule Pathen le mihem deisah na in aumtan ahi. ✧

### 3

#### *Twilutsah John in lhang asap*

<sup>1</sup> Rome gamvaipo Tiberius vaipoh kal kum somlenga lhin kum ahitan, Pontus Pilate chu Judea gamvaipo ahin; Herod Antipas chu Galilee gam vaipo ahin; asopipa Philip chu Iturea le Traconitus gamsungsea vaipo ahin; Lysanias chu Abilene gam vaipo ahi. <sup>2</sup> Annas le Caiaphas chu thempu chungnung anahilhone. Hiche phat lai hin Pathen a konin gamthip lah'a um, Zechariah chapa John hengah thu ahung lhungin ahi. <sup>3</sup> Chuin John chu amun amun'ah Jordan vadung pang langto gel'ah achen, mihon alungheiyu vetsahna a baptize achan nadiuvin thu ahil lhang len chule Pathen henga ngaidam chan nadia akilehei diuvin aseiyu. <sup>4</sup> Isaiah chun John chungchang thu anaseiyin hitin ati, “Ama hi gamthip'a khosam aw ahi, Pakai hungna ding alampi semtoh un! Ama dingin lampi sutheng un, ✧ <sup>5</sup> Phaicham lah kidip ding, chule molboh ho le thinglhang lah kinot cham ding

akon ho kisujang ding, chule mun phol lah ho kisunam ding, <sup>6</sup> Chuteng leh mijousen amuding, huhhingna Pathen'a kon hung kisol chu," ati. <sup>7</sup> Mihonpi chu John henga baptize chang dinga ahung uchun, aman hitin aseiyee, "Nangho gulse son ho! Koiham Pathen lunghan na hunglung dinga kon jamdoh dinga nagihsal uvah? ✧ <sup>8</sup> Chonset'a kon lung naheiyule Pathen lam a nakile'u chu nahin dan uva konin tahlang'un. Nanghon khat le khat komah, 'Bitna kanei nauve, ajehchu Abraham son kahiue' tin moh sei hih un. Hichu imacha ahipoi, ajehchu kaseipeh nahiue, Pathen in hiche song hoa kona jong Abraham son le pah asemboh thei ahi. ✧ <sup>9</sup> Tu jenga jong Pathen thutanna heicha gottupsa, thingphung ajungbo tutan dinga phasadem'a um ahitai. Henge, thingphung aga phalou jouse chu phuhlguh'a uma meilah'a selut hiding ahi." ati. ✧ <sup>10</sup> Mihonpi chun adong'un, "Ipi kabol diu hitam?" atiuve. <sup>11</sup> John in adonbut in, "Sangkhol ni neiyin, khat chu avaicha ho peuvin. An neh ding neiyin agilkel te jong hoppeh in," ati. <sup>12</sup> Lepthol'a natong kaidong ho jong baptize chang din ahung un chule adong'un, "Houhil, ipi kaboldiu hitam?" atiuve. ✧ <sup>13</sup> Aman adonbut in, "Gamsung kivaipohna in angeh kalval in kai dong hih'un," atipeh'e. <sup>14</sup> "Ipi kabol diu hitam" tin sepai phabep khat in jong ahung dongun ahi. John in adonbut in, "Alamlouvin sum kilah hih'un ahiloule adihlouvin mi hehset bol hih'un, chule na losan'a chun lung lhaiyun," ati. <sup>15</sup> Mijousen Messiah chu

✧ 3:7 Matt 12:34; 23:33

✧ 3:8 Jn 8:33

✧ 3:9 Matt 7:19

✧ 3:12 Lk 7:29

hungvah dinga aginchat cheh u anahin, chule John chu Messiah chu hingap hitam ti ahetnom ten'un ahi. <sup>16</sup> John in athudoh uchu adonbut in hitin aseiyee: “Keiman nangho twiya baptize kachansah nahiuvn, hinlah keima sanga lenjo khat ahunge–nasatah a lenjo ahidan chu keima asoh hiding le akengchot khao sutlham dingin jong kalhing joupon ahi. Amachun nangho Lhagao Theng le meiya baptize nachan sah ding'u ahi. <sup>17</sup> Ama phol jap-ngimna mangcha a changsi le atah lhekhken dinga phasadem'a um ahitai. Chuteng aman changchilna phol asuhthenga changtah chengse chu achangsal'a asun'a asi ho vang chu mit theilou meilhum sunga aselut ding ahi,” ati. <sup>18</sup> John chun kipana thupha miho koma aseiphong na achun chutobang gihsalna kamcheng jong amangchan ahi. <sup>19</sup> John in jong lhangphong tah in Galilee gam vaihompaa, Herod Antipas chu, Herodius, asopipa jinu, akichenpi jeh le athilse bol adang tamtah jeh chun demna aneyin ahi. ✧ <sup>20</sup> Hiejeh chun Herod in John chu songkul'ah akhum'in, achonsetna dangtoh hiche hi akibelap tan ahi.

### *Jesu twilut*

<sup>21</sup> Nikhat mihonpi chu baptize achan laiyn, Jesu amatah jong baptize achingin ahi. Ama atao leh vanho ahung kihongin, <sup>22</sup> chule Lhagao Theng, tahsa lim pu'in van vakhu bangin ahung kumsuh in achunga chun achu'e. Van'a kon chun aw khat'in hitin ahinseyee, “Nangma kangailut

---

✧ **3:19** Matt 14:3,4; Mk 6:17,18

tah kachapa nahi, chule kipana lentah neihin pohpeh'e," ati. ✧

*Jesu penna khanggui*

<sup>23</sup> Jesu chu kum somthum alhingtai, aman japi lah'a natoh ahinpat chun. Jesu chu Joseph chapa tin akihen ahi. Joseph chu Heli chapa ahi. <sup>24</sup> Heli chu Matthat chapa ahi. Matthat chu Levi chapa ahi. Levi chu Melki chapa ahi. Melki chu Jannai chapa ahi. Jannai chu Joseph chapa ahi. <sup>25</sup> Joseph chu Mattathias chapa ahi. Mattathias chu Amos chapa ahi. Amos chu Nahum chapa ahi. Nahum chu Esli chapa ahi. Esli chu Naggai chapa ahi. <sup>26</sup> Naggai chu Maath chapa ahi. Maath chu Mattathias chapa ahi. Mattathias chu Semein chapa ahi. Semein chu Josech chapa ahi. Josech chu Joda chapa ahi. <sup>27</sup> Joda chu Joanan chapa ahi. Joanan chu Rhesa chapa ahi. Rhesa chu Zerubbabel chapa ahi. Zerubbabel chu Shealtiel chapa ahi. Shealtiel chu Neri chapa ahi. <sup>28</sup> Neri chu Melki chapa ahi. Melki chu Addi chapa ahi. Addi chu Cosam chapa ahi. Cosam chu Elmadam chapa ahi. Elmadam chu Er chapa ahi. <sup>29</sup> Er chu Joshua chapa ahi. Joshua chu Eliezar chapa ahi. Eliezar chu Jorim chapa ahi. Jorim chu Matthat chapa ahi. Matthat chu Levi chapa ahi. <sup>30</sup> Levi chu Simeon chapa ahi. Simeon chu Judah chapa ahi. Judah chu Joseph chapa ahi. Joseph chu Jonam chapa ahi. Jonam chu Eliakim chapa ahi. <sup>31</sup> Eliakim chu Melea chapa ahi. Melea chu Menna chapa ahi.

---

✧ **3:22** Semtilbu 22:2; Labu 2:7; Isa 42:1; Matt 3:17; Mk 1:11; Lk 9:35



Menna chu Mattatha chapa ahi. Mattatha chu Nathan chapa ahi. Nathan chu David chapa ahi. <sup>32</sup> David chu Jesse chapa ahi. Jesse chu Obed chapa ahi. Obed chu Boaz chapa ahi. Boaz chu Salmon chapa ahi. Salmon chu Nahshon chapa ahi. <sup>33</sup> Nahshon chu Aminnadab chapa ahi. Aminnadab chu Admin chapa ahi. Admin chu Arni chapa ahi. Arni chu Hezron chapa ahi. Hezron chu Perez chapa ahi. Perez chu Judah chapa ahi. <sup>34</sup> Judah chu Jacob chapa ahi. Jacob chu Isaac chapa ahi. Isaac chu Abraham chapa ahi. Abraham chu Terah chapa ahi. Terah chu Nahor chapa ahi. <sup>35</sup> Nahor chu Serug chapa ahi. Serug chu Reu chapa ahi. Reu chu Peleg chapa ahi. Peleg chu Eber chapa ahi. Eber chu Shelah chapa ahi. <sup>36</sup> Shelah chu Cainan chapa ahi. Cainan chu Arphaxad chapa ahi. Arphaxad chu Shem chapa ahi. Shem chu Noah chapa ahi. Noah chu Lamech chapa ahi. <sup>37</sup> Lamech chu Methuselah chapa ahi. Methuselah chu Enoch chapa ahi. Enoch chu Jared chapa ahi. Jared chu Mahalalel chapa ahi. Mahalalel chu Kenan chapa ahi. <sup>38</sup> Kenan chu Enosh chapa ahi. Enosh chu Seth chapa ahi. Seth chu Adam chapa ahi. Adam chu Pathen chapa ahi.

## 4

### *Jesun lhepna ato*

<sup>1</sup> Chuin Jesu, Lhagao Theng dimset pumin, Jordan vadunga kon in akile tan ahi. Ama chu gamthip'a din Lhagao puidoh in aumin,  
<sup>2</sup> hichea chun diabol lhep patep'in ni somli

sung aume. Jesun hiche phat sungse chun ima anepon chule gilkel lheh jengah ahitai. <sup>3</sup> Chuin diabol chun ahengah ahinseyin, “Nangma Pathen chapa nahile hiche songhi changlhah pheng akiso nadin seiyn,” ati. <sup>4</sup> Ahin Jesun aseipeh in, “Ahipoi! Pathen Lekhabun mihem changlhah bouseh'a hinglou ding ahi” ati. ✧ <sup>5</sup> Chuin diabol chun apuitouvin, phat chomkhat kah sung in vannotiya lenggam ho avetsah soh keyin ahi. <sup>6</sup> “Hiche lenggam ho loupina le achunguva thuneina nangma kapeh ding nahi,” tin diabol chun aseiyin, “Ajehchu aboncha keyia ahin kapeh nom nom kapeh thei ahi. <sup>7</sup> Aboncha nangma kapeh ding nahi nangman keima nei hou leh,” tin aseitai. <sup>8</sup> Jesun adonbut in, “Pathen Lekhabun hitin aseieye, ‘Nangman Pakai na Pathen bouseh nahou ding, ama kin jeng bou nabol ding ahi’” atipeh tai. ✧ <sup>9</sup> Chuin diabol chun Jerusalem houin tingvum ah apuiyin chule aseitai, “Pathen Chapa nahile chomlhan! <sup>10</sup> Ajehchu Pathen Lekhabun hitin aseieye, Aman avantilte navengtup ding le nahoidam dingin thupeh hin neiyin te. ✧ <sup>11</sup> Chule amahon akhut uvin natuh intin, chutia chu nangman nakengpah jengjong song chungu naki sukhah lou ding ahi,” ati. <sup>12</sup> Jesun adonbut in, “Pathen Lekhabun hitin jong aseikit'e, Nangman Pakai na Pathen napatep lou ding ahi” ati. ✧ <sup>13</sup> Diabol chun Jesu alhep patep jou phat in, phat gomkom umkit kah a din adalhatai.

---

✧ **4:4** Danbu Ni Na 8:3 ✧ **4:8** Danbu Ni Na 6:13 ✧ **4:10** Labu 91:11,12 ✧ **4:12** Danbu Ni Na 6:16

*Jesun Galilee gam'a Pathen natos apat*

<sup>14</sup> Chuin Jesu Galilee langah Lhagao Theng thahatna dimset pumin akiletai. Ama chungchang thulhut ho agamkai pumpi ah gangtah'in akithetal soh tai. <sup>15</sup> Akikhopnau in tin'ah thu ahil jin mijousen apahcha lleh'e.

*Nazareth khoa Jesu kisang talou*

<sup>16</sup> Ama Narareth kho, ahung seilet na khoa ahung chun, abolngai jing bangin Sabbath nin akikhopnau in'ah alut in Pathen Lekhabu sim dingin adingdoh in ahi. <sup>17</sup> Isaiah themgao lekhajol chu apeuvin ahi. Aman lekhajol chu alhamlan hitia kijihna mun chu amudoh tai: <sup>18</sup> “Pakai Lhagao kachungah aume, ajehchu mi-vaicha ho dinga kipana thupha podingin thao einui, Aman sohchang ho akilhadoh diu thu phongjal din eisole—mitchon kho amuding, Suhnem a umho kijalen sah ding ahive. ✧ <sup>19</sup> Chuleh Pakai khotona phat ahunglung tai,” kiti lai chu asimdohtai. <sup>20</sup> Lekhajol chu anungjel in, lhachale pa khut'ah anungpeh in, atoutai. Kikhopna in'a mijousen ama chu mit-lhalouvin aveuvin, <sup>21</sup> chuin aman amaho jah'a thu aseipan tai. “Pathen Lekhabua kisun tua najah'u chu tuni tah hin aguiling tai!” ati. <sup>22</sup> Mijousen aseipalheh jengun chule akamsunga kona aphon- dloh lungsetna thuho chu kidang asauvin ahi. “Hiche hi iti ham?” tin amahon adongun, “Hiche hi Joseph chapa hilou ham?” ative. <sup>23</sup> Chuin aman aseiyin, “Nanghon lung opkai loubeh'a hiche thuchih hi nei seikhum teidiu ahi: Louthem,

---

✧ 4:18 Isa 61:1,2

nangma kisudam in-aledohna, ‘Capernaum a nabol tobang thil kidang ho chu hilai nakhomun'a jong bol'in’ ” tiuvin nate. <sup>24</sup> Ahivanga thutah chu kaseipeh nahiuve, themgao koima ama gamsungah min apom ngaipoi. ☆ <sup>25</sup> “Tahbeh in Elijah phat laiyn Israel gamsungah ngaichat khohtah nei meithai tamtah anaume, vankot kum thumle akeh akikha'a gamsunga kel nasatah analhun chun. ☆ <sup>26</sup> Ahivangin Elijah chu koima komah ana kisol poi. Gamchom mi kom joh'a sol anahi–Sidon gam'a Zarephath khoa meithai nu kom. ☆ <sup>27</sup> Chule themgao Elisha phat laiyn jong Israel gamsungah mipah tampi ana um'in, ahivangin Syria mi Naaman bouseh suhdamin anaume,” ati. ☆ <sup>28</sup> Hiche thu ajah phat un, kikhopna in'a umho chu alunghang tauvin ahi. <sup>29</sup> Achomdoh un, aman'un akhochen nau kol mong lama chun apui tauve. Hiche kol'a chu sotlhah ding atiu ahi, <sup>30</sup> ahivangin akikah lah uva akihehdoh in akiva mang tai.

### *Lhagaoboh voppa*

<sup>31</sup> Chuin Jesu Capernaum kiti Galilee gam kho khat'ah achen, chukom mun'a chun choldo nikho seh le akikhopnau in'a chun thu ahil ji'e. <sup>32</sup> Hikom'a jong chun mihon athuhil chu kidang asalheh'un ahi, ajeh chu aman thuneitah'a aseijeh ahi. ☆ <sup>33</sup> Khatvei akikhopnau in'a aumpet in, thilhavop khat–lhagao boh'in avop khat–Jesu henga chun ahung pengjah jengin, <sup>34</sup> “Che mangin! Ipijeh'a kalah'uva hung kikumlut nahim,

---

☆ **4:24** Jn 4:44 ☆ **4:25** 1 Lgt 17:1 ☆ **4:26** 1 Lgt 17:8-16 ☆ **4:27**  
 2 Lenge 5:1-14 ☆ **4:32** Matt 7:28,29

Nazereth Jesu? Keiho sumang dinga hung'ah nahim? Keiman nangma koi nahi kahenai-Pathen Mithengpa!" atin ahi. <sup>35</sup> Jesun athusei alatan in, "Thip'in! hiche mipa'a kon chun hung potdoh'in," tin thupeh aneitan ahi. Chutah chun thilha chun mipa chu lhonglaiyah ahin seplhun, mihonpin avetjing laichun; chuin ama'a kon chun ima borsebe talouvin ahung potdoh tan ahi. <sup>36</sup> Kidang san mipi ho chun aphongdoh un, "Ipi thuneina le thilboltheina hiche mipa hin anei hitam! Lhagao boh jeng jong athun anungin, athupeh'a kon in ajam uve!" atiuvin ahi. <sup>37</sup> Chucho gamkai pumpi a chun Jesu thu chu khotin'ah akithang tan ahi.

*Jesun Peter nupanu adamsah*

<sup>38</sup> Chucho nikhoa akikhopnau in adalah jouvin, Jesu Simon in'ah achen, hikom'a chun Simon nupanu khosihpi jeh'a nasatah a dammo agatoh khan ahi. "Lungset'in sudam teiyin," tin mijousen athum tauve. <sup>39</sup> A-jalkhun komah adingin, akhosih chu aphoh thip tan ahileh akhosih chun amanu adalhatai. Chuin amanu athoudoh pai ngallin amaho ding anneh sem in apangtai.

*Nilhah a Jesun mi tamtah adamsah*

<sup>40</sup> Nisa alhum toh lhon'in, chucho nilhah chun, khosung pumpia a-insungmi damlou neiho sen Jesu hengah ahin puiyun ahi. Itobang natna hijong leh akhut'in atohkhah chan chu suhdamin aum tauve. <sup>41</sup> Mi tamtah chu thilhavop ahiuvin; chule thilha ho chu athupeh'a kon in ahung potdoh'un, apengjah un, "Nangma Pathen Chapa

nahi,” atiuvin ahi. Ahivangin ama Messiah ahi ahethjeh'u chun, aman amaho chu aphohthip in thu aseidoh sah tapoi.

*Thuseiphong dinga Jesu kipatdoh*

<sup>42</sup> Ajing jingkah matah in Jesu munthip lah khat ah achedoh tan ahi. Mihonpi chun amachu muntin aholle un, achaina kheh a amu phat uvin, aman amaho adalah nalou diuvin atao tauve. <sup>43</sup> Ahivangin aman adonbut in, “Keiman Pathen Lenggam Kipana Thuphahi khodang'a jong kaseiphong ding ahi, ajeh chu hiche dinga chu eikisol ahi,” ati. <sup>44</sup> Chuti chun akholjin abanjop'in, Judea gam pumpia akikhopnau in tin'ah thu ahillhang len ahi.

## 5

*Nga tamtah amatsah chule seijui masaho akou*

<sup>1</sup> Nikhat Jesun Galilee dillen panga thu aseilaiyin, mihonpi tamtah'in Pathen thu ngainom na jal'in aneh chinto tauvin ahi. ✧ <sup>2</sup> Kong ni akeuva tuipi pamchin'a akingah amudoh tan, ajehchu ngaman mi ho chun adalah uva alen'u akisop u ahi. <sup>3</sup> Kong khatpa sunga chun alut in, kong neipa Simon jah'a Jesun twi lah'a asot lut dingin aseiyee. Hijeh chun kong sunga chun atouvin, mihonpi chu chua kon in thu ahil'in ahi. <sup>4</sup> Thu aseijouvin Simon jah'a, “Tun chen, lithuh langjep ah, nalen chu seplhan, nga themkhat manding in,” ati. <sup>5</sup> “Pipu” tin Simon in ahin donbut in, “Jankhovah hel'a habol'a kabol u ahin

---

✧ 5:1 Matt 13:1,2; Mk 3:9,10; 4:1

chule ima manlou kahiue. Hinlah nangman nasei ahileh len seplha kit inge,” ati. ✧ <sup>6</sup> Tu vang'in alen'u nga adimset in akehlha pan tai! ✧ <sup>7</sup> Kithopi angeh nauva konin akivoppi hou kong dang khat'ah ahung un, chule chomlou kah'in kong teni chu anigel'in nga adimset in alhalut paiding ahilhon tai. <sup>8</sup> Simon Peter in thilsoh ho amuchet phat in Jesu masangah adilsun chule aseitai, “Oh Pakai, lungset in neidalhan-keima navel'a um ding'in kachonse behseh jenge,” ati. <sup>9</sup> Ijeh inem itile nga chujat amat jeng uchu kidang asah val ahi, adangho jong chutima chu ahiue. <sup>10</sup> Akiloipi teu, James le John, Zebedee chapateni jong chun kidang asalhon'e. Jesun Simon adonbut'in, “Kicha hih'in! tua pat'a miman joh'a napan ding ahitai,” ati. <sup>11</sup> Chule tolgo lah alhun lhun uchun, amahon thil jouse adalhauvin Jesu nung ajuu tauve.

*Jesun mipah khat adamsah*

<sup>12</sup> Khokhat a hin Jesun phat sottah phah nat a dammo khat amui. Hiche mipa chun Jesu amu chun amai tol'a asulut in adamsah din athum'e. “Pakai” tin aseiyin, “Nalung ahileh nei sudam theiyin chule nei sutheng theiye,” ati. <sup>13</sup> Jesun akhut alhangin atham'in, “Kalung ahi” tin aseiyin, “Damin!” ati. Chupet tah chun phahnat na chu abeihel tai. <sup>14</sup> Chuin Jesun amapa chu koima jah'a thilsoh ho aseipeh louna din ahilchah tai. Aman aseipeh in, “Thempupa koma chen chule aman na vechil hen. Mose dan'in angeh dungjuiya atiphah nat kiboldam

peh hon apeh dinga lom ho kichoiyin. Hiche hi japi lah'a suhthenga naum phondohna ahi," ati. ✧ <sup>15</sup> Jesun chutia ahilchah jeng vang chun, athilbol theina thuho gangjep joh'in thejal ahin, chule mihonpi tamtah athusei ngai ding le anatnau damsah nomna jeh'in ahung uve. <sup>16</sup> Ahin Jesu ataodin gamthip lah'a achemang jin ahi. Jesun Langthi Khat Adamsah <sup>17</sup> Nikhat Jesun thu ahil laiyn, Pharisee phabep khat le hou dan thuhil ho ama kom naina ah atou uve. (Hiche miho hi Galilee le Judea chule Jerusalem gam pumpi khotin'a hungdoh hiuleh akilom'e). Chule Pakai misuhdam na thilboltheina chu Jesu komah hatah in aumin ahi. <sup>18</sup> Miphabep khat in elbai nakong khat alupna pumin ahin pouvin ahung uve. Insunga Jesu kom pohlut tei agouvin, <sup>19</sup> hinlah mihonpi jeh chun aphajou tapouve. Hijeh chun inchungah akaldoh un inting aphelhauvin, chuin amahon adamloupa chu alupna pheh pumin mihonpi lah Jesu maikoh laitah achun ahin khaisuh uve. <sup>20</sup> Atahsan jeu amuchun Jesun mipa koma chun aseitai, "Gollhang, nachonset akingaidam tai" atipeh e. <sup>21</sup> Ahivangin Pharisee hole hou danthuhil hochu amaho le amaho akihouvun, "Amahi koiya kigel ham? Pathen taitom ahi! Pathen bouseh in chonset angaidam thei ahi," atitauve. <sup>22</sup> Jesun ipi agel'u ahen, hijeh chun amaho chu adongin, "Ipi jeh'a nalungsung uva hiche hi nadoh uham? <sup>23</sup> Hoiche joh seidinga baijo em 'Nachonset kingaidam ahitai' kiti le 'dingin lang lamjot tan' tihi?" ati. <sup>24</sup> "Hijeh a chu keiman Mihem Chapan leiset

---

✧ **5:14** Thempu Dan 14:1-32



ah chonset ngaidam na tha aneiye ti kavetsah ding nahiue,” ati. Chuin Jesun elbai nakong pa lam ngan akiheiyin aseitai, “Dingin, nalupna pheh kilahdoh in lang, inlam'ah chetan,” ati. <sup>25</sup> Chuin gangtah in, mihon avetjing layin, mipa chu ahung chomdoh in, alupna akilahdoh in, chule inlam Pathen thangvah pumin achetai. <sup>26</sup> Mijouse chu lungdon nale tijatnan alodim un, chule Pathen avahchoiyun, “Tunin thil kidang ho kamu uve,” tin aphongdoh uve.

### *Jesun Levi akou*

<sup>27</sup> Phat chomkhat jouvin, Jesun khopi adalhah le, kaidong khat amin Levi kiti akaidon na mu-nah amun, “Neijuiyin lang ka seijui hin” tin Jesun aseitai. <sup>28</sup> Hiti chun Levi jong akipatdoh in, thil jouse adalhan ama ajuitai. <sup>29</sup> Chujouvin Levin a'in ah Jesu jin-ja-um hinan an-nekhom abol in ahi. Levi tohkhompi kaidong tampi le maljin dang in jong an anekhom uve. <sup>30</sup> Ahivangin Pharisee hole ahou danthuhil houvin Jesu seijui ho hengah aphunchel uvin, “Ipi dinga khutobang aboh hotoh naneh uva nadonkhom uham?” atiuvin ahi. ✧ <sup>31</sup> Jesun adonbut in, “Midamthei ten louthem angaicha pouve–adamlouten vang angaichauve. <sup>32</sup> Keima achonpha'a kigel ho kouva hung kahipoi, amavang chonse ahi kihetdoh'a lunghei dingho kouva hung'ah kahibouve” ati.

### *An-ngol thudol'a Jesu thudoh aneiyyu*

<sup>33</sup> Nikhat miphabep in Jesu jah'a, “Tuilutsah John seijui hon an angol'un atao jom jing un, chule Pharisee ho seijui honjong chutima chun

---

✧ 5:30 Lk 15:1,2

aboluve. Ipi jeh a nangma seijui hon phatseh'a aneh uva adon jing jengu hitam?" tin aseiyun ahi. <sup>34</sup> Jesun adonbut in, "Moupui golvahna a maljin hon moulang toh mou aloplaiyuva an angol ngaiyum? Tahbeh in achutipoi. <sup>35</sup> Amavang moulang chu nikhat amahoa kona kilamang ding ahi, chuteng tah le amahon an angol diu ahi." ati. <sup>36</sup> Chuin Jesun hiche thutekah hi apen ahi: "Koiman ponhal vonthah'a konin achepphan chule vonlui behnan aneipoi. Ijeh inem itileh vonthah chu seding ahitai, chule hiche vonthah hal chu vonlui chutoh kijot lou ding ahi." <sup>37</sup> "Chuleh koiman lengpitwi thah peng luyiah akhum ngaipoi. Ijeh inem itile lengpitwi thah chun savun peng chu aphutjah ding, lengpitwi chu kisujah ding chule peng chu kisuse ding ahi. <sup>38</sup> Lengpitwi thah chu savun peng thah a khum ding ahi. <sup>39</sup> Ahin koima lengpitwi lui don'in athah chu adeiji tapoi. 'Aluipa ma aphajenge' atijiuve," tin aseiyu. Jesu Seijuihon Cholngah Nikhoa Changvui Asiu

## 6

<sup>1</sup> Cholngahni khat Jesun bulei lai ajot lai hin, aseijui ten changvui asihtan un, akhut uvah anoiyun, chang chu aneuvin ahi. ✧ <sup>2</sup> Ahivangin Pharisee ho phabep in, "Ipi jeh'a nanghon dan nasuhkeh uva Cholngah nia bolngailou changga nalollah uham?" atiuve. <sup>3</sup> Jesun adonbut in, "Pathen Lekhabua kisun David le aloiten agilkel pettah uva ipi anabol'u nasimdoh khah lou u

---

✧ **6:1** Danbu Ni Na 23:25

ham? <sup>4</sup> ✧ Ama Pathen in'a alut'in, dan asukeh in, thempu ho bouseh in aneithe changlhah theng chu anen ahi. Akiloipi ho jong phabep khat apen ahi." ati. ✧ <sup>5</sup> Chule Jesun aseiben, "Mihem Chapa hi Cholngah ni chung jenga jong pakai ahi" ati. Jesun Khut-Jetlang Ngoi Pasal Khat Adamsah <sup>6</sup> Cholngah nikho dang khat a Jesun kikhopna in'a thu ahil laiyyin mikhat akhut jetlang ngoi khat aumin ahi. <sup>7</sup> Hou danthuhil ho le Pharisee hon Jesu chu avelhi keuvun ahi. Hichepa chu asuhdam poupouleh Cholngah nin na atonge tia ngohna neiding atiu ahi. <sup>8</sup> Ahivangin Jesun alunggel'u ahen ahi. Akhut ngoipa jah'a chun, "Hungin lang mijouse masangah hung ding tem'in," tin akou tai. Hijehchun mipa jong chu malangah ahungin ahi. <sup>9</sup> Chuin Jesun anelkal ho jah'a, "Ken nangho thudoh khat kaneiye. Danthun Cholngah nia thilphabol apha'am, ahilouleh thilse bolnading nikho ham? Hiche nikho hi hinkho huhhing nading nikho hai ahiloule suhset nading nikho ham?" ati. <sup>10</sup> Aman amaho chu khat khat in ahin golvet vet in chule mipa jah'a chun aseitai, "Nakhut lhangdoh in" ati. Chutichun mipa chun akhut alhangdoh in ahile thahsemphat ahitai. <sup>11</sup> Hiche a hin Jesu galmi ho chu alunghang un amachu ilo ding ham ti akihoukhom tauve. Jesun Seijui Ding Som Le Ni Alhendoh <sup>12</sup> Nikhat hitiho jou sotloulaiyyin Jesu molchung khat ah taona mang din achetouvin, chule jankhovah in Pathen hengah ataove. <sup>13</sup> Ajing khovah in aseijuite jouse

---

✧ 6:4 1 Samuel 21:1-6 ✧ 6:4 Thempu Dan 24:9

akoukhom soh keiyin amaho lah achun solchah dingin somleni alhengdoh in ahi. Amin hou chu hiche ahi: <sup>14</sup> Simon (Peter asah), Andrew (Peter sopipa), James, John, Philip, Bartholomew <sup>15</sup> Matthew, Thomas, James (Alphaeus chapa), Simon (Zealot tia kikou), <sup>16</sup> Judas (James chapa), chule Judas Iscariot (khonunga ajohdohpa) ahi-uve. Jesun Mi Tamtah Na-Atoh Peh <sup>17</sup> Molchunga pat amaho ahungsuh uchun aseijui ho Jesu toh, mun beh achamlai len khat ah adingun, anungjui tamtah chule mihonpi chun aumkimvel uve. Hichea chun mipi Judea gam pumpi le Jerusalem a kon chule sahlam Tyre le Sidon gam twipang langa pat'a hung jong aumun ahi. <sup>18</sup> Amaho chu ama thusei ngai ding le anat nahou kijendam sah dinga hungu ahi; chule lhagao boh in asuh genthei hojong jendam in aumuve. <sup>19</sup> Mijousen ama chu tohkah agochek un ahi ajek chu suhdam na thaneina chu ama a kona potdoh ahi, chule mijouse asudam in ahi.

*Jesun phattheina chule dana thudol ahil*

<sup>20</sup> Chuin Jesun aseijuite henglam ngan aseitai “Avaichate Pathen in phatthei naboh uhen, Ijek inem itile Pathen Lenggam chu nanghoa ahi. <sup>21</sup> Tua gilkel te Pathen in phatthei naboh uhen, ijek inem itile lungnachima naum diu ahi. Tua kap te Pathen in phatthei naboh uhen, ijek inem itile phat khat le nanui diu ahi” <sup>22</sup> Phattheinan nangah uve, Mihem Chapa najui jek uva mihon namuda uva napampai uva nataitom uva chule aphilouva nagaosap teng uleh. ☆ <sup>23</sup> Hichu aso

teng leh kipah un! Henge, kipah'in kichom un! Ijeh inem itile tohphatman lentah in Van-gam ah nangah uve. Chule geldoh jingun, apu apateu chun khanglui lai themgao hojong chutobang chun anabol uve. ☆ <sup>24</sup> Ipi lungkham nan nangau hitam nangho ahaote ho, ijeh inem itile nakipanau chu tua bou naneiyu ahitai. <sup>25</sup> Ipi lungkham nan nangau hitam nangho tua thaochet'a uma ninglhing te, ijeh inem itile gilkelna nasatah phat khat in nangah jing uve. Ipi lungkham nan nangau hitam tua nui te, ijeh inem itile nanui nau chu kana le lunghem na kisoah ding ahi. <sup>26</sup> Ipi lungkham nan nangau hitam nangho japin apachat ho, ijeh inem itile apu apateu jong chun themgao lhem ho ana pachat u anahi. Melma Chunga Lungsetna Nei Ding <sup>27</sup> "Ahin, nangho thu ngainom ho, keiman kasei ahi, nagalmi teu ngailu'ugin! Namuda teu hengah thilpha bol'un." <sup>28</sup> Nasamse teu phatthei boh un. Nasukha teu dingin taovun. <sup>29</sup> Mi khattou vin nabengphe langkhat abeh le, nabeng langkhat jong do peh in. Khattouvin na ponlen alah got leh na sangkhol jong peh than. <sup>30</sup> Athum chan chu pein; chule nathil nanga kona akilahdoh teng leh, nunglah ding gohah in. <sup>31</sup> Min nang nabol nadinga nadei dan bang bangin midang komah bol'in. ☆ <sup>32</sup> Nangman nangailu ho bou nangailut le, ipi jeh'a nakithang at ding ham? Michonse ten jong angailuteu angailut u ahi! <sup>33</sup> Chuleh nachunga thilpha bol ho kom bouseh a thilpha nabol leh, ipijeh a nakithang at ding

---

☆ **6:23** 2 Thusimbu 36:16; Act 7:52 ☆ **6:31** Matt 7:12

ham? Michonse ten jong hichan chu abol'u ahi!  
<sup>34</sup> Chuleh nangman nahin sajou ding hokom'a bou sum naphal leh, ipi jeh a nang kithang-at ding nahim? Michonse ten jong michonse te kom ma'a abon'a nungmu dinga apha thei ahi. <sup>35</sup> “Nagalmiteu ngailu uvin! Amaho komah thilpha bol'un. Nungmu ding kinem louvin phal'un. Chuteng van'a kon natohphat man'u chu len ding ahi, chule Chungnung pen chate umchan tahtah natho diu ahi, ajeh chu ama hi kipaje helou hole migilou ho dinga pha ahi. <sup>36</sup> Napau mikhoto them ahi banga nangho jong khoto them nahi diu ahi. Midang Chunga Thu-Tanna <sup>37</sup> Midang chungthu tan hih'in chule nang chungthu jong kitan louding ahi. Midang demna thu seihih in, achutiloule nachunga hung lhung ding ahi. Midang ho ngaidam in nang jong nakingaidam ding ahi. <sup>38</sup> Pein, chutileh namu ding ahi. Nathilpeh chu aboncha a nangma kom hung kile ding ahi—akison chahkkeh, lo chah kkeh sa, mun a-on nadinga, letset'a chule naphei chung a kisunglha ding ahi. Napehdoh jat chun namu ding jat aphotchen ding ahi,” ati. <sup>39</sup> Chuin Jesun thutekah hicheng hi aseiyee: “Mitcho khat chun midang kaihoi theyin tem? Anilhon'a kokhuh a lhalut lhon talou ding ham?” ✧ <sup>40</sup> Jillai ho ajilkungpau sangin alenjo poi. Amavang jillai khat bulhingset'a kichuh chu ajilkungpa tobang hiding ahi. ✧ <sup>41</sup> “Chuleh ibol'a naloi nagol mit'a bohhal um chu nalunggim pi ham nangma mit'a inkam uma chu?” <sup>42</sup> Nangma

---

✧ 6:39 Matt 15:14 ✧ 6:40 Matt 10:24,25; Jn 13:16; 15:20

mit'a inkam kimu louva, “Jol, namit'a bohhal um chu nalahdoh peh inge, tia seiding iti nagel theiyuham? Miphalhem, amasan nangma mit'a inkam chu kilah doh masat in, chutileh nagol mit'a bohhal um chu abol ding dan nahet ding ahi. Thingphung Agan Aki-Hedoh In Ahi.”  
<sup>43</sup> “Thingphung pha khat in ga phalou asodoh theipoi, chule thingphung phalou vin ga pha asodoh ngaipoi. <sup>44</sup> Thingphung khat chu agan akihen ahi. Theichang ga lingphung hoa konin akilou khapoi, chule lengpiga jong lingboh ah akilou poi. ✧ <sup>45</sup> Miphan alungsung thilkholna pha a konin thilpha asodoh in, chule migilouvin alungsung thilkholna phalouva konin thilse asodohe. Nasei chu ipi hileh nalungsung hung kondoh ahi. ✧

### *Song chung a tunding*

<sup>46</sup> “Hijeh a chu ibol'a ‘Pakai, Pakai’ tia neikou jing uham, kasei bon bollou uva? <sup>47</sup> Keiman koiham khat kahenga hunga, kathuhil ngaiya, chule eijui ho chu itobang hidu ham navetsah unge. <sup>48</sup> Ama chu mikhat inkhat sa'a abulphu ding thuhtah'a laiya akhombul song chung a phut tobang ahi. Twi ahungso'a in chu ahin nuh jong leh dettah a kisa ahijeh chun adingdet kheh in ahi. <sup>49</sup> Amavang koihileh athu ja'a chule nunglou hochu mikhat akhombul umlouva insa tobang ahi. Twipi ahungso'a hasuh a asuh le alhu pai ji tai.” ati.

---

✧ 6:44 Matt 12:33 ✧ 6:45 Matt 12:34

## 7

*Jesun sepai lamkaipa sohpa adamsah*

<sup>1</sup> Jesun hiche ho jouse miho koma aseijou phat chun, Capernaum langah akile tai. <sup>2</sup> Hiche lai chun Rome sepai jalamkai khat dinga asoh sahlut tah khat chu hatah in adammon thiding kon cha ahitai. <sup>3</sup> Sepai jalamkai pan Jesu chungchang ajahdoh phat in, aman ja umtah Juda upa ho asolin, ahinkou uva asohpa ahung damsah din asol'e. <sup>4</sup> Hijeh chun amahon jong ngehkhoh tah in Jesu chun mipa akithopi din atao tauve. "Napanpina chang dinga lom khat-tou aumleh, ama hi ahi," atiuvin ahi <sup>5</sup> "Ajuh chu aman Juda miho eilungset un kikhopna in jong eisah pehuve," atiuve. <sup>6</sup> Hijeh chun Jesu jong amaho toh alhon'in achetai. Ahivangin in ahunglhun masangjep un, sepai jalamkai pan loi phabep asol'in hitin agasei sah e, "Pakai, ka-in'a hung dingin nang le nang kisugim hih in, ajehchu keima chutobang loma jana chang dinga kilom kahipoi." <sup>7</sup> Keima hungdoh a nangma toh kimuto dinga jong lhingjou lou kahi. Naum na'a kon chun thu chu seijeng'in, kasohpa suhdam'a umding ahi. <sup>8</sup> Ken hiche hi kahenai, ajehchu keima jong kachunga ho thunoiya um kahin, chule kenjong ka sepai ho chungga thuneina kanei ahi. Keiman "Chen" ti bouseh kasei le acheuvin, "Hungin" katileh ahung uve. Chule kasohte komah "Hiche bol'in kati leh abol jenguve," atiuve. <sup>9</sup> Jesun hiche thu ajah doh phat in, atija lkeh jenge. Mihonpi anungjui ho heng lam angan hitin aseiyeh, "Kaseipeh nahiue, hitobang



tahsan na hi Israel pumpi sungah kamukha poi!” ati. <sup>10</sup> Chuin sepai jalamkaipa loiho chu a'inah akile tauvin ahileh sohpa damthengsel'a anaum chu amu'ugin ahi. Jesun Meithainu Chapa Athisa Akaithou <sup>11</sup> Chomkhat jouvin Jesu aseijui hotoh Nain kho langah acheuvin, mihonpi tamtah'in ajuu uve. <sup>12</sup> Thivui dinga hung kijotdoh honkhat khopi kelkot phunga chun atohkha uvin ahi. Khangdong athipa chu meithainu chapa changkhatseh ahin, chule khosunga pat mihonpi tamtah'in amanu aumpiu ahi. <sup>13</sup> Pakaiyin amanu amu chun, alungsung khotonan adimtan ahi. “Kap hih'in!” tin aga lhamon e. <sup>14</sup> Chuin thikong lama chun achen atongkhan ahile apoho adingden'un ahi. “Gollhang” atin “Kaseipeh nahi, thoudoh in” ati. <sup>15</sup> Chuin athiah pasal chapang chu ahung toudoh in thu aseipan tai! Chule Jesun anu anungpeh tan ahi. <sup>16</sup> Kichatna lentah in mihonpi chu alonvuh tai, chule amahon Pathen avahchoiyun, “Thil nasatah bolthei themgao khat ilah uvah akisepdoh tai,” atiuvin chule “Pathen in tunin amite aviltai,” atiuve. <sup>17</sup> Chule Jesu chungchang thusoh Judea gam pumpi le akimvel thinglhang gamkai ho'ah the chansoh'in aumtai.

### *John ahetchet Jesun twilutsah sah*

<sup>18</sup> Twilutsah John seijui hon Jesu thilbol jouse chu John aseipeh tauve. Hijeh chun John in aseijuite lah'a mini akouvin, <sup>19</sup> chule adong dingin Pakai komah asoltai. “Nangma Messiah kanga jingu chu nahim, ahilouleh achom dang khat kavet nahlai diu ham?” agatisah e. <sup>20</sup> John

seijui tenin Jesu amu lhon phat in aseilhon tai, “Twilutsah John in hiche dong dinga eihin sollhon ahi, Nangma Messiah, kanga jing pau chu nahim, ahilouleh achom dang khat kavetjing nahlai diu ham?” atilhon e. <sup>21</sup> Hiche pettah a chu Jesun mi tampi anatnau, adammo nahou asuhdam pet, lhagaoboh vop ho aboldam pet, chule khomulou ho kho amusah pet anahie. <sup>22</sup> Jesun John seijui teni chu aseipeh in, “John hengah kile lhon in lang nathilmu lhon le nathulah lhon chengse seipeh lhon tan-mitchon kho amun, elbaiyin lam ajot'in, mipah ho jendam ahin, nangong'in kho ajan, mithiho kaithouvin aumin, chule Kipana Thuphahi mivaichate hengah seiphong'in aumtai. ✧ <sup>23</sup> Chule seipeh lhon'in, keima jeh a kiheimang louho chu Pathen in phatthei aboh'e,” ati. <sup>24</sup> John seijui tenin adalah jouvin Jesun ama thudol mihonpi jah'a chun aseiyin ahi. “Itobang mi veding'a gamthip a chu nache uham? Ama chu huimut lingle peng don anem ham? <sup>25</sup> Ahiloule ponsil mantamtah'a kivon mi mudinga nakiginchat um? Ahipoi, von hoitah kivon hole nomsatah'a hingho chu leng inpia bou akimui. <sup>26</sup> Themgao ve nahiu ham? Henge, chule themgao sanga chungnung jo ahi. <sup>27</sup> John chu Pathen Lekhabu in hitia aseipa chu ahi, Ven, keiman namasangah ka thu lhangsam kasol'e, chule aman nalampi namasanga asemkup ding ahi. ✧ <sup>28</sup> Kaseipeh nahiuve, anahing jouse lah'a, koima John sanga lenjo aumpoi. Ahin Pathen lenggam a aneopen

---

✧ **7:22** Isa 35:5,6; Isa 61:1    ✧ **7:27** Malachi 3:1

jengjong chu ama sangin alenjon ahi!” ati.  
<sup>29</sup> Hiche thu ajah tah'un, mipi jouse-kaidong ho jengin jong-Pathen lampi chu adih ahi ti apom'un ahi, ajeh chu amaho John khut'a baptize anachang ahiuve. ☆ <sup>30</sup> Amavang Pharisee hole hou danthu themhon Pathen thilgon apampaiyun ahi, ijeh inem itile amahon John tuilutsah chu apomlouvuh ahi. <sup>31</sup> “Tukhang mite hi ipi toh katekah tadem?” tin Jesun adongin “Iti kahilchet ding ham?” ati. <sup>32</sup> Amaho hi kailhang lah'a chapang kichem tobang ahiuve. Amaho aloi agol ho komah aphunchel un, “Keihon moupui golvah la kalhauvin, nalam pouve” hijeh chun thivuina la joh kalhauvin chule nakap pouve. <sup>33</sup> Ajeh chu Tuilutsah John chun aphot ho changlhah neh ahiloule lengpitwi don kiti hohin asumang pon, chule nanghon, “Thilhavop ahi” natiuve. <sup>34</sup> Mihem Chapan, alangkhat'ah, anen adonin, chule naseiyun, “Milop jukham chule kaidong ho le chonse dang ho jol le gol!” natiuve. <sup>35</sup> Ahinla chihna chu adih ahi ti anungjui ho hinkho'ah tahlanguin aume, ati.

*Chonse numei khat in ngaidamna akisan*

<sup>36</sup> Pharisee ho lah'a khat in Jesu toh nilhah an nekhom din angeh in, hijeh chun Jesu jong ama in'a chun achen an nedin atoutai. <sup>37</sup> Chukom muna an aneh ding chu numei jonthanhoi a chonse khat in ahethat in, amanun songval bom khat'ah thao namtui mantamtah kikhum ahinchoiye. ☆ <sup>38</sup> Chuin amanu chu adilsun amapa kengmuh gal lam'a chun adilsun akaptai.

---

☆ **7:29** Matt 21:32; Lk 3:12    ☆ **7:37** Matt 26:7; Mk 14:3; Jn 12:3

Amitlhi akengmuh lamah avalhan, hichu asam in atehgo in ahi. Chuin akengmuh chu namtui athe in achop chuh chuh tan ahi. <sup>39</sup> Pharisee mipa anne a koupa chun hichu amuphat in ama le ama akihoulim in, “Hiche mipa hi themgao ahipou pouleh, itobang numei ham athamkha nu hi, amanu hi michonse ahi! ti ahēt tei ding ahi,” atin ahi. <sup>40</sup> Chutah chun Jesun alunggel chu ahin donbut in, “Simon” tin Pharisee pa koma chun, “Thilkhat nakomah kaseinom'e” ati. “Sei jeng in, houhil” tin Simon in adonbut paiyin ahi. <sup>41</sup> Chuin Jesun hiche thusim hi aseipeh tai: “Mikhat in mini sum abatsah in–khatpa dangka ja-nga chule khat dangka som-nga. <sup>42</sup> Ahin anigel lhon in asajou lhon tapon, hijeh chun hepi na neitah in angaidam in abat lhon akah peh tai. Chujou chun kojoh chun ama chu ngailu jon tem tia nagel em?” tin adongtai. <sup>43</sup> Simon in adonbut in, “Keigel in abat tamjopa chu,” ati. “Hichu adih'e” tin Jesun aseitai. <sup>44</sup> Chuin numeinu heng lam ngan akiheiyin Simon jah'a aseitai, “Hiche numeinu hichea dilsu nu hi ven. Keima na'in a kahung lut chun, nangman tui kakenga vutkhu sillhah nading neipepon, ahivangin hiche nu hin amitlhi tuiyin asop lhan, chule asam in ateh ngim in ahi.” <sup>45</sup> Nangman chibai neiboh pon, ahin kahung lut a pat hichenu hin kakengmuh achop chop jong anga hih laiye. <sup>46</sup> Nangman kalua olive thao nuding na gelkhoh pon, amanu vang hin kakeng phang thao namtuiyin anui. <sup>47</sup> “Kaseipeh nahi, amanu chonsetna ho–tamtah ahivun, ngaidam ahitai, hijeh a chu amanun ngailutna lentah eimusah ahi. Amavang mi

akingaidam lhom chu akipah lhom in ahi” ati. <sup>48</sup> Chuin Jesun numeinu jah'a, “Nachonsetna ho kingaidam ahitai” ati. <sup>49</sup> Dokhanga tou miho chu ama ho le amaho akihouvun, “Hiche mipa hi koi hiya mi chonse jong angaidam ham?” atiuvin ahi. <sup>50</sup> Chule Jesun numeinu jah'a aseitai, “Natahsan in nahuhhing ahitai, lungmongin chetan,” ati.

## 8

### *Numei phabep in Jesu akilhon piu*

<sup>1</sup> Chujou vin Jesu anaivellah kho ho vilding in akipandoh in, Pathen Lenggam chungchang Kipana Thupha seiphong leh hillhang le akop in ahi. Aseijui somleni ho jong akipuiyin, <sup>2</sup> lhagaoboh vop'a kon le anatna kisudam numei phabep khat jong ahive. Amaho lah a chun Mary Magdelene, thilha sagi anodoh peh nu; ☆ <sup>3</sup> Joanna, Chuza jinu, Herod sumkolveina vesuipa; Susanna; chule adang mi tamtah Jesu le aseijui te anei agouva panpi na hintoh doh jing ho jong ahive.

### *Muchi thepa thulem*

<sup>4</sup> Nikhat Jesun thusim khat thulem'in mihonpi tamtah, kho chom chom'a kon hung kisutoa athusei ngaidinga hung ho komah hitin aseiyeh: <sup>5</sup> “Loubol mi khat amuchi tu dingin achedoh tai. Aloulai dungah athe len ahileh, muchi abang chu lamsih'a achun, chuva chun chotphan aumin, chule vachaten anedoh tauve. <sup>6</sup> Muchi adang songlah'a achui. Ahung khang doh'in,

☆ **8:2** Matt 27:55,56; Mk 15:40,41; Lk 23:49

ahin akehдох chu agoplha loiyin asunou ding alhomjeh in athidoh tai. <sup>7</sup> Muchi adang chu linglah'a achun, ahung kehdoh in chule ling chun adeplih jitai. <sup>8</sup> Muchi adang khat kit chu leipha laiyah achui. Hiche muchi chu akhang in, ga ahin son anakitu sangin ajat jakhat in agan ahi” ati. Hiche aseijouvin ahung pengjah jengin, “Koihileh angai na ding nakhang nei chan in angaiya ahetchet ding ahi,” ati.

*Jesun thulem aseina abidoi*

<sup>9</sup> Aseijui hon hiche thulem hi ipi kisei na ham adongun ahi. <sup>10</sup> Aman adonbut in, “Nanghon Pathen Lenggam thuguh nahet thei nadiuva phalpehna chang nahiuve. Amavang midangho hilna a thulem kaman hi Pathen Lekhabua kisun guilhun nadinga ahi: Ahin vet teng uleh, amu tahtah lou diu ahi. Ajah teng uleh, ahettei lou diu ahi.” ☆

*Jesun muchi thulem ahilchet*

<sup>11</sup> “Hiche hi thulem kisei avetsahna chu ahi: Muchi chu Pathen thu ahi. <sup>12</sup> Lamsih a chu muchin avetsah chu, thu kisei ja'a ahivanga ag-iloupa hunga atahsan thei nalou ding le asochat lou na dinga alungsunga kon alahmang peh miho aseina ahi. <sup>13</sup> Muchi songlah'a chu hon avetsah chu, thu kisei ja'a chule kipah tah'a kisanta, ahivanga jung akhothuh loujeh uva phat chomkhat kah'a bou tahsan, lhepna atoteng uleh lhuji ho aseina ahi. <sup>14</sup> Muchi linglah'a chu hon avetsah chu, athu ja'a ahivanga athujah chu

---

☆ **8:10** Isa 6:9

leiset gimna haosatna chule nopsahna hon atomchah a khangdoh thei talou ho aseina ahi. Hijeh chun apilhing thei tapouvin ahi. <sup>15</sup> Chule muchi leipha laiya chu chun milungtheng, lungthim pha, Pathen thu ja'a nung ho, chule lungneng tah'a ga tamtah sodoh ho aseina ahi. Meivah Lheng Akikhu Den Ngaipoi” <sup>16</sup> “Koiman meivah avah in chule lheng'in akhun ahiloule jalkhun noiyah asel ngaipoi. Meivah chu atunna ah aki-tungin, chuva chun avah chu insunga lut jousen amuthei bouve. ✧ <sup>17</sup> Ijeh inem itile akiselguh jouse lhangphonga hung kipodoh ding, chule akiphongdoh lou jouse meivah noiya kipodoh ding mijouse kihetsah ding ahi.” ✧ <sup>18</sup> “Hijeh chun iti najah uvem chingtheyyun. Kathuhil ngai jouse, hetthem theina kipeh be ding. Amavang thungai louho chu, ahetsa dan'a agel hou jeng jong amahoa kona kilamang ding ahi.” ati. Jesu Le A-Insung Mite ✧ <sup>19</sup> Chuin Jesu anu le asopiho amatoh kimudin ahung un, ahin mihonpi jeh chun ama kom nailut theilouvin aum tauve. <sup>20</sup> Koiham khat'in Jesu aseipeh in, “Nanu le nasopiho polangah aumuve, chule nakimutopi nom uve,” atipeh tai. <sup>21</sup> Jesun adonbut'in, “Kanu le kasopi ho chu koi hileh Pathen thu ja'a athua nungho chu ahiuve” ati.

*Jesun twipi aphothip*

<sup>22</sup> Nikhat Jesun aseijuite jah'a aseiyin, “Dil gal langkhat ah galkaiyu hite” ati. Hijeh chun kong sungah alut'un akipatdoh tauve. <sup>23</sup> Konga akitol

---

✧ **8:16** Matt 5:15; Lk 11:33 ✧ **8:17** Matt 10:26; Lk 12:2 ✧ **8:18** Matt 25:29; Lk 19:26

laiyun, Jesu chomkhat kichol din a-imu'e. Ahin sotloulaiyin, huipi hattah tuipi chungah chun anungsuh'e. Kong chu tui adim tan, amaho setoh teiding dinmun'ah achutauve. <sup>24</sup> Aseijuite acheuvin agakaithou un, "Pipu, Pipu, alhalut ding ihitauve!" tin apengjah jeng tauve. Jesu athodoh phat in, huipi le tui kinonglai chu aphohthip tai. Chuin apettah in huipi athip'in imajouse anomsel tai. <sup>25</sup> Chuin amaho chu adongin, "Natahsan'u hoiba ham?" ati. Amaho akihoulhi chilchel'un, "Thupeh anei teng huipi le tuikinong jengin jong athu angaiye!" akitiuve.

*Jesun Gerasene gam'a thilha vop adamsah*

<sup>26</sup> Hichun amaho Galilee a pat in dil gallang, Gerasene gamkai ahunglung tauve. <sup>27</sup> Jesu konga kona apotdoh leh, mikhat thilhavop khat ahungin ahung kimupin ahi. Phat sottah amapa chu in beiya chule sagoh keova khopi pam lhanmol lah'a cheng ji ahi. <sup>28</sup> Jesu amu mu chun apeng'in chule amasanga alhu jengin ahi. Chuin ahung peng in, "Ipi jeh a kakoma hung kikumlut nahim, Jesu, Chungnung pen Pathen Chapa? Lungsettah in, katao ahi, nei gimbol hih in," ati. <sup>29</sup> Ijeh inem itile Jesun hiche lhagaoboh chu amapa a kona ahungdoh nadinga ana thupehsa ahitai. Hiche lhagao boh hin mipa hi athunun ji ahi. Akimattup'a thikhkhaova akibultuh jeng jong leh, aman imalouva atumtan jia gammang lah adelji, apumpia thilha thaneina noiya um ahitai. <sup>30</sup> Jesun adongin, "Namin ipi ham?" ati. "Janel" tin ahin donbut'e, ajehchu hiche mipa chu thilha tampin abop ahi. <sup>31</sup> Thilha ho chun Jesun atosin



bei onghom'a asol louna diuvin angeh tauve. <sup>32</sup> Hiche mun'a chu voh hon tampi mollanga lha ahiuvin, chule thilhaho chun hiche vohchaho sunga alut nadiu joh in athum'un ahi. Hijeh chun Jesun phalna apen, <sup>33</sup> chuin thilhaho chu mipa a konin ahung potdoh'un vohchaho sungah alut uvin, chule vohcha honpi chu molchung akensuh'a pat chun alhaisuh un dillen a chun alhai lhauvin alhum lut gam tauve. <sup>34</sup> Achinghon thilsoh chu amuphat un, anai vel'a khoho le akimvel thinglhang gam ho ah alhai lut un thusoh chu athejal le tauve. <sup>35</sup> Thilsoh umchan veding in mipiho ahung lhaidoh uve. Mihonpi chomloukah in Jesu hengah ahung kikhom un, chule hiche mipa thilhaho a kona kilha onga chu amuuvin ahi. Amapa chu Jesu kengbul'ah atouvin, von akivon'in, chule alimgeh tan, chule amaho chu abonun akicha tauvin ahi. <sup>36</sup> Chuin thilsoh umchan muho chun adangho jah'a thilha voppa chu iti suhdam'a umham ti aseipeh un ahi. <sup>37</sup> Chuin Gerasene gamkaiya mipiho jousen Jesu hengah agam'u adalah'a achemang nadin angeh tauve, ajehchu kichatna nasatah huinun chun alodim u ahitai. Hijeh chun Jesu jong kong sungah alelut in adalhatai, dil gal langkhat le galkai kit dingin. <sup>38</sup> Mipa thilha kinodoh peh pa chun amatoh lhonkhom din athum'in, ahin Jesun inlang joh a asol'in, hitin aseipeh e, <sup>39</sup> "Ahipoi, na insungmite kom joh'a chen lang, chule Pathen in nadinga nabolpeh jouse hi gaseipeh tan," ati. Hijeh chun amapa chu khopi dung lah'a achen, Jesun thil loupi abolpeh ho aseiphong len ahi.

*Jesun numei chapang athisa akai thou chule  
numei thisan long adamsah*

<sup>40</sup> Dil gallang a chun mihonpin Jesu ana lem'un ahi, ajeh chu amahon ananga jingu ahi. <sup>41</sup> Chuin Jairus kiti akikhopnau in'a lamkai khat, ahungin Jesu kengbul'a abohkhup in a'ina akilhonpi din ahung tem'e. <sup>42</sup> Achanu changkhat seh, kum somleni bep chu, thiah ahi. Jesu amapa chutoh alhon khom'in ahileh amachu mihonpi chun atom chahkheh jengin ahi. <sup>43</sup> Mihonpi lah'a chun numei khat kum somleni jen thilong'a damlou aumin, amanun damna akimu jou lou ahi. <sup>44</sup> Jesu nung lang'a pat ahungin, amanun Jesu ponmang athamtai. Apettah chun athilon atang hel tai. <sup>45</sup> "Koiham ei tongkha?" tin Jesun ahin dongtai. Mijousen ahilounau aseiyun chuin Peter in, "Pipu, mihonpi hin nasukhah ahi," ati. <sup>46</sup> Ahivangin Jesun aseiyin, "Koiham khat in thamkhah ding lungput neimonga eitham ahi, ijeh inem itile keyia kona suhdamna thaneina apot kahei," ati. <sup>47</sup> Numei nu chun ki-immang thei kahitapoi ti ahet phat in, kithing pumin akengbul'ah adilsutan ahi. Mihonpi chun ipi jeh a atohkhah ham chule adampai jeng thu ahilchet hochu ajauvin ahi. <sup>48</sup> "Chanu" tin amanu jah'a chun, "Natahsan in nadamsah ahitai, lungmongin chetan" ati. <sup>49</sup> Amanu koma thu aseijing laiyin, kikhopna in'a lamkai pa, Jairus, in'a kon thupole khat ahung vailhungin ahi. Aman amapa jah'a aseipeh in, "Nachanu athitai. Tua houhil nasuhboi chu phachomlou ding ahitai," ati. <sup>50</sup> Ahin Jesun thilsoh ajah chun, Jairus

jah'a hitin aseiyé, “Kicha hih'in, tahsan poupouvin, amanu suhdam'a umding ahi,” atipeh e. <sup>51</sup> Amaho in ahunglhun phat'un, Jesun Peter, John, le James, chule numei chapangnu nulepa tailou midang koima toh alut ding anompoi. <sup>52</sup> In chu mi tamtah akap le amaovah dimset'a um ahi, ahin aman aseiyin, “Kap tahih un! Athi ahipoi, a-imu ahibouve,” atipeh'e. <sup>53</sup> Ahivangin mihonpi chun anuisat un, ajeh chu athitai tichu hoitah a ahét'u ahi. <sup>54</sup> Chuin Jesun akhut in atuh in chule aw sangtah in, “Chanu, thoudoh in!” tin aseitai. <sup>55</sup> Chuin hiche pet tah chun amanu hinna chu ahung kilen, kinloitah in ahung dingdoh e! Chuin Jesun nehding khattou apéh diuvin aseipeh tai. <sup>56</sup> Anu le apa chu akipah val behseh jengin, ahin Jesun thilsoh chu koima koma seidoh lou din ahilchah e.

## 9

### *Jesun som le ni ho asol tan ahi*

<sup>1</sup> Nikhat Jesun aseijui somleni ho chu akoukhom in, thilhaho jouse le natna jouse suhdamna thahatna le thilboltheina apen ahi. <sup>2</sup> Chuin aman amaho chu Pathen Lenggam thudol mijouse seipeh ding leh adamlou te damsah dingin asoldoh'e. <sup>3</sup> “Najin nadiuvah imacha kipoh hih'un” tin ahilchah in “Tenggol ham, sakhao ham, an neh ding ham, sum ham ahilouleh von khel jeng jong kipoh hih'un. <sup>4</sup> Nache na chan uvah khopi nadalhah tokah uvin nahun nau in a chun um'un. <sup>5</sup> ☆Chule

---

☆ 9:5 Lk 10:4-11

khopi khat chun nangho lemding adauva ahileh, nakengphang uva vutkhu ho thinglhauvin, hiche miho chu aso so kiso h tauhen tia lhahdohna in,” ati. ✧ <sup>6</sup> Hitichun amahon khotin'a gamchot apan'un, Kipana Thupha lhangsap chule ana damlou damsah toh aboluve. Herod In Jesu Aki-Mupi Nom <sup>7</sup> Herod Antipas, Galilee gamvaipopan Jesu natoh thilbol jouse ajahdoh phat in alungboi dentai. Mi konkhat chun Twilutsah John athilah'a kon thoudoh kit ahi atiuve. ✧ <sup>8</sup> Adanghon Jesu chu Elijah ahilouleh themgao holah'a khat athia kon thoukit ahi atiuve. <sup>9</sup> “Keiman la John kathat tan,” tin Herod in aseiyin, “Ahileh hiche mipa, athusim kajah pa hi koilham?” ati. Chule ama chu mutei ding atop jing tan ahi. Jesun Mi Sang Nga Val Jen Avahva <sup>10</sup> Seijui ho ahung kileu chun, Jesu hengah athilbol jouseu aseipeh tauve. Chuin ama amaho chutoh guhthim chan Bethsaida kho langah ache tauvin ahi. <sup>11</sup> Ahivangin mihonpi chun hoiya ache aholdoh un chule ajui tauve. Aman amaho chu alem in, Pathen Lenggam thudol ahil'in, chule ana damlou ho asudam in ahi. <sup>12</sup> Nilhangkai vaigei thim lang hin seijui somleni akoma ahungun aseitauve, “Mihonpi hi naivellah khoho le loujao dungah soldoh tan, anneh le jan gena ding akimu thei nadiuvin. Hikom munthip'a hin neh ding imacha aumpoi,” ahung tiuve. <sup>13</sup> Ahivangin Jesun aseiyin, “Nanghon amaho vah'un” ati. “Ahin keihon changlah pheng-nga le nga ni bouseh kaneiyuve,” tin ahin donbut'un, “Ahilou

---

✧ 9:5 Act 13:51 ✧ 9:7 Matt 16:14; Mk 8:28; Lk 9:19

le kacheuva nehding mihonpi hijat dinga hi kagachoh diuva nangaitom?" atiuve. <sup>14</sup> Ajuh chu chukoma chu mi pasal sang nga jen umah ahi. Jesun adonbut in, "Mi somnga nga bep'a aloi loiya tou dingin seipeh un," ati. <sup>15</sup> Hijeh chun mipi abon'un atou tauve. <sup>16</sup> Jesun changlhah pheng nga le nga ni chu alan, vanlam aven, phatthei abohtai. Chuin changlhah ho chu ahal hal'a asuhkeh toh kilhon in, changlhah le nga chu aseijuite komah ahin pedoh doh jengin, amahon mipi ho ahoppeh uve. <sup>17</sup> Chuin abon'un aduchan chan aneuvin, chule chomkhat jouvin seijui hon nehmo paipah somleni alohdoh uve.

*Peter in atahsanna aphondoh*

<sup>18</sup> Nikhat achangeh'a tao dingin Jesun mihonpi adalhan ahi. Aseijuite bouseh toh um ahin, aman hitin adong tai, "Mihon kei hi koi ahi eitiuven?" atileh, <sup>19</sup> amahon adonbut un, "Abangin Twilutsah John nahi atiuvin, abangin Elijah, chule adanghon malai themgaoho lah'a khat thoukit nahi atiuve," atipeh uve. ✧ <sup>20</sup> Chuin aman amaho chu adong'in, "Nanghon la koi ahi neitiuven?" atileh Peter in adonbut in, "Nangma Messiah, Pathen a kon hung kisol chu nahi," ati. ✧ <sup>21</sup> Jesun aseijuite koi ahi koima koma aseidoh louna diuvin agihsal'in ahi.

*Jesun athi ding le athodoh kit ding ase masah*

<sup>22</sup> "Mihem Chapa hin gim genthei tampi athoh ding," tin ahinseyin, "Amachu upa ho,

---

✧ **9:19** Matt 14:1,2; Mk 6:14,15; Lk 9:7,8 ✧ **9:20** Jn 6:68,69

thempuho, chule hou danthuhil hon ahin pampai diu ahi. Ama chu tha a umding, amavang anithum nileh athilah'a kona kaithouva umding ahi” ati. <sup>23</sup> Chuin mihonpi jah'a chun aseiyin, “Nangho koi tobang kanungjui nom naum uleh, nangma chang kingailutna'a konin kiheidoh un, na thingpel niseh'in kiput un, chule neijuiyun. ✧ <sup>24</sup> Nahinkho nahuhhing nom le nachan ding, amavang keima jal'a nakatdoh le nahuhhing ding ahi. ✧ <sup>25</sup> Chuleh ipi phatchomna mun natem, vannoti pumpi neiyin lang nangma tah kisusen kisumang le chun? <sup>26</sup> Khattouvin keima le ka thusei eijachat pi leh, Mihem Chapan jong amachu aloupina a chule Pa le vantil thengte loupina a ahung kile tengleh ajachatpi ding ahi. <sup>27</sup> Thutah kaseipeh nahiuve, tutua hikom'a dingho lah'a mi phabep'in Pathen Lenggam amu tokah uva thina atolou diu ahi,” ati.

### *Jesu vou kikhel*

<sup>28</sup> Niget hamkhat jouvin Jesun Peter, John, le James hocheng hi molchung khat'ah taodingin apuitouve. <sup>29</sup> Chuin atao laiyn, amaiso ahung kikhel'in, chule avon'ah ho kidangtah'in abangsel jengin ahi. <sup>30</sup> Phulou helouvin mini, Mose le Elijah ahung kilah lhonin Jesu toh akihoulim pan tauve. <sup>31</sup> Amaho chu vet ding'in aloupi lheh jengui. Chule amaho chu leiset a pat'a apotdoh ding thu, Jerusalem a guilhung vahding thun akihoulim un ahi. <sup>32</sup> Peter le adang teni chu ihmu lhugam ahitauve. Akhahdoh

---

✧ **9:23** Matt 10:38; Lk 14:27 ✧ **9:24** Matt 10:39; Lk 17:33; Jn 12:25

uchun, Jesu loupina chu amu'ugin chule mi ni amatoh adinkhom chu amu'uve. <sup>33</sup> Mose le Elijah in adalah kigot pan laiugin, Peter in, aseijeng jong helou khop'in ahung eodoh'in, "Pipu, hilai mun'a ium'u hi anom'e! lim munthum'ah hetjingnan song uhite-khat nang ding, khat Mose ding, chule khat Elijah ding," ahintie. <sup>34</sup> Ahin, hitia aseijeng vang chun, meilhang khat in alekhu tauvin, meilhangin atomkhum toh lhonin kichat nan amaho alodim tauve. <sup>35</sup> ✧ Chuin meibol lah kon chun awgin khat'in hitin ahin seiye, "Hiche hi Kachapa ahi, Kalhendoh pa ahi. Athu ngaiyun," ati. ✧ <sup>36</sup> Awgin athip chun Jesu chu achangseh anahitai. Hiche athilmu houchu chuche phat laichun koima komah aseidoh pouve.

*Jesun lhagaoboh vop chapangpa adamsah*

<sup>37</sup> Ajing'a molchunga pat ahung suh jou uchun, mihonpi tamtah'in Jesu akimupi uve. <sup>38</sup> Mihonpi lah'a mikhat chun ahin kouvin, "Houhil, lungset'in kachapa neivet peh in tia katao ahi, ajeh chu ama bouseh hi kacha neisun ahi. <sup>39</sup> Lhagao gilouvin aman jin, phulouvin apengjah jin, chule akam ah achilphon alhain ahi. Ahehlhujin achangin amoh dalhah ji poi. <sup>40</sup> Na seijuite hengah einodoh peh nadiugin kathum'in hinlah anodoh jou pouve," ahung ti. <sup>41</sup> Jesun aseitai, "Nangho tahsan bei le midihlou ho! Nangho itih chan kaumpiuva kakhongai jing ding nahu ham?" atin, chuin mipa jah'a chun,

---

✧ 9:35 2 Pet 1:17,18 ✧ 9:35 Isa 42:1; Matt 3:17; 12:18; Mk 1:11; Lk 3:22

“Nachapa hikomah hinpuiyin,” ati. <sup>42</sup> Chapang pa ahung machon jep laiyyin, thilha chun tol'ah ahin sulhun, nasatah in aveingoi jenge. Ahivan-gin Jesun lhagao gilou chu aphoh thip in chapangpa chu asudam tai. Chuin aman amapa chu apa alepeh kittai.

*Jesun athi ding le athokitna ding avel'a asej*

<sup>43</sup> Chutobang thilsoh Pathen thilboltheina ki-dangtah amu uchun mipi chu atiu ajalheh jeng tai. Athilbolho jouse mijousen adatmah laiyyin, Jesun asejjuite jah'a hitin aseiyee, <sup>44</sup> “Ngaiyuvun chule kathusei hi geldoh jingun. Mihem Chapa hi agalmite khut'a pehdoh a umding ahi,” ati. <sup>45</sup> Ahin amahon ipi aseina ham ahethei pouve. Athupina chu amahoa kona kiselguh ahi, hijeh chun ahethei pouve, chule doh ding jong kichakit ahiuve.

*Alen pen koi ham?*

<sup>46</sup> Chuin asejjuite koi alenpen ham ti akinel salah lah jeng tauvin ahi. ☆ <sup>47</sup> Ahin, Jesun alunggel u ahen, hijeh chun chapang neocha khat akoma dingin alai. <sup>48</sup> Chuin aman amaho jah'a aseiyee, “Koi hileh hitobang chapang neocha keima thalheng'a sang'a chun keima eisan ahi, chule keima eisanga chun eisol'ah kapa jong asan ahi. Nalah uva aneopen chu alenpen ahi,” ati. ☆

*Jesu min pan ho*

<sup>49</sup> John in Jesu jah'a, “Pipu, koihamkhat in namin'a thilha anodoh kamu uvin, ahivangin



eiho loilah'a ajao loujeh in angah dingin kaseipeh tauve,” ahin ti. <sup>50</sup> Ahivangin Jesun adonbut in, “Kham hih un, koihileh nadoudal lou phot chu nanga ding ahi” ati.

*Samaria kho khat in Jesu sang talou*

<sup>51</sup> Van'a lahtouva aumna ding phat ahung naitoh lhonin, Jesu Jerusalem jon din dettah a kigellha pumin achen ahi. <sup>52</sup> Aman thupole ho Samaria khokhat'ah, availhun na dinga akigot theina diuvin asol masan ahi. <sup>53</sup> Ahivangin hiche khoa mipi ho chun Jesu chu asang tapouve, ajehchu ama Jerusalem jona achejing lai ahi. <sup>54</sup> James le John in hiche amudoh lhon phat in, amanin Jesu jah'a, “Pakai, van'a kona amaho gouvam jeng ding mei ikou lhah diu ham?” atilhone. ✧ <sup>55</sup> Ahin Jesu akiheiyin amani chu aphoh'in ahi. <sup>56</sup> Hijeh chun amaho khochom khat ah ache tauve.

*Jesu seijui hi dinga kilom ho*

<sup>57</sup> Amahon chutia lam ajot laiyn, koiham khat'in Jesu jah'a, “Nache na chan'ah najui inge,” ati. <sup>58</sup> Ahin Jesun adonbut in, “Si-al hon chenna ding ko aneyun, vachaten gena ding bu aneyun, ahivangin Mihem Chapan alu ngapna ding jeng jong aneipoi,” atipeh e. <sup>59</sup> Aman midang khat jah'a, “Hungin, neijuiyin” ati. Mipa chu anom in hinlah hitin aseiyeh, “Pakai, amasan inlam kileng ting kapa gavui masa tadinge,” ati. <sup>60</sup> Ahivangin Jesun aseipeh in, “Lhagaova thihon amithi hou kivuiyuhen! Nangma kin chu chele a Pathen

---

✧ 9:54 2 Lenge 1:9-16

Lenggam thudol seiphong chu ahi,” ati. <sup>61</sup> Achom khat in aseiyin, “Henge Pakai, keiman najui inge, ahin amasan ka insungmi tetoh gakivailhah tadinge,” ati. ✧ <sup>62</sup> Ahin Jesun aseipeh in, “Koi hileh akhut'a langkon tuhta chule nunglam ve chu Pathen Lenggam a dingin alhing poi,” ati.

## 10

### *Jesun som sagi le ni asoltan ahi*

<sup>1</sup> Tun Pakai in seijui adang mi somsagi le ni alhengdoh in amaho chu akop kop'in khotin le muntin vilding agot naho ah asol in ahi. <sup>2</sup> Hiche ho cheng hi amaho ahilchahna ahi: “Lousoh ga khoftup ding atam, ahin natong ho alhome. Hijeh chun Pakai hengah taovun amachu ga chomtup dia mopo ahi; alouva natong ding mi ahin solbe nadin thum'un.” ✧ <sup>3</sup> Tun cheuvin, chuleh geldoh jingun keiman si-al lah'a kelngoi kisol tobanga kasol nahiuve. ✧ <sup>4</sup> Sum le pai ima kipoh hih'un, sakhao jong kipoh hih'un, kengchot akop'in jong pohih un. Chuleh lampi dungah khattou lem dingin kingapa hih'un. <sup>5</sup> Khattou in'a nalut teng uleh, amasan “Pathen lungmonna hiche in'a hin umhen” tin asauvin. <sup>6</sup> Hichea cheng ho chu alungmon uleh, phattheina chu umden ding; achutilou uleh, phattheina chu nahenguva hung kile ding ahi. <sup>7</sup> In khat'a kon inkhat ah vahle hih'un. Munkhat bou ah um unlang, amahon napeh peh uchu neuin chule don'un. Min phatah a najen nau sanding kiphalam hih'un, ajehchu anatong chun alosan

amuding mong ahi. ✧ 8 “Khopi khat a nalut uva nasan uleh, namasanga ahin luidoh doh uchu neuin.” 9 Adamlou sudam'un lang seipeh'un, “Pathen Lenggam chu tun nakom uva aumtai” tiuvin. 10 Ahin khopi khattou in nasan dauleh, alampiu dunga chun chedoh unlang seiyun, ✧ 11 Nakhopiu sunga vutkhu ho geiyin kakenguva kon'in kathing lhauve, nasoso kiso dinga dalhah nahiue ti vetsahnan. Chule hiche hi heuin–Pathen Lenggam chu anaitai! ✧ 12 Kaseipeh nahiue thupi kitan nileh agilou Sodom kho chu chutobang khopi ho sanga phajep diu ahi. ✧

*Lunghai lou khopi ho ada ahiue*

13 “Itobang lunghemnan nangau hitam, vo Korazin le Bethsaida! Ijeh inem itile nalah'a thilkidang kibol hohi agilou Tyre le Sidon khohoa kibol hitaveleh, sotlaiya pat'in amipihon achonset nauva kon lungheina nei untin, khaodippon kisil untin chule akisih'u tahlng nan aluchung uvah vutvam kiloi tauvinte. ✧ 14 Henge, Tyre le Sidon khopi teni hi thupi kitan nileh nangho sanga phajep diu ahi. 15 Chule nangho Capernaum mite, van-gam'ah jabolna chang nauvin natem? Nachan loudiu ahi, thina mun'a nachesuh joh diu ahi,” ati. ✧ 16 Chuin asejuite jah'a aseiyin, “Koihileh nathuhil'u kisan a chun keijong eisan ahi. Chule napampai chan'u chun

---

✧ 10:7 1 Crth 9:14; 1 Tim 5:18 ✧ 10:10 Act 13:51 ✧ 10:11 Matt 10:7-14; Mk 6:8-11; Lk 9:3-5 ✧ 10:12 Semtilbu 19:24-28; Matt 11:24; Matt 10:15 ✧ 10:13 Isa 23:1-18; Ezekiel 26:1—28:26; Joel 3:4-8; Amos 1:9,10; Zechariah 9:2-4 ✧ 10:15 Isa 14:13-15

keijong eipampai ahi. Chule koihileh keima eipampai chan chun Pathen, eihinsolpa apampai ahi” ati. ✧

*Seijui som sagi le ni ho hung kile kit*

<sup>17</sup> Seijui somsagi leni ho ahung kileuvin, thanom tah in thulhut ahin bol'un ahi. “Pakai, thilhaho jeng jong kathu uvin anunge nangma min kapat ule,” atiuve. <sup>18</sup> “Henge” tin amaho aseipeh in, “Keiman Satan van'a kona kolphe banga alhahsuh kamui! <sup>19</sup> Veuvin, keiman nangho galmi thilboltheina chungu thuneina kapeh nahiuve, chule nanghon gul le aipi chungu lam najot diu chule nachilgoi dinguh ahi. Imachan nasukhah loudiu ahi. ✧ <sup>20</sup> Amavang lhagao gilou nathuuva anun jeh in kipah hih'un, ahin van-gam'a namin'u akijihlut jeh joh in kipah un,” ati.

*Jesu kipana*

<sup>21</sup> Hiche pettah chun Jesu Lhagao Thenga kipana adimset tan, chuin hitin aseiyeh, “O Hepa, van le lei Pakai, hiche thilho nangman aching le athem'a kigel hoa pat'a naselguh a, chapang ho henga naphondoh jeh in kakipah'e. Henge Pa, hitia kibol hin nangma nalunglhai sah'e,” ati. <sup>22</sup> “Kapan keima imajouse chungu mopohna eipeh ahitai. Pa tailou koiman Chapa chu dihtah in ahepoi, chule Chapa tailou le Chapa in hetsah dinga alhen ho tailouvin koiman Pachu dihtah in ahepoi” ati. ✧ <sup>23</sup> Chuin amaho changseh aumpet un, aman aseijuite heng lam ngan aseiyeh,

---

✧ **10:16** Matt 10:40; Mk 9:37; Lk 9:48; Jn 13:20 ✧ **10:19** Labu 91:13 ✧ **10:22** Jn 3:35; Jn 10:15

“Nathilmu chengseu mu ah mit hochu anunnom e. <sup>24</sup> Kaseipeh nahiue, themgao ho le lengho tamtah'in nathilmu chengseu hi muding anagaldot jingu ahin, hinlah anamupouve. Chuleh najah houhi jah ding anagaldot jing'u ahin, hinlah anaja pouve,” ati.

### *Samaria miphapa*

<sup>25</sup> Nikhat hou danthua them khat Jesu patep dingin adingdoh in hiche thudoh hi adonge, “Houhil, tonsot hinna kanei thei nadia ipi kabol ding ham?” ati. ☆ <sup>26</sup> Jesun adonbut in, “Mose dan in ipi ase em? Iti nasim am?” tin adongtai. <sup>27</sup> Mipa chun adonbut in, “Nangman nalung pumpin, na lhagao pumpin, na thaneina pumpin, chule nalungthim pumpin Pakai naP-athen chu ngailun. Chule nangma nakingailut bangin naheng nakom ngailun,” tin aseiyee ati. ☆ <sup>28</sup> “Adih'e” tin Jesun aseipeh in, “Hichu bol'in chule nahin ding ahi!” ati. ☆ <sup>29</sup> Mipa chun athilbol them akichan nom'in, hijeh chun Jesu chu adongin, “Koiham kaheng kakom?” ati. <sup>30</sup> Jesun thusim khat in adonbut in: “Juda mikhat Jerusalem a pat Jericho lam jon in ajin suh in ahi, chule ama chu lamkah ah migucha michom hon abulu un, aponsil aholhah peh un, avouvin, chule athisa tobang'in lam pang'ah adalha tauve.” <sup>31</sup> Thempu khat in agatoh khan, hinlah mipa chuva akijam amu mu chun, lampi pang langkhat joh apal in adalhatai. <sup>32</sup> Hou'in lhachale ho khat agachen chule chukom'a akijam

---

☆ **10:25** Matt 22:35-40; Mk 12:28-34 ☆ **10:27** Danbu Ni Na 6:5; Thempu Dan 19:18 ☆ **10:28** Thempu Dan 18:5

chu amun, ahin aman jong lamsih lang khat ah apeldoh tai. <sup>33</sup> “Chuin musit'a um Samaria mikhat ahung pheiyin, mipa amu chun, avou-  
 jang nat peh tan ahi.” ✧ <sup>34</sup> Akom ah ache naiyin, Samaria mipa chun akivohna maha chu ajen'in olive thao le ju asunkhum in, atompeh tai. Chuin mipa chu ama sangan chungah ahin puiyin, in khat ah ahin puilut in chukoma chun ajenlen ahi. <sup>35</sup> Ajing in in-ngahpa chu dangka cheng ni apen, aseiyin, “Hichepa hi anavesui in. Achunga lutjat hiche sanga atamjoh khah le, kahung kit teng kapeh ding ahi,” ati. <sup>36</sup> “Tun seiyyin hiche mithum ho lah'a chu koipen tah chu hiche mipa gucha michom hon avoh pau dinga aheng akom hi ham?” tin Jesun adongtai. <sup>37</sup> Mipa chun adonbut in, “Akhoto pachu ahi,” ati. Chuin Jesun aseiyin, “Adih'e, tun chenlang chutobang chun gabol tan,” ati.

### *Mary le Martha*

<sup>38</sup> Jesu le aseijuite Jerusalem lam jona achejing laiyun, khokhat ahung lhung un, chua chun Martha kiti nun a-in'a dingin alemin ahi. ✧ <sup>39</sup> Asopinu Mary chu Pakai kengbul ah atouvin, athuhil chu angaiye. <sup>40</sup> Ahivangin Martha chu jan anneh lentah agon jeh chun alunggim in ahi. Jesu komah ahungin ahung seitai, “Pakai dihtheilou nasah lou khattou ham kasopinu thipbeh a atouva ken natoh jouse katoh? Eihung kithopi na dingin hinsol in,” ati. <sup>41</sup> Ahivangin Pakai in amanu hengah aseiyin, “Ngailut Martha, nangma hitiho jouse chungah hi lunggima lung

himo nahi.” <sup>42</sup> “Thilkhat bouseh khohsah le lunggim nading aume. Maryn hichu akimudoh in, chule amanu a kona kilamang thei lou ding ahitai,” ati.

## 11

### *Jesun taoding dan ahil*

<sup>1</sup> Khatvei hi Jesu munkhat ah taona mangin aume. Ahin chai chun, aseijuite lah'a khat akom'ah ahungin aseiyee, “Pakai, taoje neihil'un John in aseijuite ahil bangin” ahung ti. <sup>2</sup> Jesun aseiyin, hitia hi natao dingu ahi: “Hepa, namin chu thengtah in kikoi hen, nalenggam hung lhung loi hen <sup>3</sup> Niseh a kangaichat u anneh nei peuvin <sup>4</sup> Chule kachonset nau ngaidam in, Kachunguva chonse ho kangaidam bangun chule lhepna ah nei lhahlut sah hih'un” ati. <sup>5</sup> Chuin taoding dan ahilben, hiche thusim hi amangchai: “Tekah nan nangma jankhang kim in naloi nagol in khat'ah nachen, changlah pheng thum palah ding nadei jal'in naga chetai” Nangman akom'ah naseiyin, <sup>6</sup> “Kaloi khat tuchun eivil dingin ahung vailhungin, chule keiman ima nehsah ding kaneipoi, tin nathum tai.” <sup>7</sup> Chuleh tekahnan, ama chun alupna dan sunga kon chun, “Nei houloh tahih in. Kot jong tujana dinga kikhah ahitai, ka insungmi te le keima jong jalkhun'a kabon chauva umah kahi tauve. Nakithopi thei ponge,” ahin ti. <sup>8</sup> Hiche hi kaseipeh nahi-ihamtin ajol le agol ahijeh chun bolhah jingle, nangman kot sottah nasuh suh jenga ahileh, ama thoudoh intin nathil thum chan chu napeh ding ahi,

jahcha lou hel'a napansot jeh'a chu, ati. <sup>9</sup> “Chule hijeh a chu kaseipeh nahiue, thum jing jengun, chule nathum chu namu ding ahi.” Hol jingin chule namu ding ahi. Kot chu kiu jing in chutileh kot chu nakihonpeh ding ahi. <sup>10</sup> Ajeh chu athum chan'in akisan in, ahol jousen amun. Chule kot kiu jouse akot kihonpeh ding ahi. <sup>11</sup> “Pate ho, nachateuvin nga athumleh, akhel'a gul napeh um? <sup>12</sup> Ahilouleh ahtui athum nauva aipi napeh uvam? Henge napepouve! <sup>13</sup> Hijeh a chu nangho michonsen bon nachateu thilpha pehje nahet uleh, van'a um napauvin Lhagao Theng iti napehda diu ham athum ho jouse dinga” ati.

### *Jesu chule Beelzebul*

<sup>14</sup> Nikhat Jesun mi apaotheilou khat a konin thilha anodoh peh in ahi, chule thilha chu apodoh jou chun, mipa chu ahung paodoh pan tai. Mihonpi chun kidang asauvin, <sup>15</sup> ahin miphabep khat chun, “Athilha nodoh chu lungdon ding ahipoi. Aman athilbol theina khu Satan, thilhate lengpa'a kona amu ahi,” atiuve. ✧ <sup>16</sup> Adanghon, Jesu patep nom nan, van'a kon melchihna kidang, athaneina photchetna a avetsah dingin angeh un ahi. ✧ <sup>17</sup> Alunggel u ahetan, hijeh chun aman aseitai, “Itobang lenggam hileh khat le khat kidouna a kibung khen kiti chu amangthah ding ahi. Insungkhat jong kidouna a kibung khen chu lhulham ding ahi. <sup>18</sup> Nanghon keima Satan in eisuh thahat danin naseiyuve. Ahin Satan chu akikhentel'a ama le ama akidou le

---

✧ **11:15** Matt 9:34; 10:25    ✧ **11:16** Matt 12:38; 16:1; Mk 8:11



alenggam chu iti khantou tantem? <sup>19</sup> Chuleh kei chu Satan suhthahat kahi leh, nalah uva thilha nodoh ho la? Amahon jong thilha anodoh u ahi, hijeh a chu amahon nathusei jeh uva chu nahin dem diu ahi. <sup>20</sup> Amavang keiman Pathen thahatna jal'a thilha kanodoh ahileh, Pathen lenggam chu nalah uva hunglung ahitai. <sup>21</sup> Ajeh chu Satan banga mihat tah khat chu amanchah kimkeiya akivon a a'inp'i akiventup teng leh anei agou ho bit ahi— <sup>22</sup> ama sanga thahatjo khat'in ahung bulhu a, athaneina alahmanga, agal manchah achom'a, chule anei agou apoh mang ho ahopchek kah'a chu. <sup>23</sup> Koi hileh keimatoh pangkhom lou chu eidoudal ahi, chule eikhop khompi lou chu athechek ahi.” ✧

### *Lhagao gilou hung kile kit*

<sup>24</sup> Lhagao gilou khat in mihem khat adalbah teng leh, nelgam lah dungah achejin, kicholna ding mun aholjin ahi. Ahin khatcha amulou teng leh aseijin, “Kahungdoh na mipa koma kile tange,” ati. <sup>25</sup> Hijeh chun akilen ahileh ana umnasa in chu akitheh thengsel'a chule kitup sel'a aumchu amun ahi. <sup>26</sup> “Chuin hiche lhagao chun ama sanga giloujo lhagao sagi ma amun, chule amaho abon'un hiche mipa sunga chun alut un aching tauve. Chuin chuche mipa chu amasa'a sangin akhoh cheh jitai,” ati.

### *Nopna tahbeh*

<sup>27</sup> Hitia thu aseil lai chun, mihonpi lah'a kon chun numei khat in ahin kouvin, “Pathen in nanu phatthei boh hen-nahung kondoh na

---

✧ 11:23 Mk 9:40

naobu, chule nahin chep noi jong,” ati. <sup>28</sup> Jesun adonbut in, “Ahin hiche sanga chu Pathen thu ja'a anatoch a podoh ho chu anunnom cheh ahiuve” ati.

### *Jonah melchihna*

<sup>29</sup> Mihonpin Jesu anehchin to laitah in, aman hitin aseiyee, “Hiche khang gilou hin melchihna kidang kavetsah dingin aseisei jenguvin; ahin melchihna kapeh ding chu Jonah melchihna bouseh hiding ahi. ☆ <sup>30</sup> Ama chungga thilsoh chengchu Pathen in Nineveh mite henga asol ahi ti melchihna ahi. Mihem Chapa chungga thilsoh jong hiche miho dinga Pathen sol ahi melchihna ahi.” ☆ <sup>31</sup> “Sheba lengnun, thupi kitan nikho leh hiche khang mite douna'a dingdoh ding themmo achanding ahi, ijeh inem itile ama mun gamlatah a konin Solomon chihna thungai dingin ahunge. Tun Solomon sanga lenjo khat hikom'ah aume-ahin nanghon athu nangai pouve. ☆ <sup>32</sup> Nineveh khomite jong thupi kitan nileh hiche khang mite douna'a dingdoh diu chule themmo achandiu ahi. Ijeh inem itile amahon Jonah thuseiya konin achonset nauva kon lungheina aneiyuve. Tun Jonah sanga lenjo khat hikom'ah aume-ahin, nanghon athu nangaipouve.” ☆

### *Jesun vah thudol ahil*

<sup>33</sup> “Koiman meivah avah in chule aselmang in ahilouleh lo akhukhum ngaipoi. Chusang chun, meivah atunna ah akitung jin, chua kon

---

☆ **11:29** Matt 16:4; Mk 8:12 ☆ **11:30** Jonah 3:4 ☆ **11:31** 1 Lgt 10:1-10; 2 Thusimbu 9:1-12 ☆ **11:32** Jonah 3:5

chun insung lut jousen avah amuthei bou uve.”  
 ✧ <sup>34</sup> “Namit chu natahsa dinga vah hinpedoh meivah ahi. Namit chu ahoi laisea, natichung pumpi chu vah dimset ahi. Ahin, aphantmo teng, natichung chu mithum in atom ahi. <sup>35</sup> Vah kaneiye tia nakigel chu muthim tahtah ahipoi ti kiphot chen in. <sup>36</sup> Vah'a chu nadimset'a, aning akah a muthim behlou nahileh, na hinkho pumpi chu, meivah vahtah in asalvah banga vahset ding ahi.” ati

*Jesun Pharisee ho le danthem ho aphosal*

<sup>37</sup> Jesun thu aseilayin, Pharisee holah'a khat'in a-in'a anne ding in atem'in ahi. Hijeh chun ama alut in dokhanga atouna mun alotai. <sup>38</sup> A anvailhun pan, amasa'a Juda chondan a khutsil bol-louva an nedia atoulhah jeng chu amun adatmo lseh jengin ahi. <sup>39</sup> Chuin Pakai chun amapa jah'a, “Nangho Pharisee hohin khon le lheng apolam siltheng chingthei tah'in nabol'un, ahin asunglam vang anen-kiloset nale gitlouna a dimset nahiuve! <sup>40</sup> Vo mingol! Pathen in asung jong chule apolam jong asem gel hilou ham? <sup>41</sup> Hijeh chun asung lang jong mivaicha ho thilpeh peh'a konin kisutheng un, chutile apumpia nathen dingu ahitai.” <sup>42</sup> “Itobang lunghem nan nangau hitam Pharisee ho! Ajeh chu nanghon som'a khat nahon sung uva anche aneopen geiyin natoh dimdem'un, hinlah adih'a thutan le Pathen ngailut nakhohsah pouve. Henge, somakhat napeh diu mong ahinai ahivangin athupijo thilho notthap hih'un.” ✧ <sup>43</sup> “Itobang lunghem nan

---

✧ **11:33** Matt 5:15; Mk 4:21; Lk 8:16 ✧ **11:42** Thempu Dan 27:30

nangau hitam Pharisee ho! Ijeh inem itile nanghon kikhopna in dunga touna thupi hoa tou le kailhang mun lah'a navale nauva min chibai naboh ding nadeiyun ahi. <sup>44</sup> Henge ipi lungkham nan nangau hitam! Ijeh inem itile nangho loulaiya lhankhuh kiselguh tobang nahi-uve. Mihon lepthol kibol chu helouvin achungah lam ajot un ahi” ati. <sup>45</sup> “Houhil” tin Hou danthu them khat in ahinkouvin, “Nathusei chun keiho jong eisujum uve,” ati. <sup>46</sup> “Henge,” tin Jesun aseiyin, “Itobang lunghem nan nangau hitam nangho hou danthu themho!” Ajeh chu nanghon pohjou lou ding houthua ngehna nasem uvin mipi na sugenthe i uvin, hinlah nakhut jung khat jong apohgih'u ngaijang peh nadingin nalam khapouve. <sup>47</sup> Lungkham na itobangin nangau hitam! Napu napa teuvin malaiya anathau themgao ho lhan nasem uvin ahi. <sup>48</sup> Ahin tahbeh in, napu napa teuvin anabolkhel u napom u vet-sahna a ahetoh'a napan u ahitai. Amahon them-gaoho anathat'un, chule nanghon amaho najop-nau photchetnan alhan nasem uve! <sup>49</sup> Hiche hi Pathen in achihna a nangho chungchang anasei chu, Keiman themgao le solchah ahenguva kasol ding, ahivanga amahon abang athauva abang abolset diu ahi. <sup>50</sup> “Chutia chu hiche khang mite hi vannoi kiphudoh a pat Pathen themgao kithat ho jouse chungga mopo diu ahi.” <sup>51</sup> Abel kitha a pat a Zechariah, maicham le muntheng kikhah a kithat pa geiya hiche khang mite kingoh ding ahi. ✧ <sup>52</sup> “Itobang lunghem nan nangau hitam nangho

---

✧ **11:51** Semtilbu 4:8; 2 Thusimbu 24:20,21

hou danthu them ho! Ajeh chu mipi a kon'in hetna kot-heh mihoa konin naladoh un, nangho tah jong lenggam sungah nalut pouve, chule adang alut ding jong najada uve," ati. <sup>53</sup> Jesun adalah got toh kilhon in, hou danthu hilho Pharisee ho chun ahin galmimu cheh cheh un, chule thudoh tamtah doh a suh lunghang ding agouvin ahi. <sup>54</sup> Amahon thangkol'a osah ding hehset nathei thuseidoh sah ding atiu ahi.

## 12

### *Jesun seijuiho atil-khou*

<sup>1</sup> Hiche pet chun, mihonpi chu asang ajan ahung khang in akisucheh chuh un chule khat le khat kichonkha ton aumun, Jesun hichun aseijuite henglam ahin ngan agih sal in, "Pharisee ho chol a konin kihong phauvin"—aphat lhemnauva kon'in. ✧ <sup>2</sup> Phat ahung lhunge, thil akikhukhum jouse kiphongdoh ding ahi, chule aguh'a umjouse jong mijouse koma kihetsah ding ahi. ✧ <sup>3</sup> Muthim'a nasei jouseu chu khovah a kija ding ahi, chule kot kikhakhum na a olcha nakiseipeh toujong chu inchunga mijouse jah'a kiasmphong ding ahi! Gin Ding Koipen Ham? <sup>4</sup> "Ngailut umtah jol le gol te, natahsa that thei hochu kicha hih'un." Hiche jou le chun nachungah ima abolthei tapouve. <sup>5</sup> Ahin kichat ding koi ham naseipeh unge. Pathen kichauvin, aman nangho tha nathei le damun'a lelut nathei thilboltheina tha anei ahi. Henge, ama ahi kichat ding. <sup>6</sup> "Vasah nga man ijat ham-paisa

✧ **12:1** Matt 16:6; Mk 8:15 ✧ **12:2** Mk 4:22; Lk 8:17

ni man ham?” Ahin Pathen in khat jeng jong asumil pon ahi. <sup>7</sup> Chuleh nalu'a na samjang ho jengjong aboncha kisimtoh soh ahitai. Hijeh chun kicha hih'un; nangma vasah honpi jouse sanga manlujo nahi.

*Mihem masanga Christa phondoh ding*

<sup>8</sup> Kaseipeh nahiuve, koi hileh hiche leiset'a lhangphonga keima eiseidoh chan chu, Mihem Chapan jong Pathen Vantilte jaona'a aseidoh ding ahi. <sup>9</sup> Amavang koi hileh hiche leiset'a eiseilep chan chu Pathen Vantilte masanga kiseilep diu ahi. <sup>10</sup> Koihileh Mihem Chapa douna thusei chan chu kingaidam ding ahi, amavang koi hileh Lhagao Theng taitom'ah vang chu kingaidam louding ahi. ✧ <sup>11</sup> “Chuleh kikhopna in'a vaipo hole thuneiho anga athu tan dinga nahin kai teng uleh, iti nakiven ding ham ahiloule ipi nasei ding thu ah lunggim hih un. ✧ <sup>12</sup> Ajeh chu Lhagao Theng chun apettah a seiding napeh diu ahi,” ati.

*Hao jeh'a ngolpa thulem*

<sup>13</sup> Chuin koiham khat'in mipi lah'a kon chun ahin kouvin, “Houhil, kasopipa jah'a kapa nei le gou eikihoppi nadingin seiyin,” ati. <sup>14</sup> Jesun adonbut'in, “Jol, kon nangni kah'a thutan'a eipansah'a, hiti khati iti kagel lhah ding ham?” ati. <sup>15</sup> Chuin aman aseiben, “Chingtheyyun! Neipap kiloset kiti jouseah kivengun. Hinkho hi naneijat a kisim ahipoi,” ati. <sup>16</sup> Chuin aman thusim khat aseipeh tai: “Mihao khat hin loumun khat, alei phatah, ga hoitah tah sodoh

---

✧ **12:10** Matt 12:32; Mk 3:29 ✧ **12:11** Matt 10:19,20; Mk 13:11; Lk 21:14,15

aneiyin ahi. <sup>17</sup> Amapa achangin akihoulim in, ‘Ipi kabol ding hitam? Ka lousoh ga jouse koina ding mun la kanei pon,’” ati. <sup>18</sup> Chuin aman aseiyin, Kahetai! Kachangsal jouse phelhang ting asanga lenjo cheh thahsah inge. Chutileh keiman ka chang le mim jouse kholkhomna ding dan ninglhingset in nei tange. <sup>19</sup> Chutengleh keima nomtah'a katouva keima le keiman hitia hi kasei ding ahi, “Kajol, nangman kumsottah a ding ninglhing set'a kikhohom naneiye. Tun lung olmo hih in! nen lang, don'in lang, chule kipah in!” tinge ati. <sup>20</sup> Ahivangin Pathen in amapa jah'a chun, “Mingol! Tujan ma ma'a nathi ding ahitai. Chuteng leh nanatoh ga jouse hi koi chang tantem?” ati. <sup>21</sup> “Henge, lei gouthil bouseh kholkhom'a Pathen toh haosatah'a kiguijopna neilou mi chu angol ahi” ati.

### *Lungkham hih un*

<sup>22</sup> Chuin, aseijuite kom lang ngan Jesun aseitai, “Hiche jeh'a hi keiman nitin hinkho a dingin lunggim hih'un kati ahi”—neh le chah ninglhing set'a chule sil le chen lhingset'a kanei ding hinam tin. <sup>23</sup> Ajeh chu hinkho hi anneh ding sanga lujo, chule natahsa jong sille chen sanga lujo ahi. <sup>24</sup> Va-ah ho khu veuvin, amahon tula atu pouvin, at la a-at pouvin ahiloule khol la akholkhom pouvin, ajeh chu Pathen in avahnai. Chule nangho vacha ho sanga ama dinga loupijo nahiuve! <sup>25</sup> Nalunggim nau jousen nahinkho phat bihkhath ajopbe theiyem? <sup>26</sup> Chule lunggim nan imacha chutobang thil neocha jong alohin sah theilouleh, thil lentah chungga jong lunggim

chu ipi phachom ding ham? <sup>27</sup> “Lily pah ho le akhan doh dan khu veuvin. Amahon na jong atong pouvin chule avon hou jong akisem thei pouvin, ahin, Solomon jeng jong, aloupina jouse a akivon chun amaho tobang lom'in ahoijou poi. ☆ <sup>28</sup> Chuleh Pathen in pahcha ho tunia uma jing a meilhum sunga selut ding bon kidangtah'a akhohsah'a ahileh, aman nangma thonlouva nakhohsah teitei ding ahi. Ipi bol'a hibanga tahsan na neo hi naneiyu ham?” <sup>29</sup> “Chuleh ipi kaneh ding ham ipi kadon ding ham tin lungboi hih'un. Hiche ho thil'a chun lunggim hih'un. <sup>30</sup> Hiche thil hohin vannoi pumpia atahsanlou ho lungsung alodim'in ahi, ahivangin Napauvin nangaichat changseu chu ahemasa jitai. <sup>31</sup> Pathen lenggam chu thil jouse sangin hol'un, chule aman nangaichat chan'u napeh diu ahi.”

*Vana gou khol*

<sup>32</sup> “Hijeh chun kicha hih'un, hon lhom ho, ajeh chu nangho lenggam peh ding hi napau dinga kipana lentah ahi.” <sup>33</sup> “Nanei nagou ho joh'un lang angaicha ho peuvin. Hichun van'a gou nakhol peh dingu ahi! Chule van-gam a sumdip hon chultih aneipouvin chule atovang aum khapoi. Nagou khol chu bitkeiya umding ahi; guchan jong aguhmang theilou ding ahi chule nget'in jong asuhset thei lou ding ahi.” <sup>34</sup> Nanei nagou umna'a chu nalung ngaichat jong aum ding ahi. Hetman Louva Jesu Hung Kit Ding <sup>35</sup> “Natohna dingin kivontup san umun

---

☆ **12:27** 1 Lgt 10:4-7; 2 Thusimbu 9:3-6



chule nathaomei vahjing'un; ✧ <sup>36</sup> Na Pakai pa moupui golvah na'a kon ahung kile ding nanga bangin. Chutileh ahung lhun'a kot ahinsuh teng leh kot nahonpeh a nalutsah thei nadia phasadema naum ding ahi. ✧ <sup>37</sup> Soh ho kiging jinga umho le ahung kile ding ngah jing ho chu kipaman kipedihi ahi. Thutah kaseipeh nahiueve, amatah in amaho chu atousah ding, atai akikhi ding, amaho chu atou uva aneh laiuyva chu ajen ding ahi. <sup>38</sup> Ama jankim lah ahilou le khovah kon'a hung maithei ahi. Ahin, ahung pet a kiging jinga um sohte chu kipaman apehding ahiueve.” <sup>39</sup> “Hiche hi hethem in, in-neipan itih phatchet'a gucha hung ding ham ti heleh, aman a-in chu veihonga aumsah lou ding ahi. ✧ <sup>40</sup> Nangjong kiging jinga naum jing ding ahi ijeh inem itile Mihem Chapa chu nagingchat lou pettah uva hung ding ahi,” ati.

*Lhacha kitah chule lhacha kitah lou*

<sup>41</sup> Peter in adong in, “Pakai hiche thutekah chu keihoah ding bou hai mijousea ding ham?” ati. <sup>42</sup> Chuin Pakaiyin adonbut in, “Soh kitah le lung limgeh chu apakai pan insung pumpi le soh dang ho chungah jong mopohna apeh'a avahsah ho chu ahi. <sup>43</sup> Apakai pa ahung kile a asohpan na phatah'a atoh ahung mu leh, kipaman umding ahi.” <sup>44</sup> Thutah kaseipeh nahiueve, hitobang soh chu apakai pan anei jouse chungah mopohna apehding ahi. <sup>45</sup> Ahinlah, iti tantem asohpa chun, “Kapakai pa hi tem'in hung ponte” tin gelhen

---

✧ **12:35** Matt 25:1-13   ✧ **12:36** Mk 13:34-36   ✧ **12:39** Matt 24:43,44

lang, asohdang ho vo hen, neh nom ne hen, ju kham kham jeng taleh? <sup>46</sup> Apakai pachu seiphong masa lou leh ginchat umlou pettah in hungin tin, chuteng aman asohpa chu asat goi goi ding mikitah louho toh asolmang tha ding ahitai. <sup>47</sup> “Chule soh khat apakai pa dei he'a, ahivanga kigongtup lou chule akihilchah na ho tongdoh lou chu, nasatah a bolgimna ato ding ahi. <sup>48</sup> Ahivanga ahelou khattou chun thilse abol leh, ama chu gihsa louva kigimbol ding ahi. Koiham khat chu tamtah akipeh le, ama a kona chu tamtah kile ngeh ding ahi; chuleh khattou chu mopohna tamtah akipeh le, asanga tamjo chu kingeh ding ahi.” <sup>49</sup> “Keima vannoi hi meiya tih dinga kahung ahi, chule akoudoh hitaleh katilheh jenge! <sup>50</sup> Keiman thoh hahsa tah baptize chanding kamakho'ah kaniye chule hichu akimolso kah a kalung khamna iti san tam! ✧ <sup>51</sup> Leiset a chamna hinpo dinga hunga nei gel'um? Ahipoi, keima miho kibung khensah dia hung'ah kahi! <sup>52</sup> Tua pat'a insung ho kikhentel diu ahitai, thum'in eijop uva, nin eidoudal ding–ahiloule nin eijop'a thum'in eidou ding ahi. <sup>53</sup> Mipa chu chapa douna'a chule chapa chu mipa douna a kibungkhen ding ahi; chanu douna minu chule minu douna'a chanu; chuleh ateh in mou douna chule mouvin ateh douna'a kikhenna um ding ahi” ati. Phat Kihei-Dan Hetna ✧ <sup>54</sup> Chuin Jesun mihonpi lam aven aseiyee, “Nanghon meibol lhumlam langa ahung umdoh phat le, nasei jiuvin, ‘go hung juding ahi’ natiuve.

---

✧ 12:50 Mk 10:38 ✧ 12:53 Micah 7:6

Chuleh nangho nadih uve. <sup>55</sup> Lhlanglam hui ahung nun teng leh, naseijiuvinn, ‘Tuni chu salheh ding ahi’ natiuvin, chule achuti ji'e. <sup>56</sup> Nangho mingolho! nanghon leiset chung a van umje nasuto theiyun, ahin nanghon tuphat umdan naledoh thei pouve.”

*Nahehpa chutoh kicham teiyin*

<sup>57</sup> “Ipi jeh'a nangho ding a adih chu naki gell-hah thei lou u ham?” <sup>58</sup> “Nangho thukitanna muna nahehse hou toh nache teng uleh, amun nalhun masang in kihoutoh pi ding gon. Achuti louleh thutan vaihomp a masanga nahehse pan nakai ding, aman vaipopa henga napehdoh a, aman songkul'a nakhum ding ahi. <sup>59</sup> Chule hichu aso leh nangman achainapen sum geiya napeh doh masang sea itinama jong leh nakilhadoh louhel ding ahi,” ati.

## 13

*Jesun lungheiyun tia asap phong*

<sup>1</sup> Hiche phat lai hin Pilate in Galilee gam mi phabep'in Hou'in a kilhaina gantha abollaiyun athat'e tithu Jesu seipeh in aumin ahi. <sup>2</sup> “Hiche Galilee miho chu Galilee gam midang ho jouse sanga chonse joa nangaito uvam?” tin Jesun adongin, “Hijeh a chu chutia thoh genthei athoh u ahi natiuven? <sup>3</sup> Ahipoi, kaseipeh nahiue, nalung nahei uva Pathen lam'a nakihei lou uleh nangho jong mangthah ding nahiue. <sup>4</sup> Chuleh Siloam inting achima adellih mi somleget hochu la? Amaho chu Jerusalem a ding a michonse pen ho hitauvam? <sup>5</sup> Ahipoi, chule kaseipeh kit

nahiue, nalung nahei lou uleh namanthah diu ahi” ati.

*Theichang aga umlou*

<sup>6</sup> Chuin Jesun hiche thusim hi ahinseiye: “Mikhat in ahonsung ah theichang phungkhat atun chule avel vel in aga umding ham tin ahung ve jin, hinlah amapa alung lhalheh jeng jin ahi.

<sup>7</sup> Achainan honlhou pa jah'a, Kumthum hulteh kanga ahitai, ahin tuchan'in theichang khatbeh jong aga poi! Phuhlhu uvin,” ati. Honsungah mun alobep seuvin anohphah e, ati. <sup>8</sup> “Hon

lhoupun adonbut in, ‘Pakai phat khatvei peh ben, kumkhat umсах ben, chule keiman phatechan vesui ingting leiphath na ding tampi sung inge.

<sup>9</sup> Khovei leh theichang imu le aphai. Imulou uleh, na phuhlhu thei ahitai’ ati” tin aseiyе.

*Jesun cholngah nikhoa aboldam*

<sup>10</sup> Cholngah ni khat hi Jesun kikhopna in'a thu ahil pet hin, <sup>11</sup> Numei khat lhagaoboh in lam jot moa alha amui. Kum somleget jen tingbong'a dingjang thei louva alha ahi. <sup>12</sup> Jesun amanu amu chun, ahinkouvin aseitai, “Ngailut umtah numeinu, nanat na'a kona kisudam'ah nahitai,”

ati. <sup>13</sup> Chuin amanu chu atham'in ahileh amanu jong chupettah chun adingjang thei tai. Pathen iti avahchoi hitam! <sup>14</sup> Ahivangin kikhopna in'a lhacha mopopa chun cholngah nia amisuhdam jeh chun nommo asan. “Hapta sunga nigup natoh nading um ahi,” tin mihonpi jah'a chun,

“Hiche nikho ho a chun hungun, Cholngahni hilouvin” ati. ☆ <sup>15</sup> Ahivangin Pakaiyin adonbut

☆ **13:14** Potdohbu 20:9,10; Danbu Ni Na 5:13,14

in, “Miphalhem ho! Nabon uva Cholngah nia na natoh sohkeiyu chula! Na bongchal ham ahiloule na sangan ham Cholngah nia akihenna a pat a sutlham'a tui donsah dia napui jiu hilou ham? <sup>16</sup> Hiche lungset umtah numeinu, Abraham chanu hi, Satan in kum somleget jen soh'a ahentang ahi. Cholngahni hijongleh chutobang suhdam chu dihluu ham?” ati. <sup>17</sup> Hichun agalmi ho asujum in, ahin mijousen thilkidang abolho jeh chun akipah tauve.

### *Ankam mu thulem*

<sup>18</sup> Chuin Jesun aseiyin, “Pathen Lenggam chu itobang ham? Iti katekah ding ham? <sup>19</sup> Ankam mu neocha tobang mikhat in hon'a atu tobang ahi; ahung khangin chule thingphung ahung kisah e, chule vachaten abah tin'ah genading bu akisah jiuve,” ati.

### *Chol thulem*

<sup>20</sup> Aman adong kit in, “Pathen Lenggam chu ipi toh kitekah ding ham? <sup>21</sup> Nupi khat in changlhah asemna a amanchah chol tobang ahi. Changbong atena dimthum'a chol neocha akoi ahivangin, apumpin ahin thulha jin ahi,” ati. <sup>22</sup> Jesu khopi hole khoneo tin'ah achen, achena chan'ah thu ahil'in, Jerusalem lam amano jinge. <sup>23</sup> Koiham khat in ahin dongin, “Pakai, mi themkhat bou huhhing'a um ding ham?” ati. Aman adonbut in, <sup>24</sup> “Pathen Lenggam lutna a kotjim lam'a lutna dingin kihabol un, ajeh chu mi tamtah'in lutding agotding ahivanga losam diu ahi. <sup>25</sup> In neipan kot akam jou teng, geisang val ding ahitai. Nangma pamlam'a nadin'a kot nakiu ding chule

natao ding, ‘Pakai, keiho dingin kot neihon peh un!’ nati ding, ahivanga aman nahin donbut diu, ‘Keiman nangho koi nahiu ahiloule hoiya kon nahiu kahekhapoi’ ati ding ahi. <sup>26</sup> Chuteng nanghon naseidiu, ‘Ahivanga nangma toh kaneh uva kadon uva, chule kalampiu lah dunga jong neinahil u chula’ natidiu ahi. <sup>27</sup> Chule aman hitia hi ahin donbut ding, ‘Kaseipeh nahiuve, keiman nangho kahekhapoi chule hoiya kona hung nahiu kahepoi. Kakoma konin potdoh’un, nangho thilse bolteho.’ ✧ <sup>28</sup> ✧ Chumun’a chu ka le hagel um ding ahi, ijeh inem itile Pathen lenggam a chu Abraham, Isaac, Jacob, chule themgao jouse namudiu ahi, amavang nangma nakipaidoh ding ahi. ✧ <sup>29</sup> Chule miho vannoi pumpi–solam le lhumlam a pat, sah le lhang a pat–Pathen lenggam’a amun’u kilo dinga hung khom diu ahi. <sup>30</sup> Chule hiche hi kichin in: mi phabep tua mi-noinung pen dan’a umhohi khonung leh alenpen hidiu ahi, chule tua alenpen hohi aneopen hidiu ahi,” ati. ✧

### *Jesun Jerusalem agihsal*

<sup>31</sup> Hiche pet chun Pharisee ho phabep khat in ajah’a, “Hikoma konin potdoh’in nakihinso nom leh! Herod in nathatdoh nom’e!” atiuve. <sup>32</sup> Jesun adonbut in, “Cheuin lang chuche si-al chu gaseipeh un, thilha kanodoh jing ding chule ana damlou kasuhdam jing ding, tunia jong jinga jong; chule anithum nile kahung lona kasuh bulhit ding ahi. <sup>33</sup> Henge, tuni le jing,

---

✧ **13:27** Labu 6:8 ✧ **13:28** Matt 8:11,12 ✧ **13:28** Matt 22:13; 25:30 ✧ **13:30** Matt 19:30; 20:16; Mk 10:31

chule ajing kit le kalampia chu kachejom ding ahi. Ajeh chu Jerusalem tailouva themgao kithat theilou ding ahi.” <sup>34</sup> “O Jerusalem, Jerusalem, themgaoho that le Pathen sottolle ho songa seplih khopi! Ijat vei ahpin anoute alhaving noiya a-opkhum banga nachate khoftup ding kagot ham, ahivangin neibolsah poi. <sup>35</sup> Chuleh tun, ven, na-in hi kidalha ahitai. Chuleh nangman neimu kitlou ding ahitai, ‘Pakai min'a hungpa anunnom'e!’ tia naseikit tokah'a,” ati. ✧

## 14

*Jesun cholngah nikhoa thongpohvei khat adamsah*

<sup>1</sup> Cholngahni khat Jesu nilhah an nedin Pharisee ho lamkai khat in'ah achen, chule miho chun phatah in avelhiuvin ahi. <sup>2</sup> Hiche a chun mikhat, aban le akengho pom khat aumin ahi. <sup>3</sup> Jesun Pharisee hole danthu themho chu adongin, “Cholngah nikhoa misuhdam danthun aphal hai aphallou ham?” ati. <sup>4</sup> Amahon adonbut nom lou phat un, Jesun anapa chu atham'in chule asudam'in asolmang tai. <sup>5</sup> Chuin amaho lam ngan aseitai, “Nangho cholngah nia natonglou koi naum uvam? Nachapa ham ahiloule na bongchal hamkhat kokhuh a alhahlut le, aladoh dinga nakino ji hih um?” ati. ✧ <sup>6</sup> Avel'in adonbut thei kit tapouve.

*Jindot them chule lungnem*

<sup>7</sup> Nilhah anne a hung jouse chun touna nom nom jabolna mun achu cheh'u Jesun amu phat

in, aman amaho chu hiche thumop hi apen ahi. <sup>8</sup> “Moupui golvah na'a kouna namu teng uleh, jabolna munhoa tou hih un. Ijem tin nang sanga jabolna chang ding khat ana kikou khataleh ipi tin tem?” ☆ <sup>9</sup> Kinneipa chun ahung seiding, “Natouna chu hiche mipa hi pen” atiding ahi. Chuteng nangma najah cha ding ahi, chutengleh dokhang noiya kikoi touna hoa chu natou ding ahitai! <sup>10</sup> “Chusang chun dokhang kengbul mun nemnung pen'a chun touvin. Chuteng kinneipan nahin muding nahenga hunga, ‘Jol, nang dingin mun phajep kaneiyuve!’ ahung tiding ahi. Chuteng nangma chu jin kikou dang ho masanga jana nachan ding ahi. <sup>11</sup> Ijeh inem itile ama kichoisang chan chu suhnem'a umdiu ahi, chule akineosah chan chu dopsang'a umdiu ahi” ati. ☆ <sup>12</sup> Chuin in-neipa chu aven, hitin aseiyeh “Nangman nehkhom ahilouleh golvah nabol teng, naloï nagol ho, nasopiho, na inkote, chule naheng nakom mihao ho kou hih'in. Ajeh chu amahon nangma nahin koukit diu ahin, hiche bou chu natohga hiding ahitai. <sup>13</sup> Chusang chun mivaichaho, chatmo ho, elbai ho, chule mitcho ho kou jon. <sup>14</sup> Chuteng michonpha thokitna'a Pathen in nanungsah joulou ding ho nakou jeh a nangma tohphatman napeh ding ahi,” ati.

*Vangam golvah loupï thulem*

<sup>15</sup> Hiche thu ajah hin mikhat dokhanga Jesu toh toukhom khat in, “Pathen Lenggam'a golvah ankonga galhah ding iti anop tadem!” tin

---

☆ **14:8** Thuchihbu 25:6,7 ☆ **14:11** Matt 23:12; Lk 18:14



ahin phongdoh e. <sup>16</sup> Jesun adonbut nan hiche thusim hi aseipeh e: Mikhat hin golvah lentah abol in kouna lekha jong tamtah athot doh tai. <sup>17</sup> Golvah anneh khom chu gontup ahiphat in, asohte asol'in, akikou ho jah'a, "Hungun golvah ankong gontup ahitai" agatisah'e. <sup>18</sup> Ahivangin amahon abon'un ahitheilou nau thu aseiyun ahi. Khat in, "Tutah chun loumun kachon kavettoh lou akhoh'e, lungsettah in nei ngaidam in" ati. <sup>19</sup> Khat kit chun, Keiman tutah chun bongchal to-nga kahin chon, hithei nam ti kavet got ahi, lungset'in nei ngaidam un, ati. <sup>20</sup> Achom khat in, tun ji kaneiyyin, hijeh chun hung thei ponge, ati. <sup>21</sup> "Sohpa chu akilen apakai pa kom ah ipi iti adonbut'u aseipeh tai. Apakai pachu alung hang in hitin ahinsei tai, 'Kintah'in chenlang, khopi sung lamlen tin'ah mivaicha ho, chatmo ho, mitcho ho, chule elbai ho gakou tan' ati. <sup>22</sup> Asohpan hichu aboljou phat in, ahung hetsah in, 'Mun a-ong nalaiye' ahung ti. <sup>23</sup> Hijeh chun apakai pan aseiyin, 'Chedoh in lang lamlen pam lah dung chule aning kah lah'a um koi hijong leh, namu mu hinkouvin, ka-in mi adim nadingin' ati. <sup>24</sup> Ajeh chu kakou masat ho chun golvah an chu aneokhat jong atekhah lou diu ahitai," ati.

### *Jesu seijui hina amanlut dan*

<sup>25</sup> Mihonpi tamtah chun Jesu nung ajuiyu ahin, ama akihei kol'in ajah'uva aseitai, <sup>26</sup> "Nangho kaseijui nahi nom uleh, mijouse nahot ngai ahi, tekah na'a-Nanu napa, naji nachate, nasopi hohenge, nangma hinkho tah jong chu. Achuti loule

kaseijui nahithei lou ding u ahi.” ✧ 27 Chule na thingpel nakipoh'a kanung najui lou leh, kaseijui nahithei lou diu ahi. ✧ 28 Ahivangin kipan hih'un athoh hah ding dan nasimtoh masang'un. Ijeh inem itile, kon insah apat ding ham amasa'a alutding jat vetoh'a, ajona dinga sum ninglhing ding hinam ti simtoh masalouva? 29 Achuti loule akhombul bou najoa sum nabei maithei ahi, chuteng chuleh mijousen nanuisat bepding ahitai. 30 Amahon seiyunte, “Hiche pa khu ahi, insah kipan'a aban ajona ding boldoh joulou pa khu” tiuvinte. 31 “Ahilouleh, Leng khat galbol ding, koi athumop them hotoh toukhom'a, asepai sang som chun ama nokhum dinga hung kon sang som ni chu ajoding hinam ti kigel masalou ding'ah? 32 Chuleh ajolou ding leh, palai sol'in tin, agalmi ho gamlat pet'a chu kihoucham ding agot tei ding ahi. 33 Hijeh a chu nanei jouse napehdoh tokah a kaseijui nahithei lou diu ahi.

### *A'al tamsa chi*

34 “Chi hi asu-al dingin apha. Ahin, a-al na chu mansah taleh, iti na-alsah kit ding ham?” 35 A-al lou chi chu leiset a dinga jong chule leithao a dinga jong phachom lou ahi. Paidoh in aumji tai. Koi hileh nakol neichan in ngai hen chule hetthem hen.

## 15

### *Kelngoi kimansah*

---

✧ 14:26 Matt 10:37 ✧ 14:27 Matt 10:38; 16:24; Mk 8:34; Lk 9:23

<sup>1</sup> Kaidong hole adang michonse ho Jesu thuhil ngai dingin ahung jiuvin ahi. ☆ <sup>2</sup> Hiche hin Pharisee hole hou danthu hil ho aphunchel sah tan, michonse hotoh akipol'in nejong anekhom uve! tin aseitauve. <sup>3</sup> Hijeh chun Jesun hiche thusim hi aseipeh in ahi: <sup>4</sup> “Mikhat in kelngoi jakhat neihen chule alah'a khat chu vahmang taleh, ipi bol tantem? Adang somko le ko ho chu gamthip a adalhah'a chule avahmang pachu amu tokah'a agahol lou ding ham? <sup>5</sup> Chuteng ahinmu tengleh, kipah tah in a'in lam'a din alengkouvah hin kipoh tante. <sup>6</sup> Ahung vailhun tengleh amapan aloi agol chule aheng akom koukhom in tin, ‘Nei kipa khom piuvin ajeh chu keiman ka kelngoi mangna chu kakimutai’ tinte. <sup>7</sup> Chutobang a chu michonse khat in lunghei na aneiya Pathen lama akile kit chun adang somko le ko lunghei ngailou michonpha ho chung sangin van'ah kipana aume. Sum-Pum Kimansah <sup>8</sup> Ahilouleh, tekah nan, numei khat hin sum dangka som aneyin chule khat amansah tai. Amanun meivah adet'a insung pumpi ateh'a chule chingthei tah'a amu tokah'a ahol lou ding ham? <sup>9</sup> Chule amanun hichu amuteng, aloi apai chule aheng akom cheng akoukhom ding, ‘Nei kipapiuvin, ajeh chu kasum mang kakinungmu tai’ atiding ahi. <sup>10</sup> Chutobang chun van'ah Pathen Vantilte pan na'in, michonse khatseh lunghei na chungah kipana aum'e” ati.

### *Chapa vah mangpa*

<sup>11</sup> Athusei hilchet be theina din hiche thusim hi aseiyin ahi: “Mikhat in chapa ni aneieye. <sup>12</sup> Anejo pan apa jah'a, ‘Nathi masangin nanei nagou kachan ding ho tun kadei tai’ ati. Hijeh chun apan achateni chu anei agou ho hoppeh dingin anomtai. <sup>13</sup> Niphabep jouvin hiche chapa nejo pa chun anei jouse akisemtup in mun gamlatah a dingin achetai, chule hia chun asum le pai jouse hindan kinomsah nan asumang tai. <sup>14</sup> Chutia asum akiman chai phat chun, gam-sunga chun kel nasatah alhan, kel athoh pan tai. <sup>15</sup> Chumun'a loulhoumi khat in natoh apeh na dingin akithujon, amapan jong aloumun langah vohchate vah dingin asol'in ahi.” <sup>16</sup> Khangdong pachu agilkel lseh tan, vohchate anehsah ji voh-an jeng jong chu twilseh dingin amitmun akilang tan ahi. Ahivangin koiman nehding ape tapon ahi. <sup>17</sup> “Achainakeiya ahung khahdoh phat chun, ama le ama akihoulim in, Ka-in ah soh thalah ho jengin jong anehval set'u anneh aneiyun, kei hiche'ah gilkel'a thidingin kaume! ati. <sup>18</sup> Ka-in a kache ding kapa koma, ‘Hepa, van le nangma dounan kachonse tai, <sup>19</sup> chule keima nacha tiding hoi kahitapoi. Lungset tah in soh thalah khat bangin nei sangin, tinge' atitai.” <sup>20</sup> Chuin ama apa koma dingin inlam akile tai. Chule amapa mun gamlatah ahung gei nalaiyin, apan ahung amutan ahi. Ngailutna le khotona dimset pum'in achapa komah alhaiyin, akolchuh chuh in, achoptai. <sup>21</sup> Achapan ahin seitai, “Hepa, keima van le nangma dounan kachonse tai, chule tun nacha tiding jong kalhing jou tapoi,” ati. <sup>22</sup> Ahinlah apan asohte komah

aseitai, Gang'un! Insunga ponsil hoipen pen hinchoiyun lang silpeh un. Akhutjung'a akibu ding khutjem le akise ding kengchot hinchoiyun. <sup>23</sup> Chule bongnou ivahthao uchu that un. Eihon golvah loupi tah a ilop diu ahi, <sup>24</sup> ajehchu hiche kachapa hi athi anahitan, tua hi hung hingdoh kit ahi. Amangsa anahin, tua hi kimukit ahitai. Hiti chun golnop chu akipan tai. <sup>25</sup> Chutia aumlai chun, chapa a'upajo pachu loulanga um natong ahi. Inlam ahung kile chun, in'a chun tumbing le lam gin ajatan, <sup>26</sup> chuin asohte khat komah ipi thilsoh umham ti adongin ahi. <sup>27</sup> Nasopipa hung kile ahi, tin aseipeh un, chuleh napan bongnou thaotah chu athapeh ahi. Damsel'a ahunglhun jeh'a ilop'u ahi, tin aseipeh tai. <sup>28</sup> A'upajo pachu alung hangin insung alut tapon ahi. Apa ahungdoh in ahung tem'e, <sup>29</sup> ahin aman adonbut in, Kum hijat hi nasoh banga kaum chule bol'in nati jouse kada na umkhalou ahi. Chuleh hiche phat jouse achun nangman kaloi kagol hotoh kaneh khom diuvin kelcha nou khatbeh neinape khapoi. <sup>30</sup> Ahivangin hiche nachapan noti ho chungu nasum jouse aveichai nungin, nangman bongnou thaotah nathapeh in nalop peh e, ati. <sup>31</sup> Apan ajah'a aseiyin, "Ven, kachapa ngaitah, nangma kakomah naum jinge, chuleh kanei jouse jong hi nanga ahi. <sup>32</sup> Eihon hiche kipa nikho hi ilop diu ahi. Ijeh inem itile nasopipa hi athi'ah ahitan chule hung hingdoh kit ahi! Amangsa anahin, hinlah tun akimutai!" ati.

*Sumching kitahna beipa thulem*

<sup>1</sup> Jesun hiche thusim hi aseijuite aseipeh e: “Mihaotah khat ana um'in, aman neiching khat ima ma vesuiya anganse aneiye, ahin aneichin na ah akitah poi ti thulam leng ahunge. <sup>2</sup> Hijeh chun apansah pan ama chu akouvin aseitai, ‘Ipi ham nathu kajah hi? Na neichin ho sutup in lang neihin pen ajeh chu nachungthu kisei ding ahitai’ ” ati. <sup>3</sup> Neichingpa akingaiton, “Tua ipi kabol ding?” tin akihoulim'in, “Kapakai pan la eihaisah ahitan, lei lai dingla katha ahaton, chule thum ding la hibanga kikiletsah'a, <sup>4</sup> aphai, eihaisah tengleh loi le pai tampi kaneiya amahon a-in'a eilhunsah nadiuvin hitin bol inge” ati. <sup>5</sup> Hijeh chun apansah pa sumba jouse chu ahungkhom uva athu seitoh ahina din akoukhom sohtai. Amasapa jah'a, “Ijat nabat ham?” atileh, <sup>6</sup> mipa chun adonbut in, “Keiman olive thao twipai dim jaget kabai” ati. Chuin neichingpan aseipeh in, “Aman kijihna lekha hi kilah loiyin lang twipai jali jih in” ati. <sup>7</sup> Ahileh nangin ijat nabat em? tin anina pa adonge. Keiman suhlou chang lhuu sangkhat kabai, tin ahin donbut'e. Neiching pan aseiyin, hin, lekha hi kilah in lang lhuu jaget in jih in, ati. <sup>8</sup> Mihao pa chun chuche chondih lou neichingpan chingthei tah a abol chu apahcha tan ahi. Adih ahi, hiche vannoi chaten avel uva ho toh kipol ding dan hi khovah chate sangin achingjouve. <sup>9</sup> Kijildoh ding chu hiche ahi: Vannoiya nagouthil ho se hi midang phatchomna le jol le gol kistem nan mangin. Chuteng, nalei gouthil ho jouse abeishoh teng cheho chun tonsot in'a dinga nanalem diu

ahi. <sup>10</sup> Nangho thil neocha chungu nakitah ule, thil lentah ho chungu jong nakitah diu ahi. Amavang thil neocha chungu nakitahlou ule, mopohna lentah ho chungu jong kitahlou ding nahiue. <sup>11</sup> Chuleh leiset gouthil chungu tahsan naum louleh, kon vangou dihtah chungu natahsan ding ham? <sup>12</sup> Chuleh midang thil chungu nakitah louleh ipi jeh a nangma thil chungu nakitahsan ding ham? <sup>13</sup> “Koiman pakai ni sohna atongkop theipoi. Ajeh chu nangman khat namuda a khat nangailut tum ding ahi; khat dinga nakiphal theng'a khat nadonda thei ahi. Nanghon Pathen le sum sohna tongkhom thei pouvin nate,” ati. ✧

### *Dan thule Pathen lenggam*

<sup>14</sup> Pharisee ho, sum ngailu dehset hon, ajasoh keiyun ama chu anelpéh un ahi. <sup>15</sup> Chuin aman amaho jah'a aseitai, “Jalah'a miho mitmu'a michonpha nahinom, ahin Pathen in nalungthim ahei.” Hiche vannoi miten ajabol chu Pathen mitmua thet umtah ahi. <sup>16</sup> Twilutsah John phatlai chan'a chu, Mose dan le themgao ho thuhil chu nakai hoi leuva pang anahi. Ahin, tun Pathen Lenggam Kipana thupha chu seiphongin aumtan, chule mijouse lutding athanom in ahi. ✧ <sup>17</sup> Ahivangin danthu chu apanna umtalou tina ahipoi. Van le lei amanthah ding hi Pathen danthu neopen khat kilekhup ding sanga gamchenga baijo ahi. ✧

### *Nupa kida thudola Jesun ahil*

18 “Vetsahnan, mikhat chun ajinu ada'a mi-dang khat akichenpi le ajong'ah ahi. Chuleh koihileh ajipan ahindasa numei kichenpi jong chu ajong'ah ahi” ati. ✧

### *Mihaopa le Lazarus*

19 Jesun aseiyé, “Mihaotah khat, ponsandup le tupet ponnem kisil'a loupitah'a kivon le niseh a nomsatah'a umkhat anaum in ahi. 20 Akelkot phunga chun Lazarus kiti tiphah natna dimset, mivaicha khat aum jin ahi. 21 Chutia Lazarus jong mihaopa dokhanga an lhajah ho ducha'a aumlaiyin, uicha ho ahung jiuvin atiphah namun ho chu ahung leh jiuve. 22 Achainan, mivaichapa chu athitan chule Vantilte Abraham koma um ding'in apotaue. Mihaopa jong athin avui tauve, 23 chule alhagao chu mithi ho lah'a achetai. Chua athoh gentheina mun achun, Abraham gamlatah a aum chule Lazarus akoma atou chu amun ahi. 24 Mihaopa chu ahung pengjah'in, ‘Hepa Abraham, themkhat neilungset in! Lazarus hinsol in lang akhutjung twiyah hin delut henlang kalei hung sudap hen. Keima hiche meikong lah a hin kahesoh l'eh jeng'e,’” ati. 25 Ahin Abraham'in amapa jah'a aseiyin, chapa, geldoh in, nangman nahinlai sungin nadei jouse naneisoh keyin chule Lazarus in ima ananeipoi. Hijeh a chu tua hi ama hikom mun'a nomtah'a kiumsah a nangman hesoh nathoh ahitai. 26 Chule chuche tilouvin jong, ikikah uva hin eikhen uvah onghom lentah aume. Koiman hikom mun'a pat'a apal galkai thei lou, chule chua pat'a jong

---

✧ **16:18** Matt 5:32; 1 Crth 7:10,11



keiho kom lang koiman apal galkal thei lou ahi, ati. <sup>27</sup> Chuin mihaopan aseï kit in, Lungset tah in, Hepa Abraham, kapa in beh'a gasol in. <sup>28</sup> Ajeh chu keïman sopi pasal nga kaneïye, chule amachun hikom thoh gentheïna muna ahung lou nadiuva aga gihsal ding kadeïye, ati. <sup>29</sup> "Ahin Abraham'in aseïpeh in, 'Mose le Themgaohon agihsal nauve. Nasopi hon chua ipi asut'u hin kisimdoh nauvinte,' atipeh e. <sup>30</sup> Mihaopan adonbut kit'in, 'Ahipoi, Hepa Abraham! Koiham khat athilah'a kona akisol le, achonset nauva kona lungheïna aneïdiu chule Pathen lam'a kihei diu ahi,' ati. <sup>31</sup> Ahivangin Abraham'in aseïkit in, 'Amahon Mose le Themgaoho thu angailou uleh, athilah'a konin khat thoudoh jongleh ngaideh pouvinte,' " ati.

## 17

### *Chonset lhezna a lhahna thei*

<sup>1</sup> Nikhat Jesun aseïjuite jah'a aseïye, "Chonset na dia lhezna hi aumjing ding mong ahi, hinlah itobang lungkhamnan anga hitam alhem'a pang mi chu!" <sup>2</sup> "Na-ngongchanga sumhei song naki-o a twikhanglen'a nakilelut chu hiche aneocha ho nakipal lhuhsah sanga phachomjo ding ahi. <sup>3</sup> Hijeh chun chingtheiyun! Tahsan cha adang khat achonset leh, amachu sosal'in; chutia alung ahei le ngaidam in. ✧ <sup>4</sup> Hiche mipa chun ihamtia nikhat'a sagi vei nachunga thildihlou abol'a, abol phat jousea jong ngaidam athum leh ngaidam in" ati.

---

✧ 17:3 Matt 18:15

*Katahsan'u khansah in*

<sup>5</sup> Seijuiten Pakai jah'a aseiyun, “Tahsan na kangaichat be uve, iti kanei diu ham neisei peh un” atiuve. <sup>6</sup> Pakai in adonbut in, “Nanghon tahsanna ankammu te cha hijongleh naneiyuleh, hiche thing theimi phung koma hi, ‘Kibotdoh in lang twikhanglen'ah kileh lut in’ tijongleu chun nathu'u angai ding ahi! Sohpa Natoh Ding <sup>7</sup> Soh khat chu aloukai na ham ahiloule akelngoi chinna ham'a pat'a ahung lut teng, apakai pan, ‘Hunglut in an nekhom hite’ tin tem? <sup>8</sup> Tiponte! Hitijoh hin seiyinte, ‘Ka anneh ding nei gonpeh in, natai kigeh in lang, kaneh sungsen nei jen in. chuteng ajoujep le nenan nate’ atiding ahi. <sup>9</sup> Chuleh apakai pan asohpa chu atoh dinga lom atoh jeh a apachat em? Apahcha deh poi. <sup>10</sup> Chutobang a chu nanghon kathua nanun teng uleh hitia hi nasei diu, ‘Keiho soh lhingjoulou kanatoh diuva lom bou tong kahiuve’ nati diu ahi,” ati.

*Jesun mipah som asuhtheng*

<sup>11</sup> Jesu Jerusalem lam jon'a achejom jing lai yin, Galilee le Samaria kigamgit na mun alhung tai. <sup>12</sup> Chutia khokhat agalut lai yin, chua chun mipah som gamla thimtah in adingun, <sup>13</sup> ahung eodoh un, “Jesu, Pipu, nei khoto un!” atiuve. <sup>14</sup> Aman amaho chu aven, “Cheuvin lang thempuho gakimusah tauvin,” atipeh tai. Chutia acheuleh, aphah natnau chu suhtheng in aumtai. ✧ <sup>15</sup> Alah uva khat chun suhdam a aumchu akimu phat in, Jesu hengah ahung

kilen, “Pathen Vahchoiyin umhen!” tin apengjah tai. <sup>16</sup> Ama Jesu kengbul'ah abohkhup in, athil bolpeh na chungah kipathu aseiyin ahi. Hiche mipa chu Samaria mi ahi. <sup>17</sup> Jesun adongin, “Mi som kasuhdam hilou ham? Adang mi ko ho la? <sup>18</sup> Koiman Pathen loupina peh ding ageldoh lou hitam hiche gamdang mipa tailou?” atin ahi. <sup>19</sup> Chule Jesun hichepa koma chun aseiyin, “Dingdoh in lang che tan, natahsan in nasuhdam ahitai,” ati. Pathen Lenggam <sup>20</sup> Nikhat Pharisee hon Jesu adongun, “Pathen Lenggam itih le hung lhung ding ham?” atiuve. Jesun adonbut in, “Pathen Lenggam chu muthei melchihna ah akihedoh thei poi. <sup>21</sup> Nanghon, ‘Hikom'ah aum'e' ahiloule ‘hichea khun aume’ tin seithei pouvin nate, ajeh chu Pathen Lenggam chu nalah'uva aumtai” ati. <sup>22</sup> Chuin aseijuite hengah hitin aseiyi, “Phat ahung lhunge Mihem Chapa ahung kile na ding nikho mu nom'a naum diu, ahivanga namu lou diu ahi.” <sup>23</sup> Mihon ahinsei diu, “Veuvin Mihem Chapa khukom'ah aume” ahilouleh hivah aume, atidiu ahi, ahivangin potdoh hih un, chule jui hih'un. <sup>24</sup> Ijeh inem itile kolphe ahung phet'a van mong langkhat'a pat mong langkhat gei asalvah soh banga Mihem Chapa hung ni jong chutobang hiding ahi. <sup>25</sup> Ahin amasa'a Mihem Chapa hin thoh hahsa tapi athoh a hiche khang miten apampai diu ahi. <sup>26</sup> Mihem Chapa ahung kile teng leh, Noah nikholai toh bang ding ahi. ✧ <sup>27</sup> Chuchoe nikholai chun mihon golvah neh le don chule kichen abol'un, Noah kongsunga alut'a

chule tuisang ahunglet'a abonchauva asuhmang nikho geiyin nomsatah in hinkho amangun ahi. ✧ <sup>28</sup> Chule vannoi leiset jong Lot nikho lai toh bang ding ahi. Miho nitin akimanchah nauvah akisaboi un–neh le don, choh le joh, loulho le insah, ✧ <sup>29</sup> Lot in Sodom khopi adalhah ni jingkah chan in abol'un ahi. Chuin van'a konin mei le kath ahung julhan abonchauvin asumang soh tan ahi. <sup>30</sup> Henge, angaima banga kiseimona Mihem Chapa ahung kile kit ni geiya umding ahi. <sup>31</sup> Chucho nikho chuleh indan chungga um chun insunga athil kisemtup din lutkit da hen. Mi louva kondoh jong inlam a kile da hen. ✧ <sup>32</sup> Lot inneipi chungga ipi anasoh em geldoh un! ✧ <sup>33</sup> Nahinkho tuhchah jing nagot le namansah ding, chule nahinkho nachesah le, nahuhhing joh ding ahi. ✧ <sup>34</sup> Chucho jan leh mini jalkhun khat'a lumkhom ding; khat kila ding, khatpa kidalha ding. <sup>35</sup> Nupi nin sumhei khat'a chang agoikhom lhon ding, khat kila ding khat kidalha ding, <sup>36</sup> lou mun'a um teni jong khat kida lha'a khat kila ding ahi, ati. <sup>37</sup> “Pakai, hitiho hi itih leh soh ding ham?” tin aseijuiten adongun ahi. Jesun adonbut in, “Muthong ho kititna achun mithi long naivel ah aume ti aphotchet banga hiche melchihna ho jong chun akichaina anaitai ti avetsah ahi,” ati.

## 18

---

✧ **17:27** Semtilbu 7:6-24    ✧ **17:28** Semtilbu 18:20—19:25  
 ✧ **17:31** Matt 24:17,18; Mk 13:15,16    ✧ **17:32** Semtilbu 19:26  
 ✧ **17:33** Matt 10:39; 16:25; Mk 8:35; Lk 9:24; Jn 12:25

*Pathen in amite apanpi ding ahi*

<sup>1</sup> Nikhat Jesun aseijuite ataojing nadiu leh al-hahdai lou nadiu vetsahnan thusim khat aseipeh e. <sup>2</sup> “Khopi khat a hin thutan khat Pathen ginglou chule miho khohsah na jong neilou khat aumin ahi. <sup>3</sup> Chuche khopia meithai khat chu kinong chel'in ahung jingin, ‘Kagalmi hotoh kakiboinau hi thu adih in neitan peh'in,’ ahung tijin ahi. <sup>4</sup> Thutan pan phat chomkhat amanu chu isahlou tah in anakoiyin, ahin achainakeiyin hitin aki-houlim in, Keiman Pathen kaging pon ahiloule miho jong hole tilou kahi, <sup>5</sup> ahivangin hiche numei nu hin eisungol lhatai. Keiman thu adih'a tanlhah peh ahinadin vetpeh inge. Ajeh chu amanu hin athilthum jinga kon hin ei sulungvai lhatai,” ati. <sup>6</sup> Chuin Pakaiyin aseiyin, “Hiche chondihlou thutanpa a konin kihil un.” <sup>7</sup> “Ama jengin jong achaina a thu adih'a tandia ahin gellhah ahi. Hijeh a chu Pathen in alhenchom te, ama koma asun ajan'a kapjing techu thu adih'a atanpeh ding ahi ti nagel lou u ham? Amaho chu donlouvin kojing in te natim? <sup>8</sup> Kaseipeh nahiuve, aman kinloitah a thu adih'a atanpeh ding ahi! Ahinlah Mihem Chapa hung kit teng, leiset chung a hin mi ijat tahsan nei mudoh intem?” ati.

*Pharisee ho le kaidong ho*

<sup>9</sup> Chuin Jesun hiche thusim hi mi konkhat ama chonphatna a kisonga midang musit ho dingin aseiyeh: <sup>10</sup> “Mi ni houin ah taona mangin ache lhon'e. Khat chu Pharisee mi ahin, chule adang khatpa chu musit umtah kaidong ahi. <sup>11</sup> Pharisee

mipa chu adingin hitin ataove: ‘Kakipah'e Pathen, adangho banga chonse kahilou jeh in. Ajeh chu lepthol in kabol pon, kachonse pon, chule jonthanhoi jong kabolpoi. Keima atahbeh in khuche kaidongpa tobang kahipoi! <sup>12</sup> Keiman hapta khat in nivei an kangol'in, kasum mu jat a konin soma khat kapei,' ati. <sup>13</sup> Ahivangin kaidong pachu gamlatah a adingin chule amit jeng'a jong vanlam ve ngamlouvin ataove. Chusang chun lungkham tah in aman a-op achum'in hitin aseiyee, ‘O’ Pathen, neilungset in, ijeh inem itile chonse kahibouve, ati. <sup>14</sup> Kaseipeh nahiue, Pharisee pa hilou, hiche chonsepa chu Pathen ang-ah them achangin inlam akiletai. Ijeh inem itile ama kichoisang hochu suhnem'a umding, chule akineosah hochu dopsang'a umdiu ahi,” ati. ☆

### *Jesun chapang neo ho phatthei aboh*

<sup>15</sup> Nikhat nule pa phabep in achateu chapang neocha chaho chu Jesun atham'a phatthei aboh dingin ahin puiyun ahi. Ahivangin aseijuiten hichu amuphat un, anule apateu koma chun ama nasuboi bep uve tin ahouse uvin ahi. <sup>16</sup> Chuin Jesun chapang ho chu akouvin chule aseijuite hengah aseitai, “Chapang ho chu kahengah hung uhen. Jahda hih'un! Ajeh chu Pathen Lenggam chu hiche chapang neocha tobanghoa ding bou ahi. <sup>17</sup> Thutah kaseipeh nahiue, koi hileh chapang neocha banga Pathen Lenggam sanglou chu lutlou hel ding ahi,” ati.

### *Mihaopa*

---

☆ **18:14** Matt 23:12; Lk 14:11

18 Khatvei hou lamkai khat hin hiche thudoh hi adonge: “Houhil pha, tonsot hinna kanei thei na dinga ipi kabol ding ham?” ati. 19 “Ipi bol'a apha tia nei kou ham” tin aledoh in, Pathen bouseh dihtah'a pha ahi. 20 Ahin nathudoh donbut nan, thupeh ho nahet chula: “Nangman jon bol hih'in, tolthat hih'in, gucha hih'in, jouvin mi hehse hih in, nanu napa jabol in,” ati. ☆ 21 Mipan adonbut in, “Hiche thupeh ho jouse hi kachapan laiya pat kajui sohkei ahitai,” ati. 22 Jesun adonbutna thu ajah phat chun, hitin aseitai, “Nabol loulai thilkhat aume. Nanei jouse joh in lang hiche sum chu mivaicha ho pen, chutileh van'a gou nanei ding ahi. Chuteng hungin, neijuiyin,” ati. 23 Ahivangin mipa chun hichu ajahdoh phat in alung kham lhez tan ahi, ijeh inem itile amachu haosatah ahi. 24 Jesun hichu amuphat in, aseitai, “Mihaosa Pathen Lenggam alut ding hi iti hah hitam!” 25 “Atahbeh in, heobil hom'a sangongsao alut galkai ding hi mihaosa Pathen Lenggam a alut ding sangin abaijoi,” ati. 26 Hiche akisei jajouse chun aseiyun, “Achutileh vannoi leiset'a koiham huhhing na chang jou ding?” atiuve. 27 Aman adonbut in, “Mihem dinga hithei lou chu Pathen dinga hithei ahi,” ati. 28 Peter in aseiyin, “Keihon nangma jui dingin ka-in'u kadalhauve,” ati. 29 Jesun adonbut in, “Henge” chuleh ka lhamon nahiuve, “Koihileh Pathen Lenggam jal'a a'in ham, ajinu ham, asopiho ham, ahiloule

---

☆ **18:20** Potdohbu 20:14; Danbu Ni Na 5:18; Potdohbu 20:13; Danbu Ni Na 5:17; Potdohbu 20:15; Danbu Ni Na 5:19; Potdohbu 20:16; Danbu Ni Na 5:20; Potdohbu 20:12; Danbu Ni Na 5:16

anu apa ham achate ham pedoh chan chu,  
<sup>30</sup> tamtahvei tuhinkhoa hi lepeh'a umdiu chule  
 ahunglung ding khang'a jong tonsot hinkemlou  
 amuding'u ahi," ati.

*Athum channa Jesun athi ding le athokit ding  
 aseï*

<sup>31</sup> Seijui somleni ho atumbenh'in apuidoh  
 in, Jesun ajah uva aseïye, "Ngaiyun, eiho  
 Jerusalem chetou ding ihïuve, Mihem Chapa  
 chungchang thudol'a themgao thusei jouse guil-  
 hun na ding mun chu ahi. <sup>32</sup> Amachu Rome  
 te khut'a pehdoh'a umding ahi, chule amachu  
 tot thanghoi'a umding, jachat umtah'a kibol  
 ding, chil kisetkhum ding ahi. <sup>33</sup> Amahon  
 avoh'uva chule athadiu ahi, ahivanga anithum  
 nileh thoukit ding ahi," ati. <sup>34</sup> Ahin, amahon  
 hitiho thuhi khatcha ahethei pouve. Athusei ho  
 athupije chu amaho a kona ki im mang ahi, hijeh  
 a chu athusei chu amattoh thei lou u ahitai.

*Jesun mitcho khat adamsah*

<sup>35</sup> Jesun Jericho anaisuh lai hin, mitcho khutdo  
 khat lamsih'ah ana touve. <sup>36</sup> Aman mihonpi kijot  
 khuto gin ajah phat in, ipi thu hitam ti adongin  
 ahi. <sup>37</sup> Nazereth Jesun hikom chu ahopa ahi ti  
 aseïpeh tauve. <sup>38</sup> Hijeh chun amapa ahung eo-  
 jah tan, "Jesu, David chapa, neilungset in!"  
 ahintin ahi. <sup>39</sup> "Thip'in" tin masang langa  
 miho chun ahutot tauvin ahi. Ahivangin ama  
 awgingjep in ahapen cheh tan, "David Chapa,  
 neilungset in!" ati. <sup>40</sup> Jesun ajahdoh phat in,  
 adingin mipa chu ahinpui lut diuvin athu-  
 peh tai. Mipa ahung nai toh lhonin Jesun  
 adongin, <sup>41</sup> "Ipi nabolpeh



leng natim?” tin adong tai. Aman, “Pakai, kho muleng kati!” ati. <sup>42</sup> Chuin Jesun aseiyin, “Aphai, kho mutan! Natahsan in nadamsah ahitai,” ati. <sup>43</sup> Apettah chun mipa chun kho amutai chuleh amapan Jesu nung ajuiyin Pathen avahchoi tai. Chuleh amujousen jong Pathen avahchoi cheh tauve.

## 19

### *Zacchaeus in Jesu aki mupi*

<sup>1</sup> Jesu Jericho alut'in, chule akhopi sung chu ajot in ahi. <sup>2</sup> Mi khat amin Zacchaeus kiti chua chun aume. Ama chu hiche lhang'a dinga kaidong pipu ahin, ahaova haosa ahitai. <sup>3</sup> Aman Jesu chu mutei ding agon, hinlah ama anem behseh jeh chun mihonpi lah'a chun amutheipoi. <sup>4</sup> Hijeh chun ana malhaijel'in lampi panga theiba phung khat'ah anakal'e, ajeh chu Jesun hiche lampi chu aho ding ahi. <sup>5</sup> Jesu ahung phat chun, Zacchaeus chu avetouvin chule amin in akouvin, “Zacchaeus! gang'in, hungkum'in! tunia na in'a maljin kahi ding ahi,” ahinti. <sup>6</sup> Zacchaeus jong kinloitah in ahung kumlhan, Jesu chu a'in ah kipah le thanom tah'in apuilit tai. <sup>7</sup> Ahivangin miho chu alungphamo uvin, “Michonse chungnung in'ah agalhung taget e,” tin aphunchel tauve. <sup>8</sup> Chuphat chun, Zacchaeus jong Pakai angsungah adingdoh in aseitai, “Pakai, kanei kagou akehkhat mivaicha ho peing'e, chule kai kadon na'a miho lepthol'a kabol aumleh, amaho chu ajatlin nungpeh inge!” ati. <sup>9</sup> Jesun adonbut in, “Tunin hiche in'ah huhhingna alhung tai, ajeh chu hiche mipa hin Abraham chapa dihtah ahi

akimusah tai. <sup>10</sup> Ijeh inem itile Mihem Chapa chu amangsa holdoh le huhhing dinga hung'ah ahi," ati. ☆

*Sum som khat thulem*

<sup>11</sup> Mihonpi chun Jesu thusei jouse chu angailha sohkeiyun ahi. Chule ama Jerusalem anaitoh kilhonin, aman thusim khat, Pathen Lenggam chu kipan pai dinga angaito'u suhdih nadin aseiyee. <sup>12</sup> Aman hitin aseiyee, "Lengchapate khat mun gamlatah a leng gachanga hung kile kit dingin koudoh in aumin ahi. <sup>13</sup> Achedoh masangin asohte lah'a mi som akoukhom in dangka mina som apen, 'kachedoh sungin hiche hi nei veikan peh'un' ati. <sup>14</sup> Ahivangin amiten avetnom pouvin, achedoh nungin palai asol'un, 'Ama hi kalengpau dingin kadei pouve' tin agasei sah uve. <sup>15</sup> Leng ahung chan jouvin, ahung kilen chule asohte sum apeh sese chu akoukhom tai. Aman aveikan jat'u chu ahetnom ahi. <sup>16</sup> Soh masapan thu ahinlhut in, 'Pipu, keiman nasum kaveikan in, neipeh chu ajat som in apunge!' ati. <sup>17</sup> Lengpan adonbut in, 'Nabol pha'e!' ati. 'Nangma sohpha nahi. Nangma themcha kapeh chungga kitah nahi, hijeh a chu natohphat kipaman'a khopi som chungga gamvaipo nahi ding ahi,' atipeh e. <sup>18</sup> Soh anina pan thu ahinlhut kit in, 'Pipu, nasum kaveikan in neipeh chu ajat ngan kapunsah be'e' ati. <sup>19</sup> 'Nabol aphai!' tin lengpan adonbut in, 'Nangma khopi nga chungga vaipo nahi ding ahi' ati. <sup>20</sup> Ahivangin soh athumna pan sum amu mama chu ahinchoiyin

---

☆ **19:10** Matt 18:11

aseitai, ‘Pipu, keiman nasum chu kasel'in kana koitup peh e. <sup>21</sup> Kakichat nahi ajeh chu nangma mikhel nahin, nanga hilou jong nakilah in, natu lou jong aga nakichomkhom ji'e.’ ati. <sup>22</sup> ‘Nangma soh gilou!’ tin lengpa ahung eojah in, ‘Nathun themmo nachan ahi. Nangman mikikhel kahi nahet a, keiya hilou kakilah theiya, katulou jong ka-at thei leh, <sup>23</sup> ipi dinga sumkoina in'a kasum chu nanakoi louham? Ken athoi themkhat beh kikimu tadinga,’ ati. <sup>24</sup> Chuin akom avel'a ding ho hengah akiheiyn, hitin thupeh aneitai, ‘Hiche sohpa a kon chun sum chu lahpeh unlang mina som neipa chu petauvin’ ati. <sup>25</sup> ‘Ahin, pipu, aman som aneitai!’ tin ahinsei yuve. <sup>26</sup> Lengan adonbut in, ahinai, akipe mangthem hochu, kipeh be ding. Amavang imacha bollou ho koma pat, anei sun'u themcha jong chu kilahmang peh ding ahivu. ✧ <sup>27</sup> Chuleh hiche kagalmi ho, lenga kapan ding deilou ho chu–hin pulut unlang kangsung tah a hin thatdoh tauvin,” ati. ✧

### *Jesu loupitah'a Jerusalem alut*

<sup>28</sup> Hiche thusim aseijouvin, Jesu Jerusalem lam jon'in, aseijuite sangin anamasan ahi. <sup>29</sup> Ama Bethphage le Bethany khopiho Olive molchung lang ahung gei phat in, aseijui mini asol masan, <sup>30</sup> “Hiche kho a khun galut lhonin lang” tin aseipeh in, “Nalut lhon tengleh, sangan nou kihen koiman atouna nailou namu lhon ding ahi. Hin sutlha lhon in lang hilang'ah hinkai lhon in. <sup>31</sup> Khattouvin ahindoh'a, ‘Ipibol'a hiche

---

✧ **19:26** Matt 13:12; Mk 4:25; Lk 8:18 ✧ **19:27** Matt 25:14-30

sangan nou chu nasut lhah lhon ham' atileh, hitin seilhon'in, 'Pakaiyin aman nom'e' tilhon'in" ati. <sup>32</sup> Chutichun amani jong achelhon in, Jesu sei bangin sangan nou chu agamu lhon tai. <sup>33</sup> Chule atahbah'in, asutlhon laiyn aneipan ahin adong lhon in, "Ipi bol'a hiche sangan nou chu nasutlhon ham?" ahin ti. <sup>34</sup> Chule seijuite ni chun bailam tah in adonbut lhon in, "Pakaiyin aman nom'e" atilhone. <sup>35</sup> Hiti chun sangan nou chu Jesu hengah ahin kaiyun chule aponsil hou chu achungah atouna dingin aphapeh un ahi. <sup>36</sup> Chutia ahung tou phei laiyn, mipihon lampi ah aponsil hou anaphauvin ahi. <sup>37</sup> Olive mol'a pat a lampi chesuh kipatna aphah chun, anungjui jousen kholhang asam un, ache toh lasah akop un, Pathen in thil kidang abolho amujal un avahchoiyuve. <sup>38</sup> "Pakai min'a hung'ah lengpa chu anunnom e! Van ah cham leng hen, chule van sangpena jong loupi hen!" atiuve. ✧ <sup>39</sup> Ahivangin mihonpi lah'a Pharisee ho phabep khatchun aseiyun, "Houhil, nanungjui hon hitobang thuho aseiyu khu phohthip'in!" atiuve. <sup>40</sup> Aman adonbut in, "Amaho athipbeh uleh, lampam'a songho kipah'a hung eodoh diu ahi!" ati. <sup>41</sup> "Ama Jerusalem ahung naijep'a khopi chu amuphat in akap pan tai. <sup>42</sup> Iti kadeisah nahi hitam tunikhon mijouse lah'a nangman chamna lampi hi kihet tave lechun. Ahinlah, tun ageisang tan, chamna hi namit mua kona kisel ahitai. <sup>43</sup> Sot louva nagalmi teu vin nakul pam'a pansatna akisem diu, amai lang jousea

na umchin todiu ahi. <sup>44</sup> Amahon tol'a nachil thang diu, chule nachateu jong chutia abol diu. Nagalmi teu vin song khatcha aumna a aumsah louding ahi, ajeh chu huhhingna dinga phat kilemchang nasan loujeh ahi," ati.

*Jesun Jerusalem hou'in asuhtheng*

<sup>45</sup> Chuin Jesu houin alut in, kilhaina ding ganca joh ho ahin nodoh pan tai. <sup>46</sup> Aman amaho jah'a, "Pathen Lekhabun hitin aseiyé, Ka in chu taona in kiti ding ahi, ahin nanghon gucha michom ho kokhuh in nasem tauve" ati. ✧ <sup>47</sup> Chujou chun, aman niseh leh houin ah thu ahiljin, ahin thempuho, hou danthu hil ho chule adang mipi lamkai hon ama chu iti tha ding ham ti thilgon akisem pat un ahi. ✧ <sup>48</sup> Ahivangin ima dang ageldoh chom pouve, ajeh chu mijousen athuhil apomchah jeh chun. Jesun Thuneidol Adoh'u

## 20

<sup>1</sup> Nikhat Jesun mipi thu ahil'a Kipana Thupha houin'a aseiphong laiyn, thempu pipui ho, hou danthu hil ho, chule upa ho cheng ahengah ahungun. <sup>2</sup> "Ipi thuneina noiya nangman hiche hohi nabol ham? Kon thaneina napeh ham?" tin ahung dong uve. <sup>3</sup> "Ken thudoh khat nanei masauvinge" tin adonbut in, <sup>4</sup> "Twilutsah John thaneina chu van'a kon ham ahilouleh mihem a kon ham?" tin adongtai. <sup>5</sup> Amaho akihouvun, "Van'a kon ahi tileu hen, ibol'a John natahsan lou u ham eiti kit diu. <sup>6</sup> Ahin iham tin mihem a kon

ahi tileu hen, mipin songa eise kit diu, ajehchu John chu themgao ahi tia apom'u ahi" akitiuvin ahi. <sup>7</sup> Hijeh chun achainakeiyin kahepouve tin ahin donbut tauve. <sup>8</sup> Chuin Jesun adonbut in, "Achutileh kenjong ipi thuneina noiya kabol ham ti naseipeh pouvinge," ati. Lengpi-Lei Le Alei Lhouho Thulem <sup>9</sup> Tun Jesun mipi lam angakit in hiche thusim hi aseipeh e: Mikhat hin lengpilei abol in, aloulhou miho komah apedoh in, gamdang khat ah kumsottah tham dingin achetai. ☆ <sup>10</sup> Lengpi ga khoptup phat alhin in, asohte khat ama chanding lan asol'e. Ahin loulhou ho chun sohpa chu ahin bolseuvin, avouvin, khutgoh keovin ahin lesol tauve. <sup>11</sup> Hijeh chun lou neipan soh dang khat asol kit in, ahivangin amahon ahinsujum kit un, avouvin, khutgoh keovin ahin lesol kit tauve. <sup>12</sup> Athumna pa asolkat in, chule ama jong chu ahin mavouvin adelmang tauve. <sup>13</sup> "Ipi kabol ding hitam?" tin louneipa akihoulim in ahi. "Kahetai! Keiman kachapa kasahlut tah hi sol'inge. Tahbeh in jana hinpe nauvinte" ati. <sup>14</sup> Ahinlah, aloulhou hon achapa amu phat un, amaho akihou som'un, "Agoulo ding pa ahunge, thatdoh utin agoulo ding hi eiho chang tauhite!" akitiuve. <sup>15</sup> Hijeh chun ama chu lengpilei pam langah akaidoh un atahat tauve. "Lengpilei neipa chun amaho chungah ipi bol'in te tia nangaitouvam?" tin Jesun ahin dongin, <sup>16</sup> "Naseipeh unge-ama hungin tin loulhou ho chu athadoh a lengpilei chu midang asan sah ding ahitai" ati. "Iti khoh hitam chutobang thil aso jeng ding chu," atiuvin athusei jaho

---

☆ 20:9 Isa 5:1

chun ahin donbut uve. <sup>17</sup> Jesun amaho chu aven aseitai, “Achutileh, Pathen Lekhabun ipi ati naham? Insa hon apaidoh u song chu Inning songpin apangtai,” ✧ <sup>18</sup> “Hiche songpia kupal jouse chu ahal hal'a keh ding, chule achunga lhu chu ipi hijong leh chip ding ahi” ati. <sup>19</sup> Hou danthuhil ho le thempu pipuihon Jesu chu kintah a matding adeilheh un ahi ajeh chu athusim seichu amaho kiseina ahi ahin kihetdoh u ahitai–amaho chu loulhou agilou hochu hiuvah ahi. Ahivangin mipi ho lethuh na chu akichauvin ahi.

*Caesar henga kaipeh thudol*

<sup>20</sup> Phat kilemchang vepum'in, alamkai houvin avelhi le ding miphalhem asol uve. Jesun seikhel khat neihen Rome gamvaipo komah amat nadingin kipedoh le ti agon u ahi. <sup>21</sup> Amahon “Houhil, Nangman adih chu nahil'a nasei ahi chule midang lunggel in nasuhboi joulou ahi keihon kaheuve.” <sup>22</sup> “Tun neiseipeh un–Caesar henga kai pehding hi dih hai dihlu ham?” tin adong tauve. <sup>23</sup> Aman alunghim bol'u ahichu ahen aseitai, <sup>24</sup> “Rome te sumpum khat neivetsah'un. Koi lim le thucheng kijih ham achunga chu?” tin adongtai. Amahon adonbut un, “Caesar a ahi,” atiuve. <sup>25</sup> Aman ase ki in, “Aphai ahileh, Caesar a chu Caesar peuvin lang Pathen a chu Pathen peuvin,” ati. <sup>26</sup> Chuti chun amahon mipi masanga athu seikhel'a kupal sah ding atiu chu ajou tapouve. Chusang chun, amahon athu donbut hochu kidang asauvin, athipchet tauve.

---

✧ **20:17** Labu 118:22

*Thina a kon thokitna thudola Jesu adoh'u*

<sup>27</sup> Chuin Jesu chu Sadducee–hou lamkai, thokitna aumpoi tihon kimupi din ahin naiyun ahi. ✧ <sup>28</sup> Hiche thudoh hi adongun ahi: “Houhil, Mosen dan khat eipeuvin, mikhat chu athia ajinu adalhah'a chaneilou ahileh, asopipan hiche meithai chu akichenpi ding, cha aneipi ding hichun asopipa min apoh ding ahi. ✧ <sup>29</sup> Apha, tun tekahnán ucha pasal sagi aume. A'upen ajineiyin cha neilouvin athitai. <sup>30</sup> Hijeh chun ani napan akichenpin, ama jong athitai. <sup>31</sup> Chuin athumna pan akichenpi kit in ahi. Hiti hin asagiuvín achelhan abon'uva chaneilou ahitaue. <sup>32</sup> Achainan numeinu jong athi tai. <sup>33</sup> Hijeh chun neiseipeh un, thokitna'a chu koi ji a pang ding ham? Ajeh chu asagiuva chu akichenpi cheh u anahi!” <sup>34</sup> Jesun adonbut in, “Kichen hi hiche leiset chungá cheng miho ding bou ahi.” <sup>35</sup> Ahin, ahung lhung ding khang'ah, athilah a kona thoudoh dinga lom ho chu akicheng tapouvin chule chen jong akichensah tapouve. <sup>36</sup> Chule amaho thikit talou diu, hitia chu amaho van'a Vantilte tobang hidu ahitai. Amaho Pathen chate ahitaúvin chule thoukit chate ahitaue. <sup>37</sup> “Ahin tun, mithi thoukit mong ding hinam ti thudol ah”—Mose jengin jong nanglah meikong thudol asut chun avetsah in ahi. Abraham, Isaac, le Jacob thijou phat sottah jou nungin, Pakai chu Abraham Pathen, Isaac Pathen, Jacob Pathen tia akou ahi. ✧ <sup>38</sup> “Hijeh a chu ama chu ahingho Pathen ahin, athiho a hilou ahi, ajeh chu amaho



abonchauva ama'a hingah ahitauve.”<sup>39</sup> Chukom mun'a ding, hou danthu hil ho phabep khat chun, “Nasei hoiye, houhil” atiuve.<sup>40</sup> Chule koiman thudoh adong ngam tapouvin ahi.

*Jesu David chapa ahina thua adoh'u*

<sup>41</sup> Chuin Jesun thudoh toh thon hiche hi aseipeh kit e, “Ipi jeh a Messiah chu David chapa kiti ding ham?”<sup>42</sup> Ajeh chu David amatah in jong Labu'a anajihlut ahi: “Pakai in ka Pakai jah'a, Kajet lam'a kijana mun'ah touvin,” ✧<sup>43</sup> Namelmate kasuh nem a, Nakengto chotpha'a kakoi masang sen, ati.<sup>44</sup> “David in Messiah chu Pakai, tia akou leh, Messiah chu iti David chapa hithei ding ham?” ati.

*Jesun danthu sun ho aphosal*

<sup>45</sup> Chuin mihonpi jah dingin, aseijuite kom langah akiheiyin aseitai,<sup>46</sup> “Hiche hou danthu hil hoa kon hin kichih theiyun! Ajeh chu amahon vonhoi tahtah kivon a kailhang lah dunga min chibai aboh diu adeiyun, chule kikhopna in le golvah na mun ho ah touna mun thupi lai lai aholjiuve.<sup>47</sup> Ahin, amahon jahcha louhel in meithai ho anei agou uva kona lheplah ding agel uvin, chule kilhagao misah tah bangin taona sottah tah japi lah'a amang jiuvin ahi; hiche jeh'a hi amaho hatah a bolgimna changding ahivu,” ati. Meithainu Sumto

## 21

<sup>1</sup> Jesu houin aumlaiyin, mihao hon sumdolna bom'a athilpeh houchu aven ahi. <sup>2</sup> Chuin

---

✧ 20:42 Labu 110:1

meithai mivaicha khat jong ahungin sumsan pehni alehlut in ahi. <sup>3</sup> Jesun aseitai, “Thutah kaseipeh nahiuve, hiche mivaicha meithainu hin adang jouse sangin atam to joi. <sup>4</sup> Ajeh chu amahon aneival hou lah'a themkhat bou atou ahin, amavang amanu hin, avaichat totoh'a, anei chasun apeh ahitai,” ati.

### *Jesun ahunglung ding asej masah*

<sup>5</sup> Asejuite lah'a phabep khat chun Hou'in kisah na'a song kikheng ho chule bang'a melchihna kijempah ho chu anatsat dan aseipan tauvin ahi. Ahivangin Jesun aseitai, <sup>6</sup> “Phat ahunglung e, hiti ho jouse hi aboncha kisuchim ding ahi. Song khatcha khat chung a kisetom namu lou diu ahi,” ati. <sup>7</sup> Amahon adongun, “Houhil, hitiho hi itih le soh ding ham? Melchihna itobang in hitiho chu sohding ahitai ti eivetsah diu ham?” atiuve. <sup>8</sup> Aman adonbut in, “Koima kilheplah sah hih un, ajeh chu mi tamtah kamin'a hung ding, ‘Keima Messiah kahi’ tia aseidiu ‘Phat ahung lung tai!’ ahin tidu ahi. Ahivangin tahsan hih un. <sup>9</sup> Chuleh gal kikat le thunoh najah teng uleh tijahih'un. Ahinai, hiti hohi soh masa ding ahi, ahin achaina chu hijeng loulai ding ahi,” ati. <sup>10</sup> Chuin aman aseiben, “Namkhat chu namkhat toh gal kikat a konding, chule lenggam khat jong lenggam dang khattoh kidou ding ahi. <sup>11</sup> Lingpi nasatah tah kihot ding, kel lhading, chule mun tin'a gamna hise lang ding, tijat um tahtah thilsoh chule van'a melchihna kidang tahtah namu diu ahi. <sup>12</sup> Ahivanga hiche ho ahung so masanga,

suhgenthei na phat nasatah umding ahi. Nangho kikhopna in tinle songkul hoa nakikai diu, chule kanungjui nahijeh uva lengho le gamvaipo ho thutanna angzunga nadin diu ahi. <sup>13</sup> Ahivanga hiche hi nangho dinga keima neiseiphong nadiu phat kilemchang chu hiding ahi. <sup>14</sup> Hijeh chun nakihehset nau chu iti kadonbut dem tin lung-gim masat dauvin, ☆ <sup>15</sup> ajeh chu keiman nangho thu adihtah chule chihna, nadoudal teuvin nahin donbut theilou nadiu ahiloule nanelkal joulou nadiuva kapeh ding nahiue. <sup>16</sup> Nakinaipi pen'u-nanu napa, nasopiho, na inkote, chule naloi le pai ho jengin jong nahin pehdoh nahlai diu ahi. Amahon nangho abangkhat nahin tha nahlai diu ahi. <sup>17</sup> Chule mijousen kanungjui nahi jeh uva nahin muda diu ahi. <sup>18</sup> Amavang naluchung'a nasamjang khat jengjong mahthah lou ding ahi! <sup>19</sup> Dettah a nadin uleh, na lhagao naki huhdoh diu ahi.”

*Jesun Jerusalem kisuh mang ding asej masah*

<sup>20</sup> Chuleh nanghon Jerusalem galmi sepai hon aum kimvel namu teng uleh, nanghon alhuh nading phat hunglung ahitai ti nahet diu ahi. <sup>21</sup> Chuteng Judea gam'a cheng ho thinghang langa najam doh diu ahi. Jerusalem'a umho napotdoh diu, chule thinghang langa umdoh ho khopi langa nakile lou diu ahi. <sup>22</sup> Ajeh chu hiche ho chu Pathen phulah nikholai hiding, chule Pathen Lekhabua themgao thusei ho guilhung ding ahi. ☆ <sup>23</sup> Chuche nikholai chu numei

naovop hole naosen sin minute dinga iti da umding hitam. Ajeh chu gamsunga hesoh genthei khohtah chule hiche miho chungang lunghanna nasatah chuding ahi. <sup>24</sup> Amaho chemjam'a kithat diu ahilouleh sohchang'a vannoi nam jouse lah'a solmanga umdiu ahi. Chuleh chidang namdang te phatsung kichai kahsea Jerusalem hi chidang namdang ten achotpha ding ahi.

*Mihem chapa hung kitna ding*

<sup>25</sup> “Chule nisa, lha, chule ahsi hoa melchihna kidang tahtah hung umding ahi. Chule leichung'a hi namtin boina'a dimding, twikhanglen kitum le tuikinong gimnei chun asuh lungjin diu ahi. ✧ <sup>26</sup> Miho chu leiset chungang thillhung ho amuuva kona kicha diu ahi, ajeh chu van munhoa thaneina cheng kihot ling gam ding ahitai. <sup>27</sup> Chuteng mijousen Mihem Chapa meilom chungang thahat le loupitah a ahung amudiu ahi. ✧ <sup>28</sup> Hijeh a chu hitiho jouse hi ahung kipat teng leh, dingun lang chunglam veuvin, ajehchu nasochat nau nai ahitai!” ati.

*Theichang phunga tilkhouna*

<sup>29</sup> Chuin aman hiche thutekah hi apen ahi: “Theichang phung khu veuvin, ahiloule thing-phung dang hijong leh. <sup>30</sup> Ado ahung pullhah teng, nanghon seipeh louvin jong naheuve, nipi anaitai. <sup>31</sup> Chutobang chun, hitiho jouse aguilhun namu tenguleh, Pathen Lenggam chu anaitai ti nahet thei diu ahi. <sup>32</sup> Thutah kaseipeh nahiuve, hiche kang hi chemang lou ding ahi,

✧ **21:25** Isa 13:10; Ezekiel 32:7; Joel 2:31; Rev 6:12,13 ✧ **21:27** Daniel 7:13; Rev 1:7

hitihou jouse aguilhun masang sea. <sup>33</sup> Van le lei mang ding ahi, ahin kathu ho vang manglou beh ding ahi.”

### *Kigin jingna dinga tilkhouna*

<sup>34</sup> “Kihong phauvin! Nalungu, nopchon nale juneh motchon na jeh, chule tuhinkhoa lunggim naho jeh'in motsah hih'un. Hiche nikho chu hetlou kah'a thang banga kimatsah bolhah'un. <sup>35</sup> Ajeh chu hiche nikho chu leiset chungahing mijouse chungahing ding ahi. <sup>36</sup> Phat jousen kiging jingin um'un. Chuleh hitobang kichat umtah hunglung ding peldoh nadi nahat jing thei nadiu le Mihem Chapa angunga nadin jou thei nadiuvin taovun,” ati. <sup>37</sup> Niseh le Jesu houin'ah thuhil dingin achejin, chule nilhah seh le Olive mol'a jan phat mang dingin ahung kile jin ahi. ✧ <sup>38</sup> Mihonpi chu houin'ah jingkah seh le athuhil ngai dingin akikhom jiuvin ahi.

## 22

### *Jesu thana ding agon-u*

<sup>1</sup> Cholsolou Changlah Kut, Kalchuh kut tia-jong kihe chu ahung naitai. ✧ <sup>2</sup> Thempu pipuiho le hou danthuhil hon Jesu chu iti tha ding ham ti agong pan tauvin, ahin mipin ahinlethuh ding akichauvin ahi. <sup>3</sup> Chuin Judas Iscariot, seijui somleni holah'a khat, sungah Satan alut tan, <sup>4</sup> chule ama thempu pipuiho le houin ngahtup lamkai hotoh Jesu amaho henga

pehdoh nadinga lampi phapen ho kihoulim dingin achetai. <sup>5</sup> Amaho akipah un, sum peh dingin akitem tauve. <sup>6</sup> Chuti chun amajong anom in chule Jesu pehdoh na dinga phat kilemchang chu avelhi jingin, mihonpi umlou pet'a amat thei na diuvin avejinge. Seijuihon Kalchuh Kut An-Neh Ding Agon-U <sup>7</sup> Tun Cholsolou Changlhah Kut chu ahunglhung tai, Kalchuh kut'a kelngoi akitha chun. <sup>8</sup> Jesun Peter le John asol masan, “Chelhon in lang kalchuh kut anneh nading hin gongtup lhontan, thakhat'a ineh khom thei nadiuvin” ati. <sup>9</sup> Amanin jong ahindong lhon in, “Hoilai mun'ah gongtup lhon leng natim?” atilhon'e. <sup>10</sup> Aman adonbut in, “Jerusalem nalut lut lhon leh mikhat twibel a tui pu khat namu lhon ding ahi.” Amachu juilhon'in. Alutna in a chun, <sup>11</sup> inneipa jah'a seilhon in, houhil'in adonge: jinlhun in, kaseijuite toh kalchuh kut an kaneh nading mun chu hoiba ham? ati tilhon'in. <sup>12</sup> Aman indan chung ka-lentah gotsa um khat'a napuilut lhon ding ahi. Hiche lai mun'a chu nangnin i-annech diu nagon lhon ding ahi, ati. <sup>13</sup> Amani khopi lam'a chun achelhon in ahileh imajouse Jesun asej bang bangin agatoh lhon in chukoma chun kalchuh kut anneh ahinsem lhon tai. <sup>14</sup> Phat ahung lhun phat in Jesu le aseijuite dokhang ah atoukhom tauve.

*Pakai jan anjon kiphutdoh*

<sup>15</sup> Jesun aseieye, “Kathoh gim kipat kah a hitobang kalchuh kut ankong nangho toh nehkhom ding hi kana ngalel jing ahi. <sup>16</sup> Ajeh chu tua kaseipeh nahiue, Pathen lenggam'a aguilhunna

aum tokah'a hiche an hi kaneh kit lou ding ahitai,” ati. <sup>17</sup> Chuin khon'a lengpitwi chu alan Pathen thangvah na apen ahi. Chuin aseitai, “Hiche hi kilah unlang nangho kihom un, <sup>18</sup> ajeh chu Pathen lenggam ahung lhun kah'a lengpitwi kadon lou ding ahitai,” ati. <sup>19</sup> Aman changlhah themkhat alan Pathen thangvah na apen ahi. Chuin ahehbal bal'in asejuite apen, “Hiche hi katahsa, nangho dinga kipe chu ahi. Keima geldoh nan bol'un” ati. <sup>20</sup> Jan anneh jouvin, lengpitwi khon dang khat alan hitin aseiyee, “Hiche khon hi Pathen le amite kikh a kitepna thah–kinoptona kathisan a kisudet, nangho dinga kilhaina a kisunglha chu ahi,” ati. ✧ <sup>21</sup> “Ahivangin hiche dokhang a hin, ilah uva jol le gol hina'a tou, mikhat eipedoh ding aume. ✧ <sup>22</sup> Ajeh chu Mihem Chapa athi ding chu gotsa anahitai. Ahin, itobang lungkham nan anga hitam apedoh a pang pachu,” ati. <sup>23</sup> Sejuite khat le khat akidong to un, alah uva koipen chun chutobang chu abol mong ding ham akitiuve. Let Thudol'a Kinelna <sup>24</sup> Chuin amaho khat le khat alenpen koi ahidiu thu'ah aki nelkal lah lah jeng tauve. ✧ <sup>25</sup> Jesun aseipeh un, “Hiche vannoi leiset a hin lengho le milen milal ten amiho potgih apohsah un ahin ‘mipi ho jol le gol’ tin akiminvo uve. <sup>26</sup> ✧ Ahin, nangho lah'a vang achomdeu ngai ahi. Nalah uva alenpen chun panmun nem pen alo ngai ahi, chule alamkai chu soh tobang ahi ngai ahi. ✧ <sup>27</sup> Koi thupijo ham, dokhanga

---

✧ **22:20** Jeremiah 31:31-34 ✧ **22:21** Labu 41:9 ✧ **22:24** Matt 18:1; Mk 9:34; Lk 9:46 ✧ **22:26** Matt 20:25-27; Mk 10:42-44  
 ✧ **22:26** Matt 23:11; Mk 9:35

toupa le ajenlea pangpa? Ahinai, dokhanga toupa athupijo nai. Amavang hikom'a chutilou ahi! ajeh chu keima nangho lah a ajenlea kapan ahi. ✧ <sup>28</sup> Nanghon kathoh genthei na ah nei umpiue. <sup>29</sup> Chule kapan Lenggam eipeh banga, kenjong tua thaneina kapeh nahiuve, <sup>30</sup> Chucho lenggam'a chu ka dokhanga naneh uva chule nadon thei nadiuvin. Chule nangho laltouna a natou diu Israel phungsom le phungni chungu thu natan diu ahi. Jesun Peter in Aseilep Ding Asei-Masah ✧ <sup>31</sup> Simon, Simon, Satan in nabonchouvin chang kilhah chil banga lhah chil dingin nathum uve. <sup>32</sup> Ahivangin taona ah kathumpheh uve, Simon chule natahsan chu alosap lou ngai ahi. Hijeh a chu nalung naheiya keilam a nahung kile kit teng nasopi ho suthahat in,” ati. <sup>33</sup> Peter in aseiyin, “Pakai, nangma to songkullut dinga kigosa kahi, chule thina hijong leh thingap cha kahi,” ati. <sup>34</sup> Ahivangin Jesun adonbut in, “Peter, thilkhat naseipeh inge. Jing jingkah ahchal khon masanga, nangman thumvei neiseilep ding, kahekha poi nati ding ahi,” ati.

### *Sum, sakhao chule chemjam*

<sup>35</sup> Chuin Jesun amaho chu adongin, “Keiman Kipana Thupha seiphonga kanasol uva, sum polou, sakhao kiken lou, ahiloule kengchot khel kichoilouva naum uva chu ipi ngaichat naneiyuvam?” atileh, amahon adonbut un, “Imacha” atiuve. ✧ <sup>36</sup> “Ahinlah tun nasum ule sakhao kipoh tauvin. Chule chemjam naneilou uleh

---

✧ 22:27 Jn 13:12-15 ✧ 22:30 Matt 19:28 ✧ 22:35 Matt 10:9,10; Mk 6:8,9; Lk 9:3; 10:4



naponsil joh unlang khat kichoh un. <sup>37</sup> Ajeh chu phat ahung lhunge kei chungchanga hiche themgao thusei guilhun na dingin: ‘Ama adoudal hotoh akisimtha tai’ tia kisun chu. Henge keima chungchanga kisun themgao thusei jouse guilhung ding ahi,” ati. ☆ <sup>38</sup> “Ven Pakai” tin ahin donbut un, “Chemjam ni eiho lah'a aumnai,” atiuvin, hichu aphatai, tin aseiyé.

### *Gethsemane honcsunga Jesu atao*

<sup>39</sup> Chuin, seijuite toh kivop in, Jesun indan chung adalhan chule abolngai ma bangin Olive mol langah achetai. <sup>40</sup> Hia chun amaho aseipeh in, “Taovun, lhepna a nalhah lou nadiuvin,” ati. <sup>41</sup> Themkhat, song sephah nathei chan bep ah, ache chon jep'in, chule adilsun ataotai, <sup>42</sup> “Hepa, nalung ahileh, lungsettah in thoh gentheina khon hi keyia konin ladoh in. Ahin, keima lunggot hilouvin, nangma lunggot joh akibol ding kadeiye,” ati. <sup>43</sup> Chuin van'a konin vantil khat ahung kilah in chule atha asuhhat peh in ahi. <sup>44</sup> Ama lungluttah in ataoben, chule alhagao thohgim natsat dan chu, a-ul sa chu thisan vat lentah tah bangin alenglhan ahi. <sup>45</sup> Achainan adingdoh kit in aseijuite hengah ahung kilen ahileh ana ihmud u ahung mun, lungkham na'a kon joilha gamu ahitai. <sup>46</sup> “Ipi bol'a na-imud u ham?” tin adongin, “Thoudoh unlang taovun, lhepna a nalhah lut louna dingun,” ati.

### *Jesu chu bengchop pum'a kijohdoh*

---

☆ **22:37** Isa 53:12

<sup>47</sup> Ahivangin Jesun chutia aseï jeng vang chun, mihonpin ahin nai pheiyun, Judas, seijui somleni lah'a khat, in ahin lamkai ahi. Judas jong Jesu kom langah chibai boh a chop ding in achen ahi. <sup>48</sup> Ahin Jesun aseiyin, "Judas, nangman Mihem Chapa hi chop'a pehdoh ding nagot ham?" ati. <sup>49</sup> Seijui danghon thilsoh ding chu amuphat un ahung eojah un, "Pakai, ikidel pidiu ham? Chemjam kahin pouve!" ahin tiuve. <sup>50</sup> Chule alah uva khat chun Thempu chungnung sohpa jetlang kol asatlhah peh in ahi. <sup>51</sup> Ahin Jesun aseiyin, "Kidoupi tahih un," atin chule mipa kol chu atham in asuhdam peh'e. <sup>52</sup> Chuin Jesun ama mandinga hungho thempu pipui ho, Houin ngah lamkaiho, chule upa ho komah thu aseïye. Amaho chu adongin, "Keïma tijat umtah doudal natong kahim, chemjam toh moltum thoa keïma man dinga nahung u? <sup>53</sup> Ipi jeh a houin a neimat lou u ham? Keïma niseh'a ana kium jinga. Ahivangin tuhi naphat'u ahi, muthim thaneinan vai apoh pet ahi," ati. ✧

### *Peter in Jesu aseïlep*

<sup>54</sup> Hijeh chun amahon aman'un thempu chungnung pa in'ah apuiphei tauve. Chule Peter chun galkang in ahinjuiye. <sup>55</sup> Angah ho chun leitol lailunga chu mei atiuva toubem u ahin, chule Peter jong agajaovin ahi. <sup>56</sup> Soh numei chapang khat in mei kitivah na'a kon chun ahin mun ama chu ave vejeng tai. Achainan amanun ahinseiyin, "Hiche mipa hi Jesu nungjui holah'a khat ahi," ahin ti. <sup>57</sup> Ahin Peter in aseïlep in,

---

✧ **22:53** Lk 19:47; 21:37

“Numei, ama khu koi ahi jong kahet lou ahi,” ati. <sup>58</sup> Chomkhat jouvin koiham khat in ahinven aseitai, “Nang jong amaho lah'a khat nahi tei ding ahi,” ati. Peter in adonbut in, “Ahipoiye, kahipoi,” ati. <sup>59</sup> Nidan khat jou lang hin koiham khat in angoh kit in, “Hiche mipa jong hi amaho lah'a khat hitei tei ding ahi, ajuh chu ama jong Galilee gammi ahi,” ati. <sup>60</sup> Ahivangin Peter in aseiyin, “Ipi nasei ham kahehah beh e,” atitai. Chuin chutia aseil lai tah chun ahchal ahung khong tai. <sup>61</sup> Hiche pettah chun Pakai chu ahung kiheiyin Peter chu ahin ven ahi. Kinloitah in Peter lung sungah Pakai thusei ho chu ahung kilangin: “Ahkhon masanga, jing jingkah le, nangman neiseilep ding, kahekha poi nati ding ahi” atichu. <sup>62</sup> Chuin Peter chun leitol adalhan, lainatah'in agakap tai.

*Jesu totnopna aneyu chule achunga khut al-hau*

<sup>63</sup> Jesu ngah'a pangho lah'a mopopa chun totnopnan aneyin chule avopan tai. <sup>64</sup> Amit atompeh un, “Gaovin lang seiyin, koiham nadeng'a chu?” atiuvin ahi. <sup>65</sup> Chule ama suhjum nan bolthei jouse abol'un ahi. Hou Vaipo Ho Ang-Sunga Jesu <sup>66</sup> Jingkho avah in, upa ho jouse, thempu pipuiho le hou danthuhil ho pan nan akikhom un ahi. Jesu chu akikhom mipi angsungah ahin puiyun, <sup>67</sup> chule amahon adongun, “Neiseipeh un nangma Messiah chu nahim?” atiuve. Ahivangin aman adonbut in, “Naseipeh uleng, neitahsan lou diu ahi. <sup>68</sup> Chule thudoh naneyu leng neidonbut lou diu ahi. <sup>69</sup> Ahin, tua

pat'a Mihem Chapa hi thaneitah a Pathen khut jetlam a touding ahi,” ati. <sup>70</sup> Amaho abonchavin ahung eojah jeng'un, “Ahileh, Pathen Chapa kahie natina ham?” ahintiuve. Chuin aman adonbut in, “Naseiyu chu kahi” ati. <sup>71</sup> Chuin amahon, “Ipi dinga hettosah dang ingaikhoh uham? Eihō tah in athusei ija tauve,” atiuve.

## 23

### *Pilate in Jesu thudoh anei*

<sup>1</sup> Chuin mipi kikhom chengse chun Jesu chu Rome Gamvaipo, Pilate hengah ahin pui tauve. <sup>2</sup> Amahon apansat nau thu chu aseipan un: “Hiche mipa hin kamiteu apuileng'in, Rome solkal koma kai peh lou ding tin aseiyin chule ama tahjong Messiah, Leng akihisah e,” atiuve. <sup>3</sup> Hijeh chun Pilate in ama chu adongin, “Nangma Juda te Lengpa nahim?” ati. Jesun adonbut in, “Kahi chu nasei khai” ati. <sup>4</sup> Pilate chu thempu pipuiho le mihonpi hengah ahung kiheyin chule aseitai, “Hiche mipa chungah hin ima adihlou kamupoi!” ati.

### *Herod angunga Jesu*

<sup>5</sup> Chuin amahon aseiteitei jengun, “Ahivanga, amahin achenah chan'a athuhil a kona boina asem jing jeng ahi—Judea pumpia, Galilee a pat Jerusalem geiya!” atiuve. <sup>6</sup> “Oh, Galilee gammi ham?” tin Pilate in ahin dong'e. <sup>7</sup> Amahon ahi atipeh phat un, Pilate in Herod Antipas koma dingin asol tai, ajeh chu Galilee chu Herod vaipoh nanoi anahi, chule Herod jong chu Jerusalem a aumpet anahi khan ahi. <sup>8</sup> Herod

in Jesu mu na dinga phat hoitah amujeh chun akitai leh jengin ahi, ajeh chu ama chung chang thudol anajah'a chule sot'a pat'a thilkidang abolho anamu nomten ahi. <sup>9</sup> Aman Jesu chu thudoh tamtah adongin, ahivangin Jesun adonbut nom poi. <sup>10</sup> Hiche lai chun thempu pipuiho le hou danthuhil ho chua chun adingun ahehset nathu'u chu asam un ahi. <sup>11</sup> Chuin Herod le asepaiten Jesu chu totnopnan aneyun adaichavai pan tauve. Achainan, amahon leng ponsil asilpeh un Pilate hengah ahinle sol tauve. <sup>12</sup> (Herod le Pilate, masanga kimelmah teni chu, hiche ni chun jol le gol ahung hilhon'e). Jesu Tha Dinga Athu Atan-U <sup>13</sup> Chuin Pilate in thempu pipuiho le hou lamkai adangho, mipiho jaonan, akoukhom in, <sup>14</sup> chule athulhuh sem aphongdoh in ahi. "Nanghon hiche mipa hi kakoma nahin puiyun, doudal natoh atonge tia ngohna naneiyu ahi. Keiman hiche thudol a hin phatah in nangho mitmun kavelhan chule bolset neilou ahi kamudoh'e. <sup>15</sup> Herod in jong themmona amulou jeh a eiho koma ahinle sol ahi. Thina thei chan gotna peh nading natoh hiche mipan abolpoi. <sup>16</sup> Hijeh chun keiman gimbolna peing ting, hinlhadoh tange," ahinti. <sup>17</sup> Ajeh chu kut sunga chu amahon mikhat alhadoh jing-u ahi. <sup>18</sup> Chutah chun mihonpi lah a kon chun awgin sangtah ahung gingin, thakhat tah in ahin sam'un, "Amahi thatdoh'in, chule Barabbas chu neilhadoh peh un!" atiuve. <sup>19</sup> (Barabbas chu agam solkal douna natoh jeh le toltha jeh'a songkul'a kikhum anahi.) <sup>20</sup> Pilate in amaho anelkal'in ahi, ajehchu aman Jesu alhadoh nom jeh ahi. <sup>21</sup> Ahivangin

amahon asam sam jengun, “Thingpel'a khenbeh in! thingpel'a khenbeh in!” atiuve. <sup>22</sup> Athumvei channa din aman adongin, “Ipi bol'in em? Ipi them mona aneyem? Keiman thina chan'a gotna peh nading thu ima kamupoi. Hijeh chun hin vogim ingting hinlhadoh tange,” ati. <sup>23</sup> Ahivangin mihonpi chun awsang jep in aha sapcheh un, Jesu chu thingpel'a khetbeh ahinadin athum'un, chule a-awgin u chun ajoujotai. <sup>24</sup> Hijeh chun Pilate in Jesu chu angeh dungjuiyun athi dingin atanlhah peh tai. <sup>25</sup> Amahon athum dungjuiyun Barabbas, michohnoh le toltha jeh a songkul'a umpa, alhadoh peh in ahi. Ahin Jesu vang chu amaho khut'ah anop nop alodiuvn apedoh tai.

*Jesu thingpel'a kikhetbeh*

<sup>26</sup> Chutia Jesu ahinpuidoh uchun, Simon kiti Cyrene gam mi khat thinglhang langa pat'a ahung pettah anahi. Sepai ho chun aman un thingpel chu achungah akoiyun Jesu nunga chun apohsah tauve. <sup>27</sup> Mihonpi tamtah'in anung ahinjuiyun, a-op chum'a kap nupiho jong ahi-uve. <sup>28</sup> Ahivangin Jesu amaho langah akiheiyin aseitai, “Jerusalem chanute, keiya dingin kap hih'un, amavang nangho le nachateu dingin kap jouvin. <sup>29</sup> Ijeh inem itile amahon hitia aseina diu nikho hung lhung ding ahi. Cha neilou numeiho, naovop khalou naobu, chule nao noichepsah khalou ho anunnom uve, kiti ding ahi. <sup>30</sup> Mihon mol ho jah'a ‘Neilhuh khum'un’ tia athum dingu, lhang jah'a ‘neikhu khum'un’ atidiu ahi. ✧ <sup>31</sup> Ajeh chu thingphung ahinlai'a bon hitia hi abol ule,

✧ **23:30** Hosea 10:8; Rev 6:16

iti da ding ham agot teng,” ati. <sup>32</sup> Adang mini, anilhona miphalou, teni jong chu amatoth tha thading'in ahin puidoh uve. <sup>33</sup> Lugu mun atinau mun ahung lhun phat un, amahon thingpel ah thingkil'in akilbeh un ahi. Chuleh miphalou teni jong chu akhetbeh tauve–khat ajet ah chule khat aveiyah. <sup>34</sup> Jesun aseitai, “Hepa, ngaidam in, ajeh chu ipi abol'u ahepouve,” ati. Chule sepai hon aponsil chu vang asang'un achang ding akivelhauve. ✧ <sup>35</sup> Mihonpi chun aveuvin chule alamkai hon ajontai'un. “Aman midang ho ahuhhingin” tin amahon aseiyun, “Ama le ama kihuhhing tahta Pathen thaonu, Akilhengdoh pachu ahi mong mong leh,” atiuvin ahi. ✧ <sup>36</sup> Sepai hon jong adai chavaiyun, donding juthuh apeuvin ahi. ✧ <sup>37</sup> Ama ahin kou uvin, “Nangma Judate lengpa nahileh, kihuhhing in!” atiuve. <sup>38</sup> Achungah chun melchihna khat atah uvin, “Hiche hi Judate lengpa ahi” tin asun uve.

### *Miphalou pan Jesu atahsan*

<sup>39</sup> Miphalou akikhetbeh pi teni khatpa chun ahin jontaiyin, “Nang, Messiah nahi hilou ham?” Nahi vetsahnan nang le nang kihuhhing in lang chule keini jong neihuhdoh lhon tang'em, hitia nathoh gim laihi! ati. <sup>40</sup> Ahivangin miphalou khatpa chun ahin phohsal in, “Pathen nagin lou ham athidinga naum kisan'a? <sup>41</sup> Eini hi athidinga lom ihi ithil bolkhel jeh'a, ahin hiche pa hin imacha bolkhel aneipoi,” ati. <sup>42</sup> Chuin aman aseitai, “Jesu, neigeldoh in nalenggam'a

nahung teng,” ati. <sup>43</sup> Jesun adonbut in, “Tahbeh'a kaseipeh nahi, tunia Paradise a iumkhom ding ahi,” ati.

*Jesu thingpel chung a thi*

<sup>44</sup> Hiche phat hi sunkim dontah ahin, chule nidan thum chan in gamsung pumpi muthim ahung jingin ahi. ✧ <sup>45</sup> Nisa a kon vah achemang in, chule kinloitah in houin muntheng'a pondal chu akimlai tah'a akehlhasuh in ahi. <sup>46</sup> Chutah chun Jesu ahung peng in, “Pa, nakhut'ah kalhagao kapedoh e” ati. Chule chuche thucheng aseito h kilhon in ahinna alhatai. ✧ <sup>47</sup> Rome sepai jalamkaipa, kithana velhalea pang pan thilsoh umchan chu amun, Pathen chibai aboh in aseitai, “Hiche mipa vang michonpha ahi,” ati. <sup>48</sup> Chuleh mihonpi akikhetbeh ve'a hung sesen jong thilsoh umchan chu amu uvin, amaho lungkham tah in inlam ache tauve. <sup>49</sup> Ahivangin Jesu jol le gol te, Galilee gam'a pat'a hinjui numeiho chengtoh, amaho chu gamla thimtah in adingun ahin galvet uve. Jesu Long Avui-U ✧ <sup>50</sup> Tun Joseph kiti mipa le chondih tah khat aume. Amachu Judate vaipoloi lah a khat ahi. <sup>51</sup> Ahin aman houlamkai dang ho thulhuhna sem le natoh chu ana noppeh lou ahi. Amachu Judea gam'a Arimathea khoa kon ahi, chule Pathen lenggam hung ding chu anga jing ahi. <sup>52</sup> Ama Pilate koma achen Jesu long chu athum'in ahi. <sup>53</sup> Chuin aman atahsa chu thingpel a pat in alalhan, tupat ponnem ajolsao thimtah khat in atom in, chule song kilai

---

✧ **23:44** Potdohbu 26:31-33 ✧ **23:46** Labu 31:5 ✧ **23:49** Lk 8:2,3



lhanthah khat ah alupsah tai. <sup>54</sup> Hiche chu kigotni nilhangkai don a vaigei thimtah a kibol ahi, ajeh chu Cholngah ni kipan ding kon cha ahitai. <sup>55</sup> Atahsa akilah mang phat chun, Galilee a pat'a hung numei ho chun ahin jui yun, atahsa kikoina lhan chu agamu uvin ahi. <sup>56</sup> Chuin inlam acheuvin chule thil namtui le atahsa a nuding nuthei akisem uvin ahi. Ahin athilsem u ajo phat'un Cholngah ni anakipan tai, hijeh chun dan thun angeh dungjui in akichol tauve. ☆

## 24

### *Jesu thodoh kitna*

<sup>1</sup> Ahin nimasani jingpi tah in, numeiho chu lhan lam'ah acheuvin, thil namtui asem u jong akichoiyun ahi. <sup>2</sup> Lhan sung lut na'a um song anakitang doh chu agamu uve. <sup>3</sup> Hijeh chun alut un, ahivangin Jesu long chu amutapouve. <sup>4</sup> Chutia lungboi tah'a adin laitah un, mini apettah in ahung kilah in, ponbang vallah lah akisil lhone. <sup>5</sup> Numei ho chu atijauvin chule amaiyu tol'ah akunlhah sah un ahi. Chuin miteni chun ahin sei lhon in, "Ipi bol'a athiho lah'a ahingdoh khat nahol uham? <sup>6</sup> Ama hikom'ah aumtapoi! Ama athilah a konin athoudoh tai! Galilee a aumlaiya nanaseipeh houchu geldoh un, ☆ <sup>7</sup> Mihem Chapa michonse ho khut'a pehdoh a umding, thingpel'a akhetbeh diu, chule anithum nile thoukit ding ahi, tia anasei chu," atilhone. <sup>8</sup> Chuin amahon hiche hi anasei

☆ **23:56** Potdohbu 20:10; Danbu Ni Na 5:14 ☆ **24:6** Matt 16:21; 17:22,23; 20:18,19; Mk 8:31; 9:31; 10:33,34; Lk 9:22; 18:31-33

mongnai ti ageldoh un ahi. <sup>9</sup> Hijeh chun amaho lhan mun'a konin aseijui somlekhat ho-chule adangho jouse-thilsoh umchan seipeh dingin kintah in akile loi tauve. <sup>10</sup> Solchah ho thilsoh umchan seipeh chu Mary Magdalene, Joanna, James nu Mary, chule numei adangho jong ahiuve. <sup>11</sup> Ahivangin miho ding chun athusim jah'u chu mohthu homkeo dan in agel uvin, hijeh chun atahsan tapouve. <sup>12</sup> Ahin Peter vang chu achomdoh in lhan veding chun alhaijel'in ahi. Abung'in aven ahileh tompon akeova um bouseh chu amun, chuin inlam akile kit in, ipi iti hitam alungdong lseh jeng tai. Emmaus Kho Lampia Jesu Akilah <sup>13</sup> Hiche ni mama chun Jesu nungjui mini, Emmaus kho jotna lampi, Jerusalem a pat mel sagia gamla achun ache lhone. <sup>14</sup> Amanin lamjot toh thilsoh umchan jouse chungchang thudol kihoulim toh akop lhon ahi. <sup>15</sup> Hitiho jouse thu akihoulim lhon laiyin, Jesu jong amatah kinloi tah in ahungin amanitoh alhon khom tai. <sup>16</sup> Ahivangin Pathen in ahetdoh lhon louna din aumsah e. <sup>17</sup> Aman adongin, "Nalamjot pum lhon'a chu ipi thu lom lungluttah a nakihoulim lhon hitaimo?" ati. Chomkhat akhongai lhonin, amaiso lhon lungkham na maiso apulhon in. <sup>18</sup> Chuin amani lah a khat pa, Cleopas chun adonbut in, "Tu niphabep masanga thilsoh ho jouse helou Jerusalem miho lah'a nang bouseh hin nate," atilhone. <sup>19</sup> Jesun adong in, "Ipi thilsoh ho am?" ati. "Nazareth a hung kon Jesu chungah thilsoh umchan ho," tin aseipeh lhontai, "Ama thilkidang nasatah bolthei themgao khat anahin, chule Pathen le miho mitmu a thaneitah houhil

ahi. <sup>20</sup> Ahivangin kathempu pipui hou le adang hou lamkai hon thina chan gotna changdin themmo achan'un, chule amahon thingpel'ah akhenbeh tauve. <sup>21</sup> Keihon Israel huhdoh dinga hungpa Messiah chu ahi tia kakineppiu ahi. Hiche hi nithum masanga thilsoh ahitai. <sup>22</sup> Chutichun keiho lah'a ama nungjui numei phabep khat tujingkah matah chun alhan'ah aum uvin, chule amaho ahung kileuvin kidangtah thulhut ahinpouvin ahi. <sup>23</sup> Amahon atahsa akiholmoi atiuvin, chule vantil amuuvin, aman Jesu ahingkit tai ati. <sup>24</sup> Keiho lah'a pasal phabep khat avedingin alhaidoh un, atahbeh in, Jesu long chu numei ho seibang chun anaum tapoi," atilhone. <sup>25</sup> Chuin Jesun amani jah'a, "Vo lungthim bei miho! Themgaohon Pathen Lekhabua ajihlut ho tahsan ding hahsa nasah uve. <sup>26</sup> Messiah chu aloupina a alut masanga hitiho jouse hi athoh galkai ding ahi ti kichen tah a kivetsah anahilou ham?" ati. <sup>27</sup> Chuin Jesun amani chu Mose le themgao lekhasut hojouse le Pathen Lekhabu jousea kipat in ama chungchang hilchet abolpeh in ahi. <sup>28</sup> Hiche pet a hi amaho Emmaus kho lhung koncha ahitauve. Jesu chu achejom ding dan in aum'in, <sup>29</sup> ahin amanin alho lhonin, "Tujan keini komah gehtan, ajeh chu avagei tai," atilhone. Hitichun ama jong amani chutoh alhon tai. <sup>30</sup> Anne dinga atoulhah uchun, aman changlhah chu alan phatthei aboh'e. Chuin ahehbah in amani chu apen ahi. <sup>31</sup> Chupettah chun amit lhon ahung hahdoh in, chule amanin koi ahichu ahinhedoh lhon tai. Chuin hiche pettah chun

ama amangtai! <sup>32</sup> Amani khat in khat jah'a asei lhon in, “Lampia ikihoulim uva Pathen Lekhabu hilchet abola chu ilungchang lhon kileojap bang louham?” atilhone. <sup>33</sup> Chule hiche nidan kah sung mama chun Jerusalem langah akile lhon tai. Chua chun seijui somekhat le adang amahotoh anakikhom khom ho amulhon in, <sup>34</sup> amahon, “Pakai chu tahbeh in athoudoh tai! Peter henga akilah'e!” tin ahinseyuve. <sup>35</sup> Chuin Emmaus khoa pat hung tenin jong amani thusim, Jesu aheng lhona lampia akijot laiyuva ahung kilah dan, chule changlhah ahin hebal phat'a ahin hetdoh lhondan, aseilhon in ahi.

*Jesu aseijuite henga akilah*

<sup>36</sup> Chule chutia asei laitah uvin, Jesu alah uva hetmanlou kah'in anadingin ahi. Aman ahinseyin, “Chamnan naumpiu hen!” ahinti. <sup>37</sup> Ahivangin amaho abonchauvin atijauvin akichauvin, thilha mudan'in akigel uve! <sup>38</sup> “Ipi jeh a kicha nahiu ham?” tin ahin dongin, “Ipi bol'a nalung sungu chu lungthoina a dim ham? <sup>39</sup> Kakhut veuvin, kakeng veuvin, nanghon keima mong mong kahinai ti namu uve. Nei tham uvin lang thilha kahilou hi hechen un, ajeh chu thilhan tahsa mel tua neimu bangu hi aneipoi,” ati. <sup>40</sup> Thu aseitoh thon akhut le akeng avetsah in ahi. <sup>41</sup> Chutichun amaho tahsan loutah in adingjing nalaiyun, kipana le lungdon nan adimset un ahi. Chuin aman ajah uva, “Neh ding nanei uvam?” ahinti.

<sup>42</sup> Amahon nga kikang khat apeuvin ahi, <sup>43</sup> chule aman hichu anen amahon aveuve.

44 Chuin aman aseiyin, “Masanga nangho toh iumkhom laiYuva, kanaseipeh soh nahi tauve, Kei chungchang thudol Mose danthua, themgao ho lekhabua, chule labua kisun jouse chu guilhung ding ahi,” ati. 45 Chuin aman alungkot u Pathen Lekhabua thuho ahettei nadiuvin ahonpeh in ahi. 46 Chuin aseitai, “Henge, masanglai a pat'a chu Messiah hi thohgim ding chule thiding chule anithum ni le athilah'a kona thoudoh ding tia anakisun ahi. 47 Hitia jong hi anakisun ahi, hiche thuhi namtin jouse henga amin thaneina'a seiphonga umding ahi, Jerusalem a kipan ding: ‘Chonset ngaidamna alung hei jousea dingin aume.’ 48 Nangho hicheho jouse hettosah nahi-uve. 49 Chuleh tua Lhagao Theng kahinsol peh ding nahiue, kapa anakitepna banga. Ahin Lhagao Theng ahung'a van'a kon thilboltheina nadimset tokah uvin hiche khopi a hin um uvin,” ati. ☆

### *Jesu vana akaltou*

50 Chuin Jesun amaho chu Bethany langah apuiyin, vanlam'a akhut alhangin amaho chu phatthei aboh'e. ☆ 51 Amaho phatthei aboh laitah in, amaho chu adalhan chule van langah lahtou vin aumtai. 52 Hijeh chun amahon amachu ahouvun chuin Jerusalem lamah kipana dimset pumin ahung kile tauve. 53 Chuin aphot jouseu chu houin ah Pathen vahchoinan amang tauve.

**PATHEN LEKHABU THENG**  
**The Holy Bible in the Chongthu Dialect of India**

Copyright © 2020 Chongthu Bible Translation Team

Language: Chongthu (Chin, Thado)

Dialect: Chongthu

This is a draft copy of a work in progress. It will be updated.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-11-09

---

PDF generated using Haiola and XeLaTeX on 11 Nov 2022 from source files dated 9 Nov 2022

3254801d-c34e-5c2b-be2e-99bf486ad253